

庫文有萬

種百七集二第

編主五雲王

遺山先生文集

(一)

元好問撰

商務印書館發行

遺山先生文集

(一)

元好問撰

圖學基叢叢書

遺山先生文集序

唐開天間李邕李白皆以文章鳴世。邕之所至阡陌聚觀以爲異人。衣冠尋訪門巷填噎。白則王公趨風列岳結軌。羣賢翕習如鳥歸鳳。是豈縣市相夸沽聲索價而後得之哉。要必有以漸漬其骨髓。動盪其血氣。藻鬯其襟靈。故天下之人爲之咨嗟淫液。鼓舞踴躍。景附響合。而不能自己也。吾友元君遺山。其二李後身乎。始齟能詩。甫冠時名已大振。尋登進士上第。興定正大中。殆與楊趙齊驅。壬辰北還。老手渾成。又脫去前日畦畛矣。君嘗言人品實居才學氣識之上。吾因君言亦嘗謂天下之事皆有品繪事圍摹技之末也。或一筆之奇。一著之妙。固有終身北面而不能寸進者。彼非志之不篤。習之不專也。直其品不同耳。如君之品。今代幾人。方希刷羽天池。揚光紫微。不幸遘疾而沒。其遺文數百千篇藏於家。雖有副墨。而洛誦者率不過得什一二。其所謂大全者。曾莫見焉。是以天下之大夫士。歎焉若懷宿負而未之償也。東平嚴侯弟忠傑。有文如淇奧。好善如干旄。獨能求得其全編。將鋟之梓。且西走書數百里。命予序引。予謂遺山之文之名。有目爭睹。有耳咸聳。庸何序爲。惟君有蓋棺之恨。此其可言者。得以論述之。主上彌居藩邸。挹君盛譽。一見遽以處之太史氏。不數歲。神聖御天文治。堦興稽古建官。百度修舉。其於而堂東觀金華延閣之選。尤所注意者。曷嘗不設燎以待之。而側席以求之哉。向使遺山不死。則登鑾坡掌綸誥。稱內相久矣。奈何遇千載而心違。際昌辰而身往。此非君遺恨也耶。尙賴柳如京之賢。有慰韓吏部之志。文工命拙。雖抱憾於九原。人亡書存。足騰芳於百世。顧予朴學未暇顯評。言念舊游。聊爲揚搘云爾。中統三年陽

遺山先生文集

月封龍山人李治序

序

二

遺山先生文集序

文之爲物何物也。造物者實斬之不輕畀人何哉。蓋天地間靈明英秀之氣萃聚之多蘊蓄之久挺而爲人則必富於才敏於學精於語言能吐天地萬物之情極其變而歸之雅故爲詩爲歌爲賦爲頌爲傳記爲誌銘爲雜言爲樂府兼諸家之長成一代之典使斯文正派如洪河大江滔滔不斷以接夫千百世之傳爲造物者可得而輕畀之哉竊嘗評金百年以來得文派之正而主盟一時者大定明昌則承旨黨公貞祐正大則禮部趙公北渡則遺山先生一人而已自中州斲喪文氣奄奄幾絕起衰挾壞時望在遺山遺山雖無位柄亦自知天之所以畀付者爲不輕故力以斯文爲己任周流乎齊魯燕趙晉魏之間幾三十年其迹益窮其文益富其聲名益大以肆且性樂易好獎進後學春風和氣隱然眉睫間未嘗以行輩自尊故所在士子從之如市然號爲汎愛至于品題人物商訂古今則絲毫不少貸必歸之公是而後已是以學者知所指歸作爲詩文皆有法度可觀文體粹然爲之一變大較遺山詩祖李杜律切精深而有豪放邁往之氣文宗韓歐正大明達而無奇纖晦澀之語樂府則清雄頓挫閑婉瀏亮體製最備又能用俗爲雅變故作新得前輩不傳之妙東坡稼軒而下不論也嗚呼遺山今已矣靈明英秀之氣散在天壤間不知幾年幾時復聚而爲斯人乎東平嚴侯弟忠傑喜與士人游雅敬遺山永其完集刊之以大其傳云陳郡徐世隆序

附錄儲太僕先生手簡

憲旆出巡時。匆匆不克一奉。

高論迄今耿耿。昨揚令書至道。

執事欲刻

遺山先生文集。使來罐處取之。罐慕

遺山甚篤。嘗以不見全集爲恨。訪之十數年。始得秘本于今禮部程公。錄而藏之。欲托好古者刊行而未得也。承領

雅意。忻喜無量。遂借初本再校一遍。但其中亦有一二處訛缺。緣無它本可證。奈何奈何。然古書之行於今者。未必皆能完好也。

遺山文章大家。著述贍富。如中州等集。不行於世久矣。

執事企仰鄉賢。汲汲表章之。甚盛舉也。全集四十卷。納上外傳誌題贈諸作。乃罐於它集中輯錄者。亦請并刻之。蓋遺山在當時。已爲名人碩士所重。不待後世。始知子雲也。須得楷書有典則者。另寫潔本。乃可入梓。聞下許州規措。諒承委得人矣。太康吏回謹附狀。秋暑唯

惠時珍攝不宣。

省齋李先生行臺執事

七月十四日罐頓首復

遺山先生文集總目

古賦

七言古詩

古樂府

七言律詩

碑銘表誌碣

序引

贊

七言絕句

書

雜體

青詞

題跋

五言古詩

雜言

五言律詩

五言六言絕句

記

銘

頌

宏詞

疏

上梁文

祭文

遺山先生文集目錄

頤齋張德輝類次

卷第一

古賦

秋望賦

新齋賦

五言古詩

箕山

同希顏再登箕山

穎亭留別

出京

灔水

古意一首

贈答劉御史雲卿四首

飲酒五首

德禪師清涼草堂

遺山先生文集

目錄

蒲桃酒賦

行齋賦

綠山置酒

光武臺

灔亭

元魯縣榮臺

雜著五首

穎谷封人廟

送欽叔內翰并寄劉白二君五首

後飲酒五首

少林

龍潭

麥歎

北邙

龍門雜詩二首

豐山懷古

乙酉六月十一日雨

示姪孫伯安

種松

虞卿麻長官成趣園二首

雜詩四首

采杞

宿菊潭

觀浙江漲

鶴雀崖北龍潭

五松平

阻雨張主簿草堂

贈答楊煥然

送詩人李正甫

卷第二

五言古詩

萬化如大路

曉發石門渡湍水道中

放言

李道人崧陽歸隱圖

黃公廟

學東坡移居八首

歷下亭懷古

舜泉

與張仲傑郎中論文

同叔能賦濟南廟中古檜

銅鋗次村道中

別李周卿三首

蕭齋詩并引

訓韓德華送歸之作

戊戌十月山陽雨夜二首

看山

九日讀書山十首

留月軒

梨花海棠二首

趙吉甫西園

臨汾李氏任運堂二首

寄英禪師

題張左丞家范寬秋山橫幅

宿張靖田家

曲阜紀行十首

寶嚴紀行

鴈門道中

岳祠齋宮夜宿

示程孫四首

九月初霖雨中感寒痺

同白兄賦餅中玉簪

野史亭雨夜感興

哭延孫

贈鶯

讀書山月夕一首

卷第三

七言古詩

虞坂行

秋蚕

南溪

送郝講師住崇福宮

范寬秦川圖

赤壁圖

寄答溪南詩老辛愿敬之
愚軒爲趙宜之賦

西園

雙峯競秀圖

二月十五日鶴

送李長源歸關中

閨商卿還山中

半山亭招仲梁飲

鄧州城樓

宛丘嘆

游黃華山

巨然松吟萬壑圖

密公寶章小集

荆棘中杏花

太白獨酌圖

松上幽人圖

送張君美往南中

戲題新居

贈蕭鍊師公弼

送弋唐佐董彥寬南歸

送宋省參并寄潞府諸人

覓神霄道士古銅爵

贈休糧張鍊師

天井關

卷第四

七言古詩

讀書山雪中

題商孟卿家明皇合曲圖

過晉陽故城書事

蟾池

贈答張教授仲文

高門關

甲辰秋洛陽得黃葵子種之南庵明年夏六月作花

賦王君璋雲峽并序

馬嶺
賦張聖與雲岩并序

劉遠筆

贈周良老

鴻溝全欽叔賦

雪中自洛陽還嵩山

祖唐臣愚庵

過井陘

北岳

天涯山

智仲可月下彈琴圖

常生姓生四十月能作字喜爲賦詩

贈利州侯神童

奚官牧馬圖

紫薇劉丈山水濟川賦

王右丞雪霽捕魚圖

跋酒門限邵和卿醉歸圖

題張彥寶陵川西溪圖

世宗御書田不伐望月婆羅門引先得楚字

送王彥華

劉時舉節制雲南

許道寧寒溪古木圖

贈別孫德謙

太原贈彥遠

鹿泉新居

卷第五

雜言

去歲君遠遊

送希顏赴召西臺

虎害

送高信卿

段志堅畫龍爲劉鄧州賦

紀子正杏園燕集

爲韓德華子阿魯制字阿平并序

送夢臣北上并序

趙題學以酒見餉且求制名

贈張潤之

送張子益北上并引

汾亭古意圖

換得雲亭帖喜而賦詩

過劉子中新居

此日不足惜

嵩山玉鏡

飲酒

送詩人秦簡夫歸薊墳別業

寄趙宜之

送李參軍北上

王黃華墨竹

九月七日夢中作

送王亞夫舉家歸許昌

醉後走筆

癸卯歲杏花

贈答趙仁甫

駝豬行

水簾記異

食榆莢

游龍山

游承天鎮懸泉

游泰山

卷第六

古樂府

天門引

湘夫人詠

遺山先生文集

目錄

汎舟大明湖
賦邢州鵲山

湧金亭示同游諸君南冠行
靖南湖雪景乘驃圖并引

題劉紫薇堯民野醉圖

下黃榆嶺

嘯臺感遇

谼谷聖燈

李峪園亭看雨

醉中送陳季淵

送弋唐佐還平陽

付阿耽誦

蛟龍引

湘中詠

這山先生文集

目錄

孤劍詠

芳華怨

結楊柳怨

歸舟怨

塞上曲

後平湖曲

長安少年行

隋故宮行

征西壯士謠

望歸吟

採花詞五首

春風來

梅花

續小娘歌十首

卷第七
五言律詩

渚蓮怨

後芳華怨

秋風怨

征人怨

西樓曲

洧川行

黃金行

解劍行

望雲謠

梁園春五首

獵城南

幽蘭

寶鏡

懷益之兄

惡雨

綦威卿挽辭

陽翟道中

太室同希顏賦

方城道中懷山居

送曹吉甫兼及通甫勝槩

寄贈龐漢茂弘

聞希顏得英府記室落魄

阿千始生

少林雨中

癸巳除夜

短日

寄程孫鐵安

己亥元日

發濟源

遺山先生文集

目錄

汴禪師自斲普照瓦爲研以詩見餉爲和二首

老樹

月觀追和鄧州相公席上韻

送登封張令西上

孟州夾灘飲承之御史家

少室南原

洛陽古城曦陽門早出

得姪摶言三首

長壽新居三首

十二月六日二首

得一飛姪安信

送母受益自潞州歸崧山

贈汴禪師

送楊次公兼簡素彥容李天成

倪莊中秋

答潞人李唐佐贈詩陽興砦

同周帥夢卿崔振之遊七嵒
聚仙臺夜雨

續陽平十愛

送田益之從周帥西上二首

十月四日往關南

舊國

甲辰夏五月積雨遣悶二首

劉子中夢庵

感事

送邦彥北行

同姚公茂徐溝道中聯句

庚子三月十日作

京兆漕司官居三首

送閻子實集和之北上庫城

遺興

示白誠甫

懷粹中

送崔振之迎家汴梁

續陽平十愛

九月晦日王村道中

寄王丈德新二首

和仲梁

陽泉棲雲道院

丙午九日菊詠二首

醉中條李隱君邦彥

同冀丈明秀山行

壬子月夕

送馮揚善關中之行

甲寅正月二十三日故關道中三詩

婁生北上

八月并州鴈

甲寅十二月四日出鎮陽寄宰魯伯

送文生西上

乙卯十一月往鎮州

卷第八

七言律詩

秋懷

帝城二首

春日

野菊座主閑閑公命作

寄希顏二首

昆陽二首

葉縣雨中

穎亭

楚漢戰處同欽叔賦

留別仲澤

寄答景玄兄

後灣別業

會善寺

楊之美尙書挽章

劉文仲通哀挽

寄欽用

鄭州上致政賈右丞相公

寄辛老子

山中寒食

懷叔能

寄西溪相禪師

寄答趙宜之兼簡溪南詩老

度太白嶺往崑陽

懷益之兄

橫波亭

僕射陂醉歸卽事

李屏山挽章二首

自菊潭丹水還寄崧前

被檄夜赴鄧州幕府

除夜

光甫內鄉新居

十月

張主簿草堂賦大雨

春日半山亭游眺

出山

新野先主廟

獨峯楊氏幽居

十日登豐山

圍城病中文舉相過

雨後丹鳳門登眺

譖然師出圍城賦鶴詩爲送

懷秋林別業

內鄉縣齋書事

故人

馬鄧驛中大雨

鄧州相公命賦喜雨

西齋夜宴

送吳子英之官東橋

丹霞下院同仲澤賦

別程女

謝鄧州帥免從事之辟

石門

渡湍水

岐陽三首

讀靖康僉言

京居辛卯八月六日作

追用座主閑閑公韻上致政馮內翰二首

壬辰十二月車駕東狩後卽事五首

永寧南原秋望

癸巳四月二十九日出京

與張杜飲

夢歸

淮右

卽事

秋夜

乙未正月九日立春杏花落後分韻得歸字

送輔之仲庸還大梁

送杜子

送杜招撫歸西山

有寄

別王使君文從之

衛州感事二首

中秋雨夕

喜李彥深過聊城

秋夕

白屋

徐威卿留二十許日將往高唐同李輔之贈別

望王李歸程

甲午除夜

三仙祠

繡江汎舟有懷李郭兩君

眼中

寄欽止李兄

鎮州與文舉百一飲

寄汁禪師

望蘇門

七言律詩

卷第九

望崧少二首

別覃懷幕府諸君二首

高平道中望陵川二首

外家南事

桐川與仁卿飲

官園探梅同康顯之賦

別康顯之

雨夜

別張御史

再到新衛

入濟源寓舍

野菊再奉座主閑閑公命作

四哀詩

冀京父

王仲澤

懷州子城晚望少室
羊腸坂

野谷道中懷昭禪師太原
追賦定襄周帥夢卿家秋日牡丹

過漉鹿城與趙尙賓談山陽舊事
十二月十六日還冠氏十八日夜雪

寄楊飛卿

東平送張聖與北行

出東平

別冠氏諸人

鎮平縣齋感懷

五月十二日座主閑閑公諱日

李欽叔

李長源

過李長源故居

己亥十一月十三日雪晴夜半讀書山看月明日作

杏花二首

醉後

賦南中楊生玉泉墨

贈張文舉御史

寄答飛卿

留別龍興汴禪師普照鑑禪師

赤石谷

贈楊君美之子新甫

灔亭同麻知幾賦

答公茂

過應州

應州宮寶寺大殿

懷安道中寄曹徵君子玉

五月十一日櫛軒忌辰追懷

感事

玉溪

華不注山

岳解元生日

感興

晨起

送周帥夢卿之關中二首

感事

十月二十日雪中過石嶺關將上書萃國幕府感懷

春寒

卽事

示懷祖

示崔雷詩社諸人

弘州贈曹丈子玉

和仁卿演太白詩二首

燕府白兔

梁都運亂後得故家所藏無盡藏詩卷

出都二首

癸卯望宿中霍道院
紫牡丹三首

甲辰三月旦日以後雜詩三首
與同年敬鼎臣宿順天天寧僧舍

都運李丈哀挽

贈答樂丈舜咨
贈答郝經伯常

呂國材家醉飲

洛陽

過三鄉望女凡邨追懷溪南詩老辛敬之二首

爲鄧人作詩

贈張主簿偉

望盧氏西南熊耳嶺

寄劉繼先

寄楊弟正卿

爲鮮于彥魯賦十月菊

贈答同年敬鼎臣

寄英上人

寄答仰山謙書記

九日登平定湧雲樓故基

平定鵲山神應主廟

寄答商孟卿

答石子章因送其行留別仲經

別周卿弟

寄叔能兄

賀威卿徐弟得雄

卷第十
七言律詩

追錄洛中舊作

十一月五日暫往西張石嶺關畫所見

追懷曹徵君

弔岳家千里駒

十三日度嶽嶺

玄都觀桃花

夜宿秋香亭有懷木菴英上人

與馮呂飲秋香亭

贈李春卿

龍興寺閣

甯椽端甫北上

空山何巨川虛白庵二首

哭樊帥

送樊順之

宿翠屏口

過寂照庵別陳丈

東園晚眺

陀羅峯二首

春日書懷呈劉濟川晉溪

七月十二日行狼牙嶺

玉泉二首

贈張致遠

汴梁除夜

哀武子告

甲辰秋留別丹陽

別緯文兄

答定齋李兄

聽妓女喬夫人鼓風入松

寒食

蜀昭烈廟

王敦夫祥止庵

梁移忠詩卷

喬千戶挽詩

贈王仙翁道成

常仲明教授挽辭

追錄舊詩二首

丁未寒食歸自三泉

卽事呈邦瑞

和白樞判

慶高評事八十之壽

超然王翁哀輓

大名贈答張簡之

燕都送馬郎中北上

馬雲漢方鏡背有飛魚

贈答鴈門劉仲修

餘慶堂

寄答劉生

別董德卿

送端甫西行

讀李狀元朝宗禪林記

同嚴公子大用東賞梅

中庸先生垂示先大夫教子詩及裴內翰擇之所述家傳

賀中庸老再被恩綸

趙汲古南園

柳亭雨夕

玉峯魏丈哀挽

清明日改葬阿辛

寄謝常君卿

送武成之往渼陂

送劉子東游

甲寅九日龍泉二首

十日作

贈答普安師

曹壽之平水之行

追懷友生石裕卿

贈答平陽仇舜臣

約嚴侯汎舟

贈蕭漢傑

國醫王澤民詩卷

唐祖臣挽章

感寓

人日有懷愚齋張兄緯文

張村杏花

卷第十一

五言絕句

洛陽高少府

內鄉詩

山居雜詩六首

孝純宛丘遷奉

追懷趙介叔

挽鴈門劉克明

賈漕東城中隱堂

送李同年德之歸洛西

送曹幹臣

慶工部趙丈八秩之壽

丙辰九月二十六日挈家游龍泉

存歿

趙元德御史兄七秩之壽

陽後庵五首

薛明府去思口號七首

梁父吟扇頭

南樓月夕有懷

山中晚春

乙巳九月二十八日作

六言

定齋兄寫真

德和尚墨竹扇頭

唐子達扇頭

七言絕句

論詩三十首丁丑歲三鄉作

京都元夕

藍采和像

杏花雜詩十三首

惠崇蘆鴈三首

書生

步虛詞三首

風雨停舟圖

辛亥寒食

得緯文兄書

巨然秋山圖

曹得一扇頭

文湖州草蟲

西園

鴛鴦扇頭

出京

早起

銅雀臺瓦硯

拙庵爲溫甫賦

納涼張氏莊二首

送窮

梁縣道中

再題

劉鄧州家聚鴨圖

長壽山居元夕

贈眼醫武濟川

題伊陽楊氏戲虎圖

右司正之家渭川千畝圖二絕

同希顏欽叔玉華谷還會善寺卽事二絕

鎮平寄孫伯安筆

鎮平書事

超化

寄女嚴三首

無題二首

希顏挽詩五首

過希顏故居四首

遠山先生文集

目錄

楊柳

自題寫真二絕

吳子英家靈照二圖二絕

戊子正月晦日內鄉西城遊眺

聞仲澤丁內艱

賦粹中師竹拂子

王子端內翰山水同屏山賦二首

同希顏欽叔玉華谷分韻得筆華二字

從鄧帥覓酒

黃筌龜藏六圖爲左丞賦

自鎮平暫往秋林道中寄家

山居二首

自鄧州幕府暫歸秋林

題省掾劉德潤家驂鸞圖

出鄧州

雜著九首

戚夫人

家山歸夢圖三首

題山谷小艷詩
四皓圖

雜著

卷第十二

七言絕句

俳體雪香亭雜詠十五首

梅花

息軒楊秘監雪行圖

記夢

雜著四首

眉二首

三鄉時作

癸巳五月三日北渡三首

夢中作

杏花

姨母隴西君諱日作

春夕
溪上

楊煥然生子四首

啓毋石

內鄉詩

送窮

出都

登珂山寺三首

奉醉子京禪師見贈之什三首

聊城寒食

宿神霄北庵夢中作

夜雪

白趙在歸冠氏二首

戲題醉仙人圖

題解飛卿山水卷

倫鎮道中見槐花

聞歌懷京師舊遊

龍泉寺四首

出鎮州

楊秘監馬圖

藥正卿餉酒

贈絕藝杜生

自題二首

內黃道中楚王廟

劉氏明遠庵三首

南關二首

惠崇獐猿圖

冠氏趙莊賦杏花四首
戲贈白髮二首
濟南雜詩十首

趙士表山林暮雲圖二首

題劉才卿湖石扇頭

鄭先覺幽禽照水扇頭

李進之迂軒二首

過邯鄲四絕句

竹溪夢遊圖

王都尉山水

趙大年秋溪戲鴨二首

北歸經朝歌感寓三首

題蘇氏寶章

題李庭訓所藏雅集圖

馬坊冷大師清真道院二首

寄史同年三首

宋周臣生子三首

李白騎驢圖

九月晦

送窮

過侯相公雲溪

同漕司諸人紅梨花二首

遊天塵雜詩十三首

雜詩六首道中作

卷第十三

七言絕句

初挈家還讀書山雜詩四首

贈友卿三首

爲衍聖公題張公佐湘江春早圖二首并引

代州門外南樓二首

以玉連環爲呂仲賢壽

壽之賈南中山水并畫序

陳德元竹石二首

吳子賢樗庵二首太乙蓮舟圖三首

初發潞州

卽事

雜著

乞酒示皇甫季貞
許由擲瓢圖

賦餅中雜花七首

解嘲二首

渾源望湖川見百葉杏花二首

杜生絕藝

德華小女五歲能誦予詩數首以詩爲贍
跋紫微劉尊師山水橫披四首

東山四章

追錄乙未八月十七日莘縣夢中所得

感興四章

發南樓度鴈門關二章

王希古乞言

從希顏覓篤耨香二章

喬大夫人墨竹

自題中州集後五章

藥山道中二章

摘瓜圖二首

七賢堂

大簡之畫松風圖二首

贈答要襄叔二首

秋江曉發圖

洛陽衛良臣以星圖見餉謾成三詩爲謝

西山樓爲王仲理賦二詩

曉起
春歸

從孫顯卿覓平定小山

墨竹扇頭

龍門公墨竹風烟夕翠二首

戲贈柳花

醉貓圖二章

講武城

善應寺五首

黃華峪十絕句

峽口食鱸魚有感

秋江待渡橫披

贈脩端卿張去華韓君傑三人六首

題山亭會飲圖二首

題鷺鷥敗荷扇頭

樂天不能忘情圖二章

燕省掾屬張彥通舉釋菜之廢仁卿以詩美之亦賦二首

采菊圖爲北京侯漕賦二詩

無塵亭二章

李廣道寫真二章

錢過庭烟溪獨酌圖二章

蒼崖遠渚圖二章

三士醉樂圖

鄉郡雜詩五章

宗人明道老師澹軒二章
題商正叔隴山役行圖二章

東平李漢卿草蟲卷二章

息軒秋江捕魚圖三章

七賢寒林圖

郭熙溪山秋晚圖二章

李仲華湍流高樹圖二詩

益都宣撫田侯器之燕子圖三詩

前高山雜詩七章

楚山清曉圖

題石裕卿郎中所居四詠

贈予范家兒子

跋文獻公張果老圖

三鄉雜詩三首

鈞州道中

卷第十四

七言絕句

榆社峽口村早發

十月二十日雪

同兒輩賦未開海棠二章

早發安生道中雨水冰

隱秀君山水

楊秘監馬圖

雪行圖

己酉四月十七日度石嶺

耀卿西山歸隱三首

東丹射騎

投書圖二章

龐都運山水

武善夫桃溪圖二章

書扇贈李湛然

祖唐臣所藏樗軒畫冊二題

走筆題十老會請疏

避兵陽曲北山之羊谷題石龕

馬雲卿畫紙衣道者像

哭徵君子玉二章
書貽第三女珍

送子微二章

岳山道中

寄杜莘老三章

劉君用可庵二首

雪岸鳴鶴

虛名

題劉威卿小字難素冊後二章

歸義僧山水巷

巢雲曙雪圖

普照范鍊師寫真三章

客意

七夕

壬子寒食

過威州鎬厲王故居

真味齋
喬夫人綵綉仙人圖出山像

論詩三首

自題寫真

贈高君用

郭大方自適軒

晴景圖

金山

賈彥清飛雨亭橫披

內相楊文獻公哀挽三章

花光梅

夏山風雨

雪谷早行圖二首

辛亥九月末見菊

夜宿山中

跨牛圖

歸義興侍者谿山蕭寺橫軸
胡壽之侍月軒三音

起禪師晦迹庵

贈寫真田生三章

周才卿拙庵

風柳鳴蟬

僧寺阻雨

王子文琴齋

讀漢書

石勒問道圖

舊與趙景溫

春雲澹冶

胡叟楚山清曉

答俊書記學詩

臺山雜詠十六首

贈湛澄之四章

乙卯二月歸自汴梁久旱而雨偶記內鄉一詩

三門集津圖

乙卯端四日感懷

山村風雨扇圖

跋蕭帥鶯鶯敗荷扇頭

袁顯之扇頭

贈司天王子正二首

工部趙侍郎下世日作

跋耶律浩然山水卷

貞燕二首

楊秘監雪谷早行圖

杜莘老夏日汾亭橫軸

武元直秋江罷釣

張彥遠江行八詠圖

題馮漕緩之碩人在澗橫軸

題邢公達寒梅凍雀圖

秀隱君山水

同梅溪賦秋日海棠二章

梁氏先人手書

題杜國寶祖考行狀後三絕句

詩贈訾子野三章

戲相師

留贈丹陽王鍊師三章

卷第十五

宏詞

章宗皇帝鐵券行引

擬賀登寶位表

秦王擒竇建德降王世充露布

擬立東宮詔

擬除樞密使制

擬除司農卿制

擬御史大夫讓樞密使表

卷第十六

碑銘表誌碣

評章政事壽國張公神道碑

沁州刺史李君神道碑

王黃華墓碑

卷第十七

碑銘表誌碣

閔閔公墓銘

寄庵先生墓碑

朝散大夫胡公神道碑
朝列大夫張公墓表

卷第十八

碑銘表誌碣

內相文獻楊公神道碑銘

禮部尚書趙公神道碑

轉運使剛敏王公神道碑銘

卷第十九

碑銘表誌碣

內翰王公墓表

國子祭酒權刑部尙書馮君神道碑銘

內翰馮公神道碑

卷第二十

碑銘表誌碣

順安縣令趙公墓碑

吏部尙書張公神道碑

通奉大夫鈞州刺史張君神道碑銘
資善大夫武寧軍節度使夾谷公神道碑銘

卷第二十一

碑銘表誌碣

御史張君墓表

御史程君墓表

平叔墓銘

希顏墓銘

太司農丞康君墓表

聶元吉墓誌銘

卷第二十二

碑銘表誌碣

大中大夫劉公墓碑

陽曲令周君墓表

中順大夫張公墓碑
奉直趙君墓碣銘

史邦直墓表

御史孫公墓表

卷第二十三

碑銘表誌碣

廉訪使楊君神道碑

文儒武君墓銘

曹徵君墓表

卷第二十四

碑銘表誌碣

真定教授常君墓銘

南峯先生墓表

蘧然子墓碣銘

盧太醫墓誌銘

張君墓誌銘

卷第二十五

碑銘表誌碣

族祖處士墓銘

承奉河南元公墓銘

景玄墓銘
郝先生墓銘

善人白公墓表
臨海弋公阡表

蘇彥遠墓銘

張遵古墓碣銘

敏之兄墓銘

南陽縣太君墓誌銘

贊皇郡太君墓銘
並孝女墓銘

孝女阿秀墓銘

卷第二十六

碑銘表誌碣

東平行臺嚴公神道碑

順天萬戶張公勳德第二碑

卷第二十七

碑銘表誌碣

龍虎衛上將軍水虎公神道碑

贈鎮南軍節度使良佐碑

奉國上將軍武廟署令耶律公墓誌銘

卷第二十八

碑銘表誌碣

大丞相劉氏先塋神道碑

臨淄縣令完顏公神道碑

歸德府總管范陽張公先德碑
費縣令郭明府墓碑

廣威將軍郭君墓表

潞州錄事毛君墓表

卷第二十九

碑銘表誌碣

顯武將軍吳君阡表

忠武任君墓碣銘

信武曹君阡表

千戶喬公道碑銘

千戶趙侯神道碑銘

故帥嚴侯墓表

卷第三十

碑銘

濮州刺史畢侯神道碑銘

宣武將軍孫君墓碑
冠氏趙侯先塋碑

龍山趙氏新塋之碑

兗州同知五翼總領王公墓銘

五翼都總領豪士信公之碑

卷第三十一

墓銘碑表

清涼相禪師墓銘

墳雲墓銘

華嚴寂大士墓銘
孫伯英墓銘

紫虛大師于公墓碑

冲虛大師李君墓銘

圓明李先生墓表

藏雲先生袁君墓表

天慶王尊師阡表
通真子墓碣銘

通玄太師李君墓碑

告山贊禪師塔銘

卷第三十二

記

令旨重修真定廟學記

博州重修學記

壽陽縣學記

葉縣中嶽廟記

三皇堂記

卷第三十三

記

鄧州新倉記

吏部掾屬題名記

創開滹水渠堰記

南陽縣令題名記

警巡院廨署記

市隱齋記

東平府新學記

趙州學記

代冠氏修廟學記

長慶泉新廟記

崔府君廟記

惠遠廟新建外門記

順天府營建記

臨錦堂記

致樂堂記

邢州新石橋記

馬侯孝思堂記

友山亭記

卷第三十四

記

王無競題名記

東平賈氏千秋錄後記

校笠澤叢書後記

畫記

濟南行記

東游略記

兩山行記

毛氏宗支石記

尙藥吳辨夫壽塚記

樊侯壽塚記

卷第三十五

威德院功德記

竹林禪院記

少林藥局記

壽聖禪寺功德記

興福禪院功德記

龍門川大清安禪寺碑

忻州天慶觀重脩功德記

太古觀記

長庵記

朝元觀記

通仙觀記

紫微觀記

清真觀記

卷第三十六

序引

陸氏通鑑詳節序

東坡詩雅引

錦機引

十七史蒙求序

如庵詩文序

雙溪集敍

楊叔能

新軒樂府引

卷第三十七

序引

張仲經詩集序

遺山先生文集

目錄

杜詩學引

東坡樂府集選引

集諸家通鑑節要引

拙軒銘引

秉辨引

鳩水集引

亨集引

逃空絲竹集引

陶然集序

木庵集序

南冠錄引

興定庚辰太原貢士南京狀元樓宴集題名引

送秦中諸人引

送李輔之之官濟南序

送高雄飛序

寒食靈泉宴集序

太原昭禪師語錄引

嵩和尚頌序

寒食會要引

元氏集驗方序

周氏衛生方序

卷第三十八

銘

孔道輔擊蛇笏銘

良佐鏡銘

布衾銘

最樂堂銘

太古堂銘

天硯銘

默庵銘

無絃琴銘

超然堂銘

皇極道院銘

小紫玉池硯銘

贊

手植檜聖像贊

范文正公真贊

范鍊師真贊

讀經圖贊

趙閑閑真贊二首
寫真自贊

張幾道煉師真贊

頌

登封令薛侯去思頌

卷第三十九

書

癸巳歲寄中書耶律公書

答中書令成仲書

答嚴大用萬戶書

疏

忻州脩學疏代郝侯作

請太一宮提點李太師住天封疏

曹子歸葬疏

雜體

麻社張諸人詩評

遺山先生文集

目錄

射說

清真道院營建疏

興國院改律爲禪請住持疏

酒裏五言說

商氏家世錄

卷第四十

上梁文

南宮廟學大成殿上梁文

外家別業上梁文

青詞

中令耶律公追悼先妣國夫人青詞

劉宣撫設醮青詞

樊守謝土詞

祭文

祭飛蝗文

題跋

跋國朝名公書

跋閑閑公自書樂善堂詩

跋蘇黃帖

靖德昭兒子高戶字說

故物譜

南陽廡署上梁文

太夫人五七青詞

張喜千戶青詞

郡守天池祈雨狀

爲第四女配婿祭家文

題樗軒九歌遺音大字後

跋張二相帖

跋松庵馮丈書

跋蘇叔黨帖

題蘇氏父子墨帖

毛氏家訓跋語

跋紫微劉尊師山水

跋龍嵒書柳子厚獨覺詩

跋東坡和淵明詩後
題許汾陽詩後

跋張仲可東阿鄉賢記

題學易先生劉斯立詩帖後

題閑閑書赤壁賦後

遺山先生文集卷第一

金 裕之元好問撰

元 頤齋張德輝類次

古賦

秋望賦

步裴回而徒倚。放吾目乎高明。極天宇之空曠。閱歲律之崢嶸。于時積雨收霖。景氣肅清。秋風蕭條。萬籟俱鳴。菊鮮鮮而散花。鶯杳杳而遺聲。下木葉於庭皋。動砧杵於蕪城。穹林早寒。陰崖晝冥。濃淡霏拂。繞白紆青。紛叢薄之相依。浩霜露之已盈。送蒼蒼之落日。山川鬱其不平。瞻彼轆轤。西走漢京。虎踞龍蟠。王伯所憑。雲烟慘其動色。草木起而爲兵。望崧少之霞景。渺浮丘之獨征。汗漫之不可與期。竟老我而何成。挹清風於箕穎。高巢由之遺名。悟出處之有道。非一理之能并。繫南山之石田。維景略之所耕。老螭盤盤。空谷淪精。非雲雷之一舉。將草木之偕零。太行截天。大河東傾。邈神州于西北。悅風景於新亭。念世故之方殷。心寂寥而潛驚。激商聲于寥廓。慨涕泗之緣纓。吁咄哉。事變於已窮。氣生乎所激。豫州之土。復於慷慨擊節之誓。西域之候。起于窮悴。傭書之筆。諒生世之有爲。寧曰可而坐食。且夫飛鳥而戀故鄉。嫠婦而憂公室。豈有夷墳墓而剪桑梓。視若越肥而秦瘠。天人不可以偏廢。日月不可以坐失。然則時之所感也。非無候蟲之悲。至於整六翮而睨層霄。亦庶幾乎鷺禽之一擊。

蒲桃酒賦并序

劉鄧州光甫爲予言。吾安邑多蒲桃。而人不知有釀酒法。少日。嘗與故人許仲祥。摘其實。并米炊之。釀雖

成而古人所謂甘而不飴冷而不寒者固已失之矣貞祐中鄰里一民家避寇自山中歸見竹器所貯蒲桃在空盃上者枝蒂已乾而汁流盃中薰然有酒氣飲之良酒也蓋久而腐敗自然成酒耳不傳之祕一朝而發之文士多有所述今以屬予子寧有意乎予曰世無此酒久矣予亦嘗見還自西域者云大石人絞蒲桃漿封而埋之未幾成酒愈久者愈佳有藏至千斛者其說正與此合物無大小顯晦自有時決非偶然者夫得之數百年之後而證數萬里之遠是可賦也於是乎賦之

其辭曰

西域開漢節迴得蒲桃之奇種與天馬兮俱來枝蔓千年鬱其無涯崖歛清秋以春煦發至美乎胚胎意天以美釀而飽予出遺法于湮埋索罔象之玄珠薦清明於玉杯露初零而未結雲已薄而仍裁挹幽氣之薰然釋煩悵于中懷覺松津之孤峭羞桂醑之塵埃我觀酒經必麴蘖之中媒水泉資香潔之助秫稻取精良之材效衆枝之畢前敢一物之不階艱難而出美好徒釀毒之貽哀繫工倕之物化與梓慶之心齋旣以天而合天故無桎乎靈臺吾然後知珪璋玉毀青黃木災音衰而鼓鍾味薄而鹽梅惟憚殘天下之聖法可以復嬰兒之未孩安得純白之士而與之同此味哉

新齋賦

予旣罷內鄉出居縣東南白鹿原結茅菊水之上聚書而讀之其久也優柔厭飫若有所得以爲平生未嘗學而學於是乎始乃名所居爲新齋且爲賦以自警其辭曰

新之爲說也在金曰從革在木曰從斤丘陵爲山而惡乎畫履霜堅冰而致于駒猶之於人則齊魯有一

再之漸狂聖由念否之分唯夫守一而不變者不足以語化之爲神附陳迹以自觀悼吾事之良勤失壯歲於俯仰竟四十而無聞聖謨洋洋善誨循循出處語默之所依性命道德之所存有三年之至穀有一日之歸仁動可以周萬物而濟天下靜可以崇高節而抗浮雲曾出此之不知乃角逐乎空文僂北轅以適楚將疇問而知津揜虛名以自夸適以增頑而益嚚我卜我居於浙之濱方處陰以休影思沐德而澡身蓋嘗論之生而知困而學固等級之不躡憤則啓悱則發亦愚智之所均齋戒沐浴惡人可以祀上帝潔己以進童子可以遊聖門顧年歲之未暮豈終老乎凡民已焉哉孰糟粕之弗醇孰土苴之弗眞孰昧爽之弗旦孰悴槁之弗春又安知溫故知新與夫去故之新他日不爲日新又新日新之新乎

行齋賦

戊子冬十月長壽新居成仲經張君從予卜鄰得王氏之敗屋焉環堵蕭然不蔽風日君爲之補罅漏治蕪穢蓋十日而後可居華門圭竇故事畢舉取君子素其位而行之義名曰行齋而乞文於予予以爲士之貧至於君極矣無祿以爲養無田以爲食無僮僕爲之負販無子弟爲之奔走無好事者爲之謀緩急而功薄少率貲無旬日計泰然以閉戶讀書爲業不以爲失次而以爲當然不以爲怨不以爲憂而又且以爲樂也然則不謂之無媿其名也而可乎迺爲賦云

賦分在人如物有常反鶴與鳧無益短長力有可來勝天不祥福不盈睫一敗莫償莫難養心操存舍亡出入無時兮莫知其鄉飽飢有時而激怒兮殆象虎之貽殃我思古人動靜有方靜以養虛剛以作彊辱以處汙愚以退藏屹中立而不倚遡橫潰而獨障直釣磻溪之魚禿節單于之羊有漆身以爲厲有被髮

而爲狂。仕汙世而執翫。徇殊俗而解裳。太阿存兼善之達。緇袍有不求之臧。唯夫長劍大冠。以揖讓人主。之前者若固有故。木食澗飲。雖至於勞筋骨而餓體膚者爲無傷。古有之居不隱者志不廣。身不抑者志不揚。士固有遯世而不復見。然愈揜而愈彰。南山蒼蒼。北風雨霜。有蘭不彫。俟春而芳。偉哉造物。又將發吾子之幽光耶。太阿卽阿衡見文選

五言古詩

箕山

幽林轉陰崖。鳥道人迹絕。許君棲隱地。唯有太古雪。人間黃屋貴。物外祗自潔。尙厭一瓢喧。重負寧所屑。降衷均義稟。汨利忘智決。得隴又望蜀。有齊安用薛。干戈幾蟹觸。宇宙日流血。魯連蹈東海。夷叔采薇蕨。至今陽城山。衡華兩丘垤。古人不可作。百念肝肺熱。浩歌北風前。悠悠送孤月。

綠山置酒

同內翰馮大父獻雷兄希顏賦詩分韻得賓字

靈宮肅清曉。細柏含古春。人言王子喬。鶴馭此上賓。白雲山蒼蒼。平田木欣欣。登高覽元化。浩蕩融心神。西望洛陽城。大路通平津。行人細如蟻。擾擾爭紅塵。蓬萊風濤深。鬢毛日夜新。殷勤一杯酒。媿爾雲間人。

同希顏再登箕山

千年箕山祠。蘿逕深以悄。桂樹不復見。禿藪餘秋篠。盤盤盡絕頂。石冢平木杪。長風萬里來。筋骸覺輕矯。側身望岩竇。解衣憩林表。是時夏春交。野色亂青縹。川光乍明滅。地脉互繁繞。岡巒蟻垤出。井邑蜂衙擾。紅塵洛陽昏。白雲太行曉。元功信冥漠。一覽疑可了。悟彼東山人。胸中魯宣小。

光武臺

東南地上遊荆楚。兵四衝。游子十月來。登高送長鴻。當年赤帝孫。提劍起蒿蓬。一顧漁水斷。再顧新都空。雷霆萬萬古。青天看飛龍。歸然此遺臺。落日荒烟重。誰見經綸初。指揮走羣雄。白水日夜東。石麟幾秋風。空餘廣武歎。無復雲臺功。

穎亭留別同李治仁卿張肅子敬王元亮子正分韻得畫字

故人重分攜。臨流駐歸駕。乾坤展清眺。萬景若相借。北風三日雪。太素秉元化。九山嶧嶧嶸。了不受陵跨。寒波淡淡起。白鳥悠悠下。懷歸人自急。物態本閑暇。壺觴負吟嘯。塵土足悲咤。迴首亭中人。平林澹如畫。

灔亭

春物已清美。客懷自幽獨。危亭一徘徊。翛然若新沐。宿雲淡野川。元氣浮草木。微茫盡楚尾。平遠疑杜曲。生平遠游賦。吟諷心自足。竭來着世網。抑抑就邊幅。人生要適情。無榮復何辱。乾坤入望眼。容我謝羈束。一笑白鷗前。春波動新綠。

出京史院得告歸嵩山侍

從宦非所堪。長告欣得請。驅馬出國門。白日觸隆景。半生無根著。飄轉如斷梗。一昨隨牒來。六月阻歸省。城居苦湫隘。羣動日蛙鼃。慚媿山中人。團茅遂幽屏。塵泥免相涴。夢寐見清穎。矯首孤飛雲。西南路何永。

元魯縣琴臺

荒城草木合。破屋風雨侵。千年一琴臺。睠焉涕盈襟。遺愛食縣社。公寧不堪任。此臺卽甘棠。忍使無餘陰。

旁舍高以華。大豪日捐金。蒼雲玄武暮。鬼物憑陰岑。尙德抑玄虛。墜典誰當尋。我興薦寒泉。百拜公來臨。
元道州文編以元魯山爲元魯
公來不能知落日下飢禽懷哉空山裏鶴飛猿與吟當年于蒿歌補袞一何深承平示得意獨能正哇淫。
君相此一時又復悟良箴諛臣坐廢黜盍亦起幽況蒲輪竟頽轂香艸空深林寂寞授書室孤甥舉遺衾。
生平諒已然薄俗矧來今千山爲公臺萬籟爲公琴夢曠不竝世月露爲知音人間歸澇耳已矣非公心。
縣又臺今爲玄武祠故及之

灔水玉詠作

鄆城張伯

灔水復灔水東望鴈行沒。殷勤一杯酒。遙酌隱亭月。永懷紫髯郎。冠佩見突兀。岩岩石青峙。鬱鬱松秀發。
裴回功名會。脫落豪俠窟。中州有士論。指與雷李屈。掛弓須扶桑。洗劍必溟渤。皇天靳美器。一世惜英物。
神交付冥漠。生氣凜毛髮。右來天下馬。萬里入超忽。良樂不竝世。燕市空駿骨。狂歌叫秋雲。北風撼林樾。
雜著五首

稟氣寡所諧。衣食固無端。所業在農桑。甘以辭華軒。田家豈不苦。歲功聊可觀。帶月荷鋤歸。裴回丘隴間。
曖曖遠人村。紛紛飛鳥還。養真衡茅下。庶無異患干。遙謝荷蓀翁。躬耕非所嘆。

守拙歸田園。淹留自無成。長吟掩柴門。遂與塵事冥。素月出東嶺。夜景湛虛明。揮杯勸孤影。杯盡壺自傾。
遙遙望白雲。千載有深情。

榮叟老帶索。原生納決屢。邈哉此前脩。久而道彌著。人生少至百。每每多憂慮。量力守故轍。餘榮何足顧。
棲遲固多娛。幾人得其趣。

桃李羅堂前。霜露榮悴之。咄咄俗中惡。人道每如茲。冬嶺秀孤松。卓然見高枝。提壺撫寒柯。懷此貞秀姿。願留就君住。終身與世辭。

世短意恆多。時駛不可追。感彼柏下人。泫然沾我衣。運生會歸盡。彼此更共之。理也可奈何。一觴聊可揮。酒中有深味。情隨萬化遺。西南望昆墟。靈人侍丹池。我無騰化術。帝鄉不可期。且極今朝樂。千載非所知。

古意一首

七歲入小學。十五學時文。二十學業成。隨計入咸秦。秦中多貴游。幾與書生親。年年抱關吏。空笑西來頻。在昔學語初。父兄已卜鄰。跋鱉不量力。強欲緣青雲。四十有牧豕。五十有負薪。寂寥抱玉獻。賤薄倡優陳。青衫亦區區。何時畫麒麟。遇合僅一二。飢寒幾何人。誰留章甫冠。萬古徒悲辛。

桃李弄嬌嬈。梨花澹丰容。盈盈兩無語。艷艷爭春風。春風何許來。艸木誰青紅。天公亦老矣。何意夸兒童。昨夜花正開。今朝花已空。川流不肯駐。併與繁華東。梗楠千歲姿。骯髒空谷中。陽和不擇地。亦復難爲功。本無兒女心。安用尤天公。

穎谷封人廟

洩洩穎谷雲。瀰瀰穎川水。封君去我久。水雲自清美。人言君善諫。微意得鄭子。特於悔悟時。一語發天理。夫孝動天地。土苴及頑鄙。反身而未誠。善諫且敗矣。如何千載下。乃與茅焦比。我行穎川道。永念負甘旨。願作頽尾鯈。因之日千里。

贈答劉御史雲卿四首

舊聞劉君公學經發源深。驛驅萬里氣。聖途已駿駿。大梁語三日。副我夙所欽。濂溪無比流。此道日西沈。百年牛山木。不復秀穹林。南風雖寥寥。聞絃猶賞音。獨憐夸昆子。一我無古今。共學君所貪。適道我豈任。相酌無別物。徒有好賢心。

阿京吾所畏。早生號能文。初無王家癖。聲光自流聞。此行不虛來。得接大小君。信知珠玉淵。足當羔鴈羣。君家有箕裘。聖學待冊勳。但使本根在。枝葉復何云。殷勤五色筆。未用搖千軍。學道有通蔽。今人乃其尤。溫柔與敦厚。掃滅不復留。高蹇當父師。排擊劇寇讐。真是未可必。自私有足羞。古人相異同。寧復操戈矛。春風入萬物。枯朽將和柔。克己未有加。歸仁亦何由。先儒骨已腐。百罵不汝酌。胡爲文字間。刮垢搜瘢疣。吾道非申韓。哀哉涉其流。大儒不知道。此論信以不。我觀唐以還。斯文有伊周。開雲揭日月。不獨程張儔。聖途同一歸。論功果誰優。戶牖徒自閉。膠漆本易投。九原如可作。吾欲起韓歐。老鶴何許來。澹與孤雲同。相值太虛室。悠然復西東。聖學要深談。惜君別匆匆。何時沂水上。同詠舞雩風。

送欽叔內翰并寄劉達卿郎中白文舉編脩五首

忽忽歲云暮。烈烈風霜威。舉頭望長安。游子從此歸。我有平生懷。愛君如連枝。半年姜肱被。所樂良不貲。尙恨人事異。離合無定時。送君酒一杯。侑以彈鋏辭。上言行路難。下言長相思。六月渡盟津。十月行汜水。風濤脫沉舟。冰雪危墮指。孝子在中野。永念負甘旨。家貧親已老。形療心欲死。古稱季路孝。負米曾百里。顧作鯉與鮎。寧當怨頰尾。君歸不可緩。獻壽迫歲始。遙知慈母心。已爲烏鵲喜。一年不製衣。春服犯霜風。一日僅兩食。腸胃不得充。生平萬里氣。頓入低回中。田夫怒攘臂。縮首甘盲聾。

老兵賜顏色。歡喜無所容。求索厭朋友。勞苦慚僕僮。無聊復無聊。又復招災囚。我有一樽酒。澆君塊磊胸。君年始三十。白髮成一翁。顧以寸心微。受此百慮攻。君窮復何辭。不見閑閑公。文章二百年。不挾四壁空。君性我所諳。我心君所知。凡我之所短。君亦時有之。謀事恨太銳。臨斷恨太遲。持論恨太高。徇俗恨太卑。人道自近始。貧富理不齊。君自不得飽。欲療何人饑。乞醯乞諸鄰。聖哲有明譏。被髮揅鄉人。智者所不爲。且如與人交。交有非所宜。白黑不復擇。豁豁傾心脾。泛愛豈不可。後悔終自貽。又如與人言。寧復無失辭。刺口論成敗。白眼談歌詩。世故教黃閒。能不發其機。聞君作損齋。似覺豪華非懲忿。與室慾百年有良規。與子各努力。歲晚以爲期。

古人遙相望。每恨不同時。同時得古人。歡樂良在茲。君歸豈不佳。交游滿京師。門前車馬來。笑言慰所思。細話洛陽事。高詠嵩山詩。宮壺發新芻。宮梅耿幽姿。故應劉與白。亦復念微之。

飲酒五首

襄城作

西郊一畝宅。閉門秋艸深。床頭有新釀。意愜成孤斟。舉杯謝明月。蓬華肯相臨。願將萬古色。照我萬古心。去古日已遠。百僞無一真。獨餘醉鄉地。中有羲皇淳。聖教難爲功。乃見酒力神。誰能釀滄海。盡醉區中民。利端始萌芽。忽復成禍根。名虛實禍將相。安足論驅驢上邯鄲。逐兔出東門。離官寸亦樂。里社有拙言。
晉陸諭云然

萬事有定分。聖智不能移。而於定分中。亦有不測機。人生桐葉露。見日忽已晞。唯當飲美酒。儻來非所期。此飲又復醉。此醉更酣適。徘徊雲間月。相對澹以默。三更風露下。巾袖警微濕。浩歌天壤間。今夕知何夕。

離官寸亦樂

後飲酒五首陽翟

少日不能觴少許便有餘比得酒中趣日與杯杓俱一日不自澆肝肺如欲枯當其得意時萬物寄一壺作病知柰何妾婦良區區但媿生理廢飢寒到妻孥吾貧蓋有命此酒不可無金丹換凡骨誕幻若無實如何杯杓間乃有此樂國天生至神物與世作酣適豈曰無妙理混漾莫容詰康衢吾自樂何者爲帝力大笑白與劉區區頌功德

客從崧少來貽我招隱詩爲言學仙好人間竟何爲一笑顧客言神仙非所期山中如有酒吾與爾同歸酒中有勝地名流所同歸人若不解飲俗病從何醫此語誰所云吾友田紫芝紫芝雖吾友痛飲真吾師一飲三百杯談笑成歌詩九原不可作想見當年時

飲人不飲酒正自可飲泉飲酒不飲人屠沽從擊鮮酒如以人廢美祿何負焉我愛靖節翁於酒得其天龐通何物人亦復爲陶然兼忘物與我更覺此翁賢

德禪師清涼草堂

舊隱伊陸巷把茅入宴息新居蘭若峯老屋補漏坼鍾魚有勝氣銚錫無滯迹回頭仙人隊談笑初未隔

結草幾成壞逆旅誰主客道人那許許一笑山月白多生負詩債秋物苦催索遙知得新句崧少爲動色

上人舊隱伊陽伊陽有伊陸巷仙人隊者女几山諸峯名

少林

雲林入清深禪房坐蕭爽澄泉潔餘習高鳥喚長往我無玄豹姿漫有紫霞想回首山中雲靈芝日應長

龍潭

層冰積浩蕩陵谷互吞吐窈窕轉幽壑突兀開淨宇回頭山水縣亦復墮塵土孤雲鐵梁北宇宙一仰俯
風景初不殊川塗忽脩阻寒潭海眼淨默黑自太古蟄龍何年臥萬國待霖雨誰能裂蒼崖雷風看掀舉
山中人歲旱則轉大石入潭以駭龍城息故云

麥歎

借地乞麥種微倖今年秋乞種尙云可無丁復無牛田主好事人百色副所求盼盼三百斛寬我飢寒憂我夢漆南川平雲綠油油起來望河漢旱火連東州四月艸不青吾種良謾投田開一大息此歲何時周向見田父言此田本良疇三歲廢不治種則當倍收何如落吾手羊年變鷄猴身自是旱母咄咄將誰吾貧有濫觴賢達未始羞單衣適至骭一劍又蒯綫焉知寄食餓不取丞相侯作詩以自廣時用商聲謳

北邙

驅馬北邙原踟蹰重踟蹰千年富貴人零落此山隅萬塚不復識榛莽餘龜趺賢愚同一盡感極增悲歎粵人惟物靈生也與道俱一爲物所眩遂爾迷厥初蛻骨幾山丘百年不須臾歸盡固其理文喪亦已愚陳迹有足悲柰此萬化途焉知原上塚不有當年吾

龍門雜詩二首

石樓繞清伊塵土天所恨人言無僧久草滿不復剗灘聲激悲壯山意出高蹇當年香山老掛冠遂忘返

高情留詩軸。清話入禪版。誰言海山去。蕭散仍在眼。
溪寒不可涉。倚杖西林晚。不見木庵師。胸中滿泥塵。
西窗一握手。大笑傾冠巾。青山有佳招。一游負因循。
老筇動高興。萬景森前陳。乾元先有期。清伊亦知津。
細看潛溪樹。高臥香山雲。學詩二十年。鈍筆死不神。
乞靈白少傅。佳句儻能新。遙遙洛陽城。梅花千樹春。
山中有忙事。寄謝城中人。

豐山懷古

豐山一何高。古屋蒼烟重。開門望吳楚。烏去天無窮。
連山橫巨蟹。白水亘長虹。川原鬱佳氣。自古南都雄。
炎精昔季興。臥龍起隆中。落落出奇策。言言揭孤忠。
時事有可論。生晚恨不逢。漢賊不兩立。大義皎日同。
吳人操等耳。忍與分河潼。奪操而與權。何以示至公。
一民漢遺黎。尺地漢故封。守民及守土。天地與相終。
不能禦寇讎。顧以寇自攻。既異鴻溝初。又非列國從。
一券損半產。二祖寧汝容。端本一已失。孤唱誰當從。
至今有遺恨。廟柏號陰風。舊聞清冷淵。天籟如撞鐘。
山經野人語。誕幻欺孩童。開元有亂階。鹿飲溫泉宮。
黃猿何爲者。乃爾能肅兇。乾坤之大音。久鬱理當通。
清霜旦夕落。佇爾驚羣聾。

乙酉六月十一日雨

一旱近兩月。河洛東連淮。驕陽佐大火。南風捲黃埃。
草樹青欲乾。四望令人哀。時時恠事發。雨雹如李梅。
我夢天河翻。崩騰走雲雷。今日復何日。駛雨東南來。
音崖書生如老農。苦樂與之偕。閭閻聞吉語。一笑心顏開。
西年酒如漿。乾溢安能裁。唯當作高廩。多具尊與罍。
家人咲問我。君田安在哉。駛雨與快同音見魏志

示姪孫伯安

伯安入小學，穎悟非凡兒。屬句有夙性，說字驚老師。見汝挾書歸，憶我青衿時。青衿昨日耳，齒髮忽如茲。讀書誤人多，闊疎亦天資。元無倚天劍，可斷扶桑枝。倚梯望青冥，愚者知笑之。壯事已無取，老謀欲何施。幸此掌中孫，未染如素絲。就令好紙筆，門戶誰當支。我有商餘田，汝壯可耘耔。便當學種樹，未用城南詩。

伯安方讀韓集
符讀書城南集

種松

百錢買松羔，植之我東牆。汲井涴塵土，插籬護牛羊。一日三摩挲，愛比添丁郎。昨宵入我夢，忽然變昂藏。昂藏上雲雨，慘澹含風霜。起來月中看，細鬢錯針芒。惘然一太息，何年起明堂。鄰叟向我言，種木本易長。不見河畔柳，顧盼百尺強。君自作遠計，今日何所望。

虞卿麻長官成趣園二首

鑿池水交流，築羣山四繞。衡門在人境，三逕深以悄。中庭八九樹，晨坐聽百鳥。人生信多慮，長寢容未了。虛舟有天游，我定物自擾。豈不與世竝，自是萬物表。達觀無不可，言外當意曉。

蹉跎匡山游，爛漫彭澤酒。慨然千載上，懷我平生交。夫君負奇節，劍氣鬱星斗。爲吏非所堪，徑去如避走。王官唐以還，寂寥蓋已久。柴車君來隱，清風動林藪。至今溪上詩，往往在人口。淵明不可作，此士寧復有。

雜詩四首

相士如相馬，滅沒深天機。區區銅馬法，徒識牝與驪。人言當塗公，惡人知其微。如何許邵語，受之不復疑。

知人固不易。人亦未易知。媸妍在水鏡。鉛粉徒自欺。孰爲仁義人。未假已不歸。伯樂不可作。思與曹瞞期。世事如大弩。人若材官然。乘勢易發機。非時勞控弦。又如大水中。置彼萬斛艤。雖有帆與檣。亦須風動天。不見周公瑾。弱齡已飛騫。不見師尚父。鷹揚在華顚。彼非生而材。此豈晚乃賢。鐵基喻智慧。要必有待焉。嘆息狂馳子。嘗爲愚者憐。

崑山有璞玉。外質而內美。唯其不自衡。故與頑石齒。和也速於售。再獻甘滅趾。在玉庸何傷。惜君兩足耳。堂堂明堂柱。根節幾歲寒。使與蒲柳同。扶廈良券難。我衣敝縕袍。我飯苜蓿盤。天公方試我。劍鋏勿妄彈。采杞

仙苗不擇地。榛莽散秋實。微霜綠未隕。濃露紅欲滴。方書尙服餌。僮僕課采拾。花葉久已厭。功實從此得。苦荼薦奇味。凡醞化靈液。人傳東坡事。世驗西河術。誑口亦自佳。輕骨況可必。維物多似是。致用相萬一。向非觀玉篇。誰爲分杞棘。

宿菊潭

田父立馬前。來赴長官期。父老且勿往。問汝我所疑。民事古所難。令才又非宜。到官已三月。惠利無毫釐。汝鄉之單貧。寧爲豪右欺。聚訟幾何人。健鬪復是誰。官人一耳目。百里安能知。東州長官清。白直下村稀。我雖禁吏出。將無夜叩扉。教汝子若孫。努力逃寒飢。軍租星火急。期會切莫違。期會不可違。鞭朴傷汝肌。傷飢尚云可。天闕令人悲。

觀浙江漲

一旱千里赤。一雨垣屋敗。浙故以江名。暴與衆壑會。初驚沙石捲。稍覺川谷隘。雷風入先驅。火塊供一噠。千帆鼓前浪。萬馬接後汎。崩崖不暇顧。拔木無留礙。憑陵如藉勢。洄洑各有態。平分乍舒徐。怒觸忽碎壞。雲蒸楚樹杪。雪映商嶺背。髡髮千丈潮。悅與海門對。飲飛聞蛟鱸。燃犀出鱗介。陽侯富陰族。萬首露光恠。翠蕤澹偃蹇。鉦鼓亂砌磕。永懷疏鑿力。重歎神禹大。乾坤海爲壑。未礙變橫潰。納汙非無處。流惡聊自快。投詩與龍盟。滌瀦煩一再。時拜大赦五日矣

鶴雀崖北龍潭

層崖闕頑陰。水木深以阻。湍聲半空落。淘淘如怒虎。風生木葉脫。魄動不敢語。何年渾沌竅。靈物此棲處。初從一線溜。開鑿到神禹。雲雨鼓飛浪。噴薄齊萬弩。藏珠驪龍領。百斛快一吐。油油入無底。細散不濡縷。歸藏海有穴。汎溢愁下土。南峯天一柱。萬古鎮幽府。江山有奇探。落景迫行旅。多勉茹芝人。終年看飛雨。

五松平

竹港晨露白。石門秋氣寒。湍流落澗壑。細路深茅管。江平白石出。竟日汎清灣。四顧不見人。山鳥時間關。蒼崖入地底。烟靄青漫漫。力盡不能過。卻坐空長歎。青天白雲閑。可望不可攀。虛名竟何得。行路乃爾艱。

阻雨張主簿草堂

濕暑雲氣鬱。漫淫去聲成積雨。南風竊陰機。萬籟困掀舉。飛濤限江岸。懸流迫茅宇。塊坐百慮滋。歸與生鳥羽。兒童十日約。竹馬候門廡。曾是百里程。川途忽遐阻。少游去我久。念子平生語。款段劣可乘。羸餘果何取。河汾敝廬在。坐滯西南楚。世事不可期。客心徒自苦。

贈答楊煥然

詩亡又已久。雅道不復陳。人人握手璧。燕石誰當分。關中楊夫子。高誨世所聞。十年玄尚白。藜藿甘長貧。有來河水篇。四海付斯文。斯文有定在。桓生知子雲。古來知己難。萬里猶比鄰。千人國中和。要非心所親。東楚西南秦。望君勞我神。相逢不得語。別去徒殷勤。白雲不可贈。相思秋復春。

送詩人李正甫

陽和入枯株。靄靄含芳津。山頭太古石。不與萬物春。朝從木客游。暮將山鬼鄰。紫芝僅盈掬。幽蘭不充紝。青雲入長吁。肝膽空輪囷。我嘗讀君詩。天趣觸眼新。察游得豪宕。晉產餘真淳。怒虎不受唾。駭鹿未易馴。安坐誰不如。半生走逡巡。蒼蒼不可問。藐藐誰當親。青山碾爲塵。白日無閑人。空歌東野曲。不採西州貧。

遺山先生文集卷第二

五言古詩

萬化如大路

萬化如大路。物我適相遭。往來限鄰屋。夢寐阻同袍。斷金幾何人。年運劇銷膏。相歡顧不足。爾戈奚暇操。古夾太山名。達觀等秋毫。蠻觸徒能國。螺蠃竟誰豪。曠蕩覽八紜。美惡自爲曹。造物無巧擇。大塊有并包。暴公今在亡。轉燐起蓬蒿。孤心旣悄悄。衆口益嗷嗷。同塵寧當悔。枉已乃爲勞。鹿門有高躅。世網儻能逃。

曉發石門渡湍水道中水經湍音專

踐星澹秋明。陰霞絢朝映。積雨成坐愁。晨光動幽興。石門歸馭引。湍浦漁刀竝。曠蕩萬景新。歸藏四山靜。平湖風瀠綠。遠岸秋沙淨。洋洋遊僊逝。汎汎輕鷗泳。隱顯乖夙心。感寓見真性。倦遊徒自悼。違已將安竟。憂端從中來。茫茫發孤詠。

放言

韓非死孤憤。虞卿著窮愁。長沙一湘壘。郊島兩詩囚。人生定能幾。肺肝日相讎。井蛙奚足論。惲虱良足羞。正有一朝樂。不償百年憂。古來帝王師。或從赤松游。大笑人間世。起滅眞浮漚。曾是萬戶封。不博一棹頭。有來且當避。未至吾何求。悠悠復悠悠。大川日東流。紅顏不暇惜。素髮忽已稠。我欲升嵩高。揮杯勸浮丘。因之兩黃鸝。浩蕩觀齊州。

李道人崧陽歸隱圖

北山范寬筆。老硬無妍姿。南山小平遠。澹若常郎詩。崧陽古僊村。佳處我所知。長林連玉華。細路入清微。連延百餘家。柴門水之湄。桑麻蔽朝日。鷄犬通垣籬。媿我出山來。京塵滿山衣。春風四十日。夢與孤雲飛。可笑李山人。嗜好世所稀。逢人覓詩句。不恤怒與譏。道人本無事。何苦塵中爲。京師不易居。我癡君更癡。山中酒應熟。幾日是歸期。

黃公廟

羈客無恆居。六月走長路。清風黃公祠。地古欣所遇。劍飛素靈哭。龍躍雲雨赴。堂堂文成君。談笑取帝傅。功名要有命。陰相果何預。誰謂圯上人。異事驚竹素。河清不可俟。筋力疲世故。袖間一編書。塵埃嘆遲暮。

學東坡移居八首

廢地三畝餘。十年長蒿萊。瓦礫雜糞壤。白骨深蒼苔。孤客無所投。卽此營茅齋。墾斷豈不苦。寢處亦可懷。辱身賤者事。寧當惜筋骸。伐木荒林中。運甓古城隈。辛勤八十日。吾事乃得諧。買宅必萬錢。一錢不天來。今晨見此屋。一笑心顏開。

誰謂我屋寬。寢處無復餘。誰謂我屋小。十口得安居。南榮坐諸郎。課誦所依於。西除著僮僕。休休得自如。老我於其間。兀兀窮朝晡。起立足欠伸。偃臥可展舒。聰明火焙煖。似欲忘囚拘。屋前有隙地。客舍不可無。花欄及菜圃。次第當耘鉏。東野載家具。家具少於車。我貧不全貧。尚有百本書。故書堆滿床。故物貯滿箱。渾渾商寶函。纍纍漢銅章。杖飾昭敬恭。嚴卯訶犧剛。雷文繞杖節。獸面出佩璜。

私印刻王尊玉斗蛟龍翔逸少留半紙魚網非硬黃亦有墨首帖不辨作鴈行等景容思物宣政舊所藏晉公古漁父浩歌濯滄浪因觀宮騎圖臥馳識提囊谿石含餘潤奚墨凝幽香南榮桂風嚮雲裾珮鏘鏘鏡背先秦書八字環中央讀之三嘆息此日何時光

壬辰困重圍金粟論升勺明年出青城瞑目就束縛毫釐脫鬼手攘臂留空橐聊城千里外狼狽何所託諸公頗相念餘粒分鳧鶴得損不相僕拯土壤巨壑一冬不製衣繪續如紙薄一日僅兩食強半雜藜藿不羞蓬累行粗識瓢飲樂敵寇自信頗亦慤兒啼飯蘿空堅陣爲屢卻滄溟浮一葉渺不見止泊五窮果何神爲戲乃爾雪

舊隱嵩山陽筍蕨豐餽餉新齋浙江曲山水窮放浪乾坤兩茅舍氣壓華屋上一從陵谷變歸顧無復望樵漁憶還往風土夢閑曠悅如悟前身姓改心不忘去年住佛屋盡室寄尋丈今年僦民居臥場礙盆盎靜言尋禍本正坐一出妄青山不能隱俛首入羈鞅巢傾卵隨覆身在顏亦強空悲龍鬢絕永負魚腹葬置錐良有餘終身志懲創

國史經喪亂天幸有所歸但恨後十年時事無人知廢興屬之天事豈盡乖違傳聞入讎敵祇以興罵譏老臣與存亡高賢死兵饑身死名亦滅義士爲傷悲哀哀淮西城萬夫甘伏尸田橫巨璧耳猶爲談者資我作南冠錄一語不敢私稗官雜家流國風賤婦詩成書有作者起本良在茲朝我何所營暮我何所思胸中有茹噎欲得快吐之濕薪烟滿眼破硯冰生颺造物留此筆吾貧復何辭東坡謫黃州符藥行江湖荒田拾瓦礫賤役分僮奴我讀移居篇感極爲悲歎九原如可作從公把犁鉏

我貧公亦貧，賦分無賢愚。論人雖甚媿，詩亦豈不如。

此州多寓士，論年悉肩隨。風波同一舟，奚必骨肉爲。倪家達華白，每釀必見貽。季昌妙琴事，足以相娛嬉。郭侯家多書，篇帙得徧窺。趙子篤於學，間以問所疑。王生舊鄰舍，窮達心不移。千里訪存歿，十口分寒饑。獨有仲通甫，天馬不可羈。直以論詩文，稍稍窺藩籬。永懷王與李，朔漠行當歸。書來聞吉語，報我脫紮維。慚非一狐腋，不直五羖皮。我作野史亭，日與諸君期。相從一笑樂，來事無庸知。

歷下亭懷古分韻得南字

東秦富佳境，北渚擅名談。茲游亦已久，纔得了二三。南山壓城頭，十里奎與函。湫流出地底，城隅滿泓潭。金絲弄晴光，玉玦響空嵌。清漣通畫舫，秀水深雲龜。華峯水中央，鬱鬱堆烟嵐。荷華望不極，綠淨粉紅酣。毒熱非山陽，卑濕無江南。承平十萬戶，他州隔仙凡。刦火土一丘，樹老草不芟。巧盡露天質，到眼皆奇探。千年歷下亭，規摹見覃覃。懷賢成獨詠，勝賞何由參。

舜泉效遠祖道州府君體

重華初側陋，嘗耕歷山田。至今歷下城，有此東西泉。喪亂二十載，祠宇爲灰煙。兩泉廢不治，平漸著瓦礫。填蛙跳平聚浮沫，羊飲留餘蘸。我行歷荒基，涕下何漣漣。舜不一井甃，下者何有焉。帝功福萬世，帝澤潤八埏。要與天地竝，寧待一水傳。甘棠思邵伯，自是古所然。我欲操畚鍤，浚水及其原。再令泥濁地，一變清冷淵。青石壘四周，千祀牢且堅。石渠漱清溜，日聽薰風絃。便爲泉上叟，杯飲終殘年。

與張仲傑郎中論文

文章出苦心誰以苦心爲正有苦心人舉世幾人知工文與工詩大似國手摹國手雖漫應一着存一機不從着看平何異管中窺文須字字作亦要字字讀咀嚼有餘味百過良未足功夫到方圓言語通脊屬只許曠與夔聞絃知雅曲今人誦文字十行誇一目闕顫失香臭瞽視紛紅綠毫釐不相照覲面楚與蜀莫訝荆山前時聞別人哭

濟南廟中古檜同叔能賦

亭亭祠宮檜鬱鬱上雲雨扶持幾來年造物心獨苦青餘玉川潤根入鐵岸古雖含棟梁姿斤斧安得取流湫地中久駭浪思一鼓天柱屹不移水國奠平土乾坤此神物甲乙存世譜瀨鄉留耳孫闕里傳鼻祖秦松徒自汙蜀柏聊共數會待十抱成茲焉重摩拊

銅鞮次村道中

山逕一何惡一澗復一嶺昂頭一握手天放腳百丈井武鄉有便道故繞銅鞮境涉險良獨難又復觸隆景羸驂蹄已穴怨僕氣將瘦與世恆背馳用力何自省河汾紹絕業疑信紛莫整銘石出墳中昧者宜少警少時曾一讀過眼不再省南北二十年夢寐猶耿耿喻如萬里別燈火得對影行役豈不勞聊當忍俄頃

蕭齋并引

故民部長陵蕭公泰和大安之間名德雅望朝臣無出其右其爲太原道漕使時不肖方廁諸生間顧嘗一望眉宇以爲甚幸然亦以齒少且賤不得與橫經之末而爲恨也北渡後居陽平見關中人邢公達談公平生往往色揚而神躍問之知其爲公夫人之猶子也蓋公達之先人於公恩義良厚而公所

以報之者爲甚力。公達初仕部掾，年甫三十，遂爲州上佐，出入臺閣者二十年。雖其材致然亦藉公爲之司命耳。予雅知公達之敬公也。凡欲聞公之故，則就訪之。公達所居之屋，乞名於予，因以蕭齋自之。且爲之說云：士之生世，有一鄉之士，有天下之士，有一人之所私慕，有天下之所共稱，分限所在，不能以強人而人亦不得而強之也。惟公承王公餘烈，奔葉台鼎，世譜完具，與當陽杜氏相上下。故言氏族者，推其貴；出入經史，優柔饜飫，發擿祕奧，不減前輩，蔡無可。故言討論者，服其博；奏讞凝獄，致力忠愛，一言之仁利及永久，故言斷獄者，歸其平。彊禦不奪其操，公相不易其介。幅巾鄉社，坐鎮頽俗，故言進退者，推其高。蓋天下所共稱，非一人之私慕。高山仰止，其誰曰不然？古人有愛蕭子雲筆札者，得蕭之一字，遂以名所居，況於其所天乎？因爲詩以貽公達，有好賢如緇衣者，請爲同賦焉。

十年金門客，一日蓬蒿人。煙煤兩椽屋，因公名字新。昔公無恙時，四海望經綸。敦龐一古儒，風采自名臣。人亡典刑在，百世留清塵。師尊世共然，況予夙所親。愛公入夢想，逶迤見垂紳。教兒多讀書，公言諒諄諄。他時門戶改，亦唯公所姻。我嘗望公顏，道左避朱輪。至今誦其詩，喜色爲津津。歸秦如未老，會買東家鄰。

別李周卿三首

行路澁於棘，單車望千山。歌君歸雲曲，清涕留餘潸。六年河朔州，動輒得謗訕。唯君篤高義，日來款柴關。古交松柏心，今交桃李顏。古人去不返，古道挽不還。相思一樽酒，幽恨寄山間。風雅久不作，日覺元氣死。詩中柱天手，功自斷贊始。古詩十九首，建安六七子。中間陶輿謝，下逮韋柳止。詩人玉爲骨，往往墮塵滓。衣冠語俳優，正可作婢使。望君清廟瑟，一洗箏笛耳。

城居日蛙鼃局促復局促去作山中客放浪誰檢束溪光淡於冰山骨淨如玉懷我同心人團茅住深竹垂綸鮮可食種秫酒亦足石壇三萬丈醉眼天一粟安得萬里風相從兩黃鸝周卿學有淵源東州詩人所說

訓韓德華送歸之作

良朋滿東州歲月見忠悃韓侯晚相值意氣尤懇懇我嘗相斯人趣向識端本立節柏有心樹德蘭在畹官榮睨不顧寄興浮雲蠟今世走名場旗旆幾仆偃賤子本無取玉趾渠往返昨聞途歸養見謂竹林阮暑涂三百里追送不憚遠觀君木訥姿百念爲日損顧方慙衣綢又被以華袞桑榆儻可收歲事在櫨萎里門眼中見歸袖勞重挽鷄黍先有期升堂未言晚渠猶類然

戊戌十月山陽雨夜二首

朔吹作還止雲意鬱以周十月雷收聲陽和自油油此雨非舊雨春旱歷夏秋道路土三尺今朝見浮漚三城信樂土凶年未消憂一蝗食禾盡半菽不易求流民四方來斷港魚蝦稠忍死待一麥秋種且未投乾溢誰所司零墮徧九州醉飽到狐鬼巫覡自懷羞帝命制江湖野語良悠悠龍公爲汝賀桑榆定可收霏霏散浮煙靄靄集微坌出門望白塔但覺襟袖潤繁聲忽赴節細點復成陣久渴宜未厭平已作寧小靳山陽冬候煖麥腳易滋分去土膏入滲漉破粒容可趁此邦信可樂風土同一晉單車我東來塵土滿歸鬟裏糧失先具閉籬困餘客今朝人事改一雨開百順憎窗晚色淨喜極夢爲盡枕上一詩成燈花落紅燼

看山

慘慘悲去國。鬱鬱賦卜居。不采西山薇。卽當葬江魚。今日忽有得。蕩如脫囚拘。青山坐終日。忘讀案上書。臯壤與山林。使我欣然歟。我身天地間。託宿真蘧廬。無窮閱有限。萬期亦須臾。坎止及流行。何計疾與徐。百年險與夷。又似萬里途。良駄馳康莊。九折亦摧車。必惟易之就。遇險當何如。化化復生生。體異理不殊。徐鶯非浴而白。烏豈點而烏。誰續長跕鶴。誰截短足鳧。孔墨不煖席。盜跖華堂居。公車困方朔。木倉飽侏儒。杜子露雙肘。朝參出無驥。軟裘與快馬。照耀輿臺軀。天隨隱笠澤。杞菊供盤盂。擊鮮日爲具。大嚼皆屠沽。乖逢自乖逢。賦分無賢愚。作計窮一我。造物良區區。嚮也憂不足。乃今樂有餘。

九日讀書山用陶詩露淒暄風息氣清天曠明爲韻賦十詩

行帳適南下。居人跔庭戶。城中望青山。一水不易渡。今朝川涂靜。偶得展衰步。蕩如脫囚拘。廣莫開四顧。半生無根著。筋力疲世故。大似丁令威。歸來歎墟墓。鄉閭喪亂久。觸目異平素。粉榆雖尚存。歲晏多霜露。今日復何日。霜氣倏已淒。登高有佳招。山中古招提。翩翩劉公子。王田重相攜。乾坤動詩興。澗壑忘攀躋。霍侯家甚貧。劣有酒與鷄。城居厭鼙鼓。移家此幽棲。世網不易逃。所向皆塵泥。何以濯我纓。林間有清溪。山腰抱佛刹。十里望家園。亦有野人居。層崖映柴門。昔我東岩君。曾此避塵喧。林泉留杖屨。歲月歸琴樽。翁今爲飛仙。過眼幾寒暄。蒼蒼池上柳。青衫見諸孫。踈燈照茅屋。新月入頽垣。二句先人詩也依依覽陳迹。惻愴不能言。

霜氣一匱薄。杳杳秋山空。臨高望煙樹。黃落雜青紅。造物故豪縱。窮秋變春容。錦障三百里。不盡臺山東。

粲粲黃金華。羅生蒿艾叢。野人不知貴。幽香散秋風。秋物自橫陳。顧揖苦不供。誰能搖醉筆。吐句凌清雄。
宇宙有此山。閱世過烏疾。何人不此遊。名姓寧復識。茲辰世所重。前代多盛集。柴桑有故事。二謝留俊筆。
併數孟與桓。此外誰記憶。人生百年內。踏地皆種迹。獨惟我輩人。興懷念今昔。山林與臯壤。自古長太息。
賞心古難并。暮景日易費。故人成此游。尊酒重相慰。新詩互醻唱。清談見滋味。鱸鯢方偃蹇。龍鼴共騰沸。
懸險劇褒斜。清渾雜涇渭。爭教十圍腹。滿貯憂與畏。情親到真率。寧復轉喉諱。鄭重伯雅生。藉汝聊吐氣。
往年在南都。閑閑主文衡。九日登吹臺。追隨盡名卿。酒酣公賦詩。揮灑筆不停。蛟龍起庭戶。破壁春雷轟。
堂堂鬚御史。痛飲益精明。亦有李與王。玉樹含秋清。我時最後來。四座頗爲傾。今朝念存歿。壯心徒自驚。
我在正大初。作吏浙江邊。山城官事少。日放浙江船。菊潭秋華滿。紫稻釀寒泉。甘腴入小苦。幽光出清妍。
歸路踏明月。醉袖風翩翩。父老遮我留。謂我欲登僊。一別半山亭。回頭餘十年。江山不可越。目斷西南天。
吾山一何高。清涼屹相望。龍頭出自白塔佛。屋壓青嶂雲光見。秋半旭日發毫相。峩峩寶樓閣。金界儼龍象。
鄉曲二十年。香火闕瞻向。金花香綿草。夢想雲雨上。福田行欲近。重爲詩酒障。終當陟層巔。放眼天宇曠。
紫微老仙伯。少日見承平。甲子五百餘。雙瞳益清明。披莊不盈尺。翛然澹無營。庭柯挂秋蔬。老樹風泠泠。
我有年德尊。公深鄉曲情。思得菊潭酒。爲公制頽齡。作詩語同游。明年復尋盟。看翁九節杖。翩翩上崢嶸。

留月軒

文室何所有。琴一書數冊。花竹結四鄰。繁陰散芳澤。閑門無車馬。明月卽佳客。三人成邂逅。又復得驩伯。
驩伯屬我歌。蟾兔爲動色。商聲隱金石。桂樹風索索。乾坤月與我。光滅卽生魄。元精貫當中。寧有天壤隔。

卯君尙奚待。言論累數百。多談令人厭。坐睡驚墮幘。一笑鶲未鳴。虛窗自生白。

梨花海棠二首

梨花如靜女。寂寞出春暮。春工惜天眞。玉頰洗風露。素月澹相映。蕭然見風度。恨無塵外人。爲續雪香句。孤芳忌太潔。莫遣凡卉妬。

妍花紅粉粧。意態工媚嫵。窈窕春風前。霞衣欲輕舉。金槃渺華屋。國艷徒自許。依依如有意。脉脉不得語。詩人太冷落。愁絕殘春雨。

趙吉甫西園園名種德

王城比民居。近市無閑田。閑田八九畝。乃在城西偏。久矣瓦礫場。莽爲狐兔阡。高人一留顧。老木生雲烟。築屋臨清流。開窗見西山。人境偶相值。遂無城市喧。趙侯嗜讀書。兀坐守遺編。性情入吟詠。古澹無妖妍。酸醜與世殊。至味久乃全。我作別墅詩。請爲子孫傳。耕耘有定業。歉豐屬之天。寧作鹵莽兒。袖手待逢年。汲古先有齋。種德今有園。期君在晚歲。無庸計目前。

臨汾李氏任運堂二首并序

彥仁從軍久厭於事物之累。念欲脫去之而不可得也。故嘗鬱鬱不自聊。求予發藥之。予名其居曰任運堂。且爲賦詩。

官職有何好。凜凜蹈危機。車塵及馬足。捧手仍依眉。棄去何足道。無從脫紩維。不如聽其然。歲晚儻可期。此心未馴初。養虎時飽飢。一爲金石止。坐閱萬物馳。汨泥揚其波。哺糟釀其酴。漁父我所學。靈均竟奚爲。

上堂壽慈親。兄弟如壇籬。菽水足致樂。況有甘與肥。人生天地間。長路有險夷。遇險卽欲避。安得皆通達。
君家此山翁。百世留清規。樂天而知命。行矣君何疑。北山翁彥仁之伯祖泰和間以高道提點天長胥華公贈詩有百世清規之語故及之

履危恨無機。避禍欣有策。後慮徒自密。前路寧汝測。七戰歿牖下。坐談得刺客。周身容孔智。伐樹不宋厄。
九折怯乘險。瘴海悲遠謫。就令家長安。獨不死牀簷。人生多憂畏。年壽幾至百。惄惄首尾間。天宇坐成窄。
重泉青雲梯。平地黃土陌。乖逢有定在。拙計徒巧擇。行樂當及時。莫待頭雪白。

黃士陁見初學記奴僕門

題張左丞家范寬秋山橫幅

層崖闊長陰。細逕緣絕巘。梯雲欄干峻。廓廓清眺展。斜陽半天赤。飛鳥大江遠。清霜張秋氣。草樹生意剪。
風雷研堅敵。旗旆紛仆偃。崢嶸峯巒出。莽蒼林薄晚。盤盤范家筆。老懷寄高蹇。經營入慘澹。得處乃蕭散。
嵩丘動歸興。突兀青在眼。何時臥雲身。團茅遂踈嬾。

宿張靖田家

壽陽地屬

川涂盡坡陀。嶺路入荒梗。微茫望煙火。向背得廬井。殘民安朴陋。倦客喜幽屏。兒童聞叩扉。租吏有餘警。
兩崖紛藪薄。砂石立頑礦。湍流落空嵌。百折不容駛。山深饒風露。夜氣淒以耿。園花澹相望。邊月空照影。
深居苦不早。素髮忽垂領。誰謂林野人。茲焉惜清景。

曲阜紀行十首

荒城臥魯甸。寒日澹平蕪。千年秦王宮。突兀此城隅。我昔入小學。首讀仲尼居。百讀百不曉。但有睡成珠。
少長授魯論。稍與義理俱。攝齊念升堂。壞壁想藏書。翩翩七十子。佩服見舒徐。慨然望闕里。日思膏吾車。

五原東北晉。因循迫桑榆。今日復何日。南冠預庭趨。隱隱金石聲。悅如夢清都。偉哉神明觀。欣幸當何如。殿屋刲火餘。瓦礫埋荒基。入門拜壇下。儼然想光儀。憶當講授初。佩服何逶迤。登降幾何人。鸞鳳相追隨。千年仰階級。天險不可躋。文杏誰此栽。世世傳清規。植根得所託。在木將何知。

堂堂魯三檜。培植出天巧。規摹欲十抱。奇秀供百繞。誰言甲戌亂。煨燼入炎燎。青煙千雲上。羣鶴空自矯。哀哀嶧陽人。腸肺痛如攢。魯郊木何限。名取唯一少。神明信扶持。厄運豈易曉。零臺滿荒榛。達宮餘曲沼。紛紛閭成壞。何異晏與早。道存有汙隆。物齊無壽夭。霜皮眼中見。鬱鬱自塵表。君看太山石。萬古青未了。陋巷陋復陋。老屋在人境。門前軒蓋多。閉戶自幽屏。近郊無百畝。負郭纔半頃。餧粥聊自供。取足唯一井。此井閱千歲。清節傳箕穎。尙想瓢飲初。至味久益永。德鄰與周旋。聖域容造請。貧中于此樂。日暮獨何炳。泓然窺古甃。一勺試甘冷。上池果能神。轉盼得深省。塵埃竟何有。素髮忽垂領。共學誰我容。從之抱脩綆。泮宮何所有。舞雩但荒臺。泮水涸已久。北風捲黃埃。碩瞻魯公宮。感極令人哀。獻馘亦盛事。規摹到平淮。作計萬萬古。而今安在哉。獨愛鼓瑟翁。不與三子偕。宗周方訖籙。聖師獨卷懷。但欲春服成。風乎詠歸來。我亦淡蕩人。涉世寡所諧。浴沂行有日。一笑心顏開。

大姦何所如。猰貐雄且猛。雖然弭耳伏。擇內會。一騁卵也不敗露。名與聖師竝。天刑竟莫逃。不待七日頃。曹瞞盜漢璽。僅得保腰領。與卯均小人。脫網乃差幸。小偷學不至。適足汚鍵鼎。不從市朝肆。必就遠方屏。兩觀餘坡陀。萬世示頑曠。神兵慄可怖。過者宜少倣。不見講堂處。指似存世譜。遺基洙泗間。荒惡餘十畝。聖師旣已老。自衛歸在魯。正樂脩六經。卒業此其所。

當時季路室完整逮建武太僕忠且壯持用方禦侮如何唐盛日一廢不重舉中和天地位寧復俟庭廡所嗟世道衰師授日莽鹵空餘千歲井默黑照終古

白塔表佛屋萬瓦青粼粼何年勝果寺西與姬公鄰塔廟恣汝爲豈合魯城闈魯人惑異教吾道宜湮淪許行學神農未耜手自親當時子孟子直以爲匪民況彼桑門家糞壞待其身一朝斷生化萬國隨荆椿孟氏非所期安得楊與荀丹青贊神化舊染爲一新坐令鍾魚地再睹籩豆陳吾謀未及用勿謂秦無人天地有至文六籍留聖謨聖師極善誘小智祇自愚文章何物技不直咳唾餘操戈競虛名望塵拜高車所得不毫髮咎責滿八區公論懸日星豈直小人儒喻彼夫相者悵不知所如指南一授轡聖門有脩途陽光照薄暮尙堪補東隅悠哉發深省洒掃今其初

林墓連魯城方廣十里間林間百草具棘刺死不蕃楷槐作橫理青青閱千年懷人成一慨何止召公賢博陵石翁嫗名字無留鐫兩獸墓前物歲久乃訛傳昨我游魯門規作孔林篇聖人與天大聖道難爲言所見不一記來者何述焉詩成私自媿小子良斐然

寶嚴紀行

陰崖轉清深秋老木堅瘦城居望已遠步覺脫氣垢寶嚴夙所愛丈室方再叩曛黑纔入門徑就石泉漱遙遙金門寺寶焰出岩竇我豈無盡公昔見今乃又同來二三子寢飯故相就況有杜紫微琴筑終雅奏瞳瞳上初日深樾燭穿漏逶迤陟兩巘萬里若迎候絕壁三面開仰看勞引脰兩山老突兀屹立柱圓覆諸峯出頭角隨起隨偃仆不可無煙霞朝暮爲先後橫亘連巨鱉飛墮集靈鷲九華與奇巧五老失渾厚

想當位置初。遂欲雄宇宙。太行有谼谷。勝絕無出右。大似塵外人。眉宇見高秀。哀湍下絕壑。電擊龍怒闌。崩奔翻雪窖。瑩滑瀉瓊甃。窮源得懸流。偉觀駭初遘。憊人寶樓閣。白雨散簷溜。天孫拂機絲。素錦絢清晝。永懷登高賦。意匠困馳驟。窘於游暴秦。百說不一售。林間太古石。稍復杯飲舊。已約銘窪尊。細鑿留篆籀。茲山緣未了。僧夏容宿留。終當丐餘年。奇探盡雲岫。

鴈門道中書所見

金城留旬浹。兀兀醉歌舞。出門覽民風。慘慘愁肺腑。去年夏秋旱。七月黍穡吐。一昔營幕來。天明但平土。調度急星火。逋負迫捶楚。網羅方高懸。樂國果何所。食禾有百螣。擇肉非一虎。呼天天不聞。感諷復何補。單衣者誰子。販糴就南府。傾身營一飽。豈樂遠服賈。盤盤鴈門道。雪澗深以阻。半嶺逢驅車。人牛一何苦。岳祠齋宮夜宿

煌煌德寧宮。望秩年祀永。唐來幾焚蕩。規制仍峻整。龍旂嚴黼座。金扇散光燭。嶽拜行且周。偉觀竊欣幸。青紅留壞壁。兵衛自馳騁。木杪見龜趺。雄筆映鍾鼎。中和昔喪亂。已溺寧再拯。有來鴈門公。赤手探虎鯁。經營入慘澹。灑落出鋒穎。凶豎竟自摧。神鑒益彪炳。青山閱人代。今古一炊頃。摩挲盤根槐。甲子誰記省。竭來石門道。煙岫接雲嶺。霄漢瞻上階。濃碧插秋影。青林雨聲集。懸瀑激奔猛。森然心魄動。冰雪淒以耿。飄颻想僊袂。飛下玉蓮井。昨夢知是非。復此造真境。妙香淨餘習。灝氣發新警。鶴書來何遲。素髮迫垂領。玄壇展衰步。似欲逐幽筭。高柯月紛紛。裴回惜清景。

示程孫四首

并州望南宮東南千里餘六年念兒女鬢鬢心不舒程孫問安否一月兩寄書老我倦出門況是涉畏途鞍馬二十日而色爲焦枯白兄應見笑此行亦區區

吾女在吾家先以安卑弱雖然適貴門一味甘儉薄財廉出仁讓語省見端慤婦道化一州母女皆願學州人聞我至相與喜且愕謂我六十翁齒髮未衰落擊鮮日爲具和氣動城郭爲說壻女賢宅相知有託乃公私有賀一月醉杯杓生女四十年今有爲父樂

直孫年志學玉立無纖瑕簡孫甫勝衣芳蘭苗其芽粲粲彩翠翔鵠雛映朝霞諸孫獻公壽喜極復長嗟吾母河南君閨門靜無譁殷勤教女孫乃今成汝家老我何足道外舍儘得誇

會聚樂不貲言別悽以惻風雲動老懷車馬見行色明年吾六十家事斷關白唯當近酒醕亦復拋書冊提攜兩童子款段或下澤玉雪念吾孫未覺千里隔乘興徑一來鬚增當速客

九月初霖雨中感寒痺作

留飲工作祟臂股半風淫風淫喜陽景旬浹坐秋霖兒寒益跳梁衰暮苦難任病枕怯遙夜破窗風露深兩年魏大名千門嚮霜磯客行足繪纊家居但踈衾絢絲不易得候蟲徒自吟無衣思南州傷哉非獨今

同白兄賦餅中玉簪

畏景衆芳歇仙葩此夷猶冰姿出新沐娟娟倚清秋昨夢今見之風鬟玉搔頭誰言閨房秀高情渺林丘碧筵古銅壺一室香四周懷人成獨詠遠思徒悠悠

野史亭雨夜感興

私錄關赴告求野或有取秋兔一寸毫盡力不易舉衰遲私自惜憂畏當誰語展轉天未明幽窗響踈雨

哭延孫

兒生去年冬閏里日相慶今年迫周晬疹痘俱已竟爛班綴錦衫未與玉雪稱宅相望此孫惜愛均氣命一宵誰奪去遽有亡辜橫情鍾未難忘力挽將安勝憶昔點粧初季女抱臨鏡灼灼芙蓉花澹與清波映霜風入芳渚瘦綠餘荷柄嬌紅耿在眼百喚不一應寂寞空鏡前老眼淚如逝

贈鶯

鄰牆擁高樹深樾蔭衡宇山禽十百種晨夕所棲處獨愛黃栗留姪姹如稚女笑啼啼又笑宛轉工媚嫋依窺凝欲下轉盼忽驚舉花暗柳陰陰尙記兒時語詩家此尤物名字喧樂府天真累絲竹客服仍楚楚宮額畫眉闊黛黑抹金縷恨不掌上看毛羽得細數山城無與樂好鳥亦求侶時將貰珠來有唱當和汝

讀書山月夕二首

層崖多古木細路深莓苔柴門開曉日雲際青山來靜中有真趣孤賞何悠哉久旱雨亦好既雨晴亦佳胡床對明月樹影含清華牆東有洿池欹枕聽鳴蛙

遺山先生文集卷第三

七言古詩

虞坂行

丙子夏五月將南渡河道出虞坂有感而作

虞坂盤盤上青石。石上車蹤深一尺。當時騏驥知奈何。千古英雄淚橫腮。龍蟠於泥易所歎。麟非其時聖爲泣。玄龜竟墮余且網。老鳳常飢竹花實。天生神物似有意。驗以乖逢知未必。若論美好是不祥。正使不逢何足惜。孫陽駢驥不竝世。百萬億中時有一。乃知此物非不逢。轍下一鳴人已識。我行坂路多閱馬。敢謂羣空如冀北。孫陽已矣誰汝知。努力鹽車莫稱屈。

畫馬爲邢將軍賦

大宛城下戰骨滿。驚駘入漢龍種藏。將軍此紙何處得。便覺房駟無光芒。人中馬中兩勍敵。天門鴈門皆戰場。并州父老應相望。早晚旌旗上太行。

秋蚕

室人篋中無寸縷。一箔秋蚕課諸女。朝來飼卻上馬桑。隔簾仍聞竹間雨。阿容阿璋墨滿面。晝徹灰城前致語。上無蒼蠅下無鼠。作贊直須如瓮許。東家追胥守機杼。有桑有稅吾猶汝。官家恰少一絢絲。未到打門先自舉。

南溪

南溪酒熟清而醇。北溪梅花發興新。前年去年花下醉。今年冷落花應噴。梅花娟娟如靜女。寂寞甘與荒
山鄰。詩人愛花山亦好。幽林穹谷生陽春。風鬟義義一尺雲。芳香幽臥如相親。山堂夜半北風惡。一點相
思愁殺人。

送郝講師住崇福宮

郝平人

大方之家幾知津。郝君七十老斲輪。書文五車喙三尺。劇談混沌今猶神。太玄博士爲絕倒。君言夸矣天
公嗔。長安冠蓋羅青雲。洛陽車馬爭紅塵。恠君掉頭不肯住。寂寞來作由東鄰。崧高維岳古所秩。三十六
帝有外臣。玄都石壇待驛馭。宮殿突兀松輪囷。上界僊人鄧雲山。洞天治所名司真。蓬萊方丈去不遠。明
星玉女時相親。瑤華可擷蘭可紝。煙霞永隔塵中人。黃鵠一去不復返。白鷗萬里誰能馴。爲我殷勤謝鄧
君。玉華歲晚當平分。

范寬秦川圖

張伯玉歿後同
麻徵君知幾賦

亂山如馬爭欲前。細路起伏蛇蜿蜒。秦川之圖范寬筆。來從米家書畫船。變化開闢天機全。濃澹覆露清
而妍。雲興霞蔚幾千里。着我如在峩嵋嶺。西山盤盤天與連。九點盡得齊州煙。浮雲未清白日晚。矯首四
顧心茫然。全秦天地一大物。雷雨湧洞龍頭軒。因山分勢合水力。眼底廓廓無齊燕。我知寬也不辨此渠
寧。有筆如脩椽。紫髯落落西溪君。長劍倚天冠切雲。望之見之不可親。元龍未除湖海氣。李白豈是蓬蒿
人。愛君恨不識君早。乃今得子曾中秦。作詩一笑君應聞。予七年前過鄆城。伯玉知予來而都無賓主意。予亦偃蹇而去。爾後雖願交而鬢歿矣。未嘗不以爲恨也。今日子思兄弟出此圖求予賦詩。酒惡無聊中。勉爲賦此。畫本米元章家物。有韓子蒼題名。元章以爲中立。而元暉以爲中正。以予觀之。此特張鬢曾中物耳。知者當不以吾言爲過云。

赤壁圖

馬蹄一蹴荆門空。鼓聲怒與江流東。曹瞞老去不解事。悞認孫郎作阿琮。孫郎矯矯人中龍。顧盼叱咤生雲風。疾雷破山出大火。旗幟北捲天爲紅。至今圖畫見赤壁。髡髮燒膚留餘蹤。令人長憶眉山公。載酒夜俯馮夷宮。事殊興極憂思集。天澹雲闊今古同。得意江山在眼中。凡今誰是出羣雄。可憐當日周公謹。憔悴黃州一禿翁。

寄答溪南詩老辛愿敬之

五年不喚溪南渡。日夕心馳洛西山。中今日見君詩。惆悵良辰又相悞。龍蛇大澤變風景。虎豹天門鬱煙霧。丈夫不合把鉏犂。青鬢無情忽衰素。平泉漫作窮愁志。笠澤休題自憐賦。長安正有五侯鷗。骯髒誰能作樓護。青燈老屋深蓬蒿。蝙蝠掠面莎鷄號。劍歌夜半激悲壯。松風萬壑翻雲濤。區區墓上曹征西。我知姍媿王東臯。人生只有一杯酒。螟蛉贏安能豪。

西園

興定庚辰八月中作

西園老樹搖清秋。畫船載酒芳華遊。登山臨水祛煩憂。物色無端生暮愁。百年此地旛車發。易水迢迢鴈行沒。梁門回望繡成堆。滿面黃沙哭燕月。熒熒一炬殊可憐。膏血再變爲灰煙。富貴已經春夢後。典刑猶見靖康前。當時三山初奏功。三山宮闕雲錦重。璧月瓊枝春色裏。畫欄桂樹雨聲中。秋山秋水今猶昔。漠漠荒煙送斜日。銅人攜出露槃來。人生無情淚沾臆。麗川亭上看年芳。更爲清歌盡此觴。千古是非同一笑。不須作賦擬阿房。

愚軒爲趙宜之賦

心生心化誰搏控。舉世僂僂皆大夢。百年只辦作朝三。爭識羣狙先汝弄。人人具此清淨眼。妄瞽無根嗟自種。天機嗜欲涇渭雜。道念紛華鄒魯閔。令人却澹愚軒愚。一蹴藩籬開廓空。聲去愚軒虛室久生白掌上精真元自洞氣。徒神火俱長物。豈有古方傳魯宋。人言此眼本無負。死恨冥行人所共。智愚何預阿堵中。或者桔槔賢抱瓮。病瘡能指跛能履。眉睫雖存寧復動。我云俗士蔽一曲。全笑不全從古衆。渠儂六鑿日相攘。內不鏘銖徒外重。守宮緣壁夸覆射。懸虱如輪規命中。天和一洩不知止。膏火自焚良可痛。從教自此方相多。纔與瞽師論伯仲。先生真是有道者。老境一愚聊自送。五官止廢而神行。就令有眼將無用。寄謝諸方五味禪。葛籐莫作金鏡頌。

雙峯競秀圖爲參政楊侍郎賦

江烟霏霏雲拂石。山木蕭蕭山鬼泣。江岸人家失南北。兩峯突兀何許來。元氣淋漓洗秋碧。畫家晴景費經營。共愛移山入杳冥。安得北風吹雨去。倚天長劍看崢嶸。

西窗

西窗鳥聲千種好。樹陰離離動微風。青山滿前掩書坐。欲話懷抱無人同。花枝不笑綠鬢改。尊酒自與黃金空。少年樂事揔消歇。落日澹澹天無窮。

二十五日鶴

九龍岡上玄元祠。人言尊像神所遺。年年二月降靈鶴。來無定數有定期。城頭曉露生新警。萬首望穿雲

際影不知濁世誰下臨。只許霜毛見脩整。石壇花落松風冷。戛然長鳴人語定。百年鰲老誇見聞。萬里黃冠赴靈應。只從游騎突重圍。城郭併與人民非。可憐陵殿荒墟裏。無復當年丁令威。

聞欽叔在華下

翰林僊人詩酒豪。平生稽阮參遊遨。山中草棘滿霜雪。可惜渠家宮錦袍。聞君忍飢讀離騷。思之不見心爲勞。舉頭西望忽大笑。太華落落長庚高。

閻商卿還山中

阿卿去月從我來。今日西山成獨往。野人不是城中物。澗飲巖棲夢餘想。翰林濕新爆竹聲。待詔履穿沾雪行。蘭臺從事更閑冷。文書如山白髮生。孤燈靜照寒窗宿。北風夜半歌黃鸝。田家閉門風雪深。梅花開時酒應熟。半世虛名不療貧。棲遲零落百酸辛。憑君莫向山中說。白石清泉笑殺人。

女几山避兵送李長源歸關中

山骨稜稜雪花白。北風不貸單衣客。與君此別欲何言。若箇男兒不湮阨。相濡相喞尚可活。轢釜何曾厭求索。從知鮫鱸無隱鱗。芥視三山需一擣。自古飢腸出奇策。漢廷諸公必動色。見君軒蓋長安陌。

雪後招鄰舍王贊子襄飲

去年春旱百日強。小麥半熟雨作霜。青山無情不留客。單衣北風官路長。遺山山人伎倆拙。食貧口衆留他鄉。五車載書不堪煮。兩都覓官自取忙。無端學術與時背。如瞽失相。徒悵悵。今年得田昆水陽。積年勞苦似欲償。隣牆有竹山更好。下田宜稌稻亦良。已開長溝掩烏芋。稍學老圃分紅薑。宋公能詩雅好客。勸

我移家來水旁。一閑入手豈易得。夢中我馬猶玄黃。君不見并州少年作軒昂。鷄鳴起舞望八荒。夜如何其夜未央。賣刀買犧未厭早。腰金騎鶴非所望。河南冬來已三白。土膏墳起如蜂房。崧山東頭玉旆出。父老知是豐年祥。南溪酒熟梅花香。高聲爲喚墻東玉。便當過我取一醉。聽歌長安金鳳凰。鄭舍宋可字予州少年謂李汾長源長安金鳳凰之隱君子也并舍人所歌

半山亭招仲梁飲

孤城鬱鬱山四周。外人乍到如蠱囚。半山亭前浙江水。只可與君消百憂。江山百年有此客。雲樹六月生涼秋。世上紅塵爭白日。一丘一壑去來休。

鄧州城樓

鄧州城下湍音水流。鄧州城隅多古丘。隆中布衣不復見。浮雲西北空悠悠。長鯨駕空海波立。老鶴叫月蒼煙愁。自古江山感游子。今人誰解賦登樓。

宛丘嘆

秦陽陂頭人迹絕。荻花茫茫白於雪。當年萬家河朔來。畫出牛頭入租帖。蒼髯長官錯料事。下考大笑陽城拙。至今三老背腫青。死爲逋懸出膏血。君不見劉君宰葉海內稱。饑摩寒拊哀孤惄。碑前千人萬人泣。父老夢見如平生。冰霜紈綺渠有策。如我碌碌當何成。荒田滿眼人得耕。詔書已復三年征。早晚林間見鷄犬。一犁春雨麥青青。萬斛百姓爲之立碑頌德賢不肖用心相遠如此李之後十年予爲此縣大爲逋賦所困辛卯七月農司檄予按秦陽陂田感而賦詩李與劉皆家宛丘故以宛丘嘆命篇

游黃華山

黃華水簾天下絕。我初聞之雪溪翁。丹霞翠壁高歡宮。銀河下灌青芙蓉。昨朝一游亦偶爾。更覺摹寫難爲功。是時氣節已三月。山木赤立無春容。湍聲洶洶轉絕壑。雪氣凜凜隨陰風。懸流千丈忽當眼。芥蒂一洗平生智。雷公怒擊散飛霆。日腳倒射垂長虹。驪珠百斛供一瀉。海藏翻倒愁龍公。輕明圓轉不相礙。變見融結誰爲雄。歸來心魄爲動蕩。曉夢月落春山空。手中仙人九節杖。每恨勝景不得窮。攜壺重來岩下宿。道人已約山櫻紅。

巨然松吟萬壑圖

曾中刺鯁無九澤。畫裏風烟纔一漚。阿師定有維摩手。斷取江山着筆頭。石林蒼蒼崖寺古。銀河浩浩松聲秋。方外賞音誰具眼。莫將輕比李營丘。

密公寶章小集

天東長白大寶幢。天河發源導三江。有木蔽映山朝陽。云誰巢者雛鳳凰。雲間吐氣日五色。百鳥不敢言文章。名都盤盤魏大梁。黃金甲第羅康莊。王家書絕畫亦絕。欲與中祕論低昂。密公書院無絲簧。窗明几潔凝幽香。元光以後門鑰廢。文士稍得連壺觴。客來喜色浮清揚。典衣置酒餘空箱。生平俊氣不易降。眼中俗物都茫茫。淵明素琴稽阮酒。妙意所寄誰能量。在昔武元握乾綱。扶桑爲弓射八荒。獵取大國如驅羊。取一作兩民風朴魯資贊疆。文治未及武尅剛。興陵之孫越王子。天以人瑞歸明昌。十三執經侍帝傍。十八健筆陵阿房。擣腸文字五千卷。靈臺架構森鋪張。高陽苗裔襲衆芳。胡不置之貢玉堂。袖中正有活國手。

地下纔得脩文郎。悲風蕭蕭吹白楊。丘山零落可憐傷。承平故態眇猶在。拂拭寶墨生輝光。恰似如庵連楊坐。一甌春露澹相忘。明昌寶玩羣玉中祕內府圖書印也。越邸有柳公權紫絲鞋。歐率更海上楊凝以自號也。又所居有如庵詩集。號如庵小藁。越王諸子惟擣軒贊甚。典衣沽酒。非其比故。予詩及之。擣軒公識賞超詣亦之句。蓋實錄云。甲午三月二十有一日爲輔之書于聊城至覺寺之寓居。

荆棘中杏花

牆東荒蹊抱村斜。荆棘狼藉盤根芽。何年丹杏此留種。小紅殲殲爭春華。野人慣見謾不省。獨有詩客來。咨嗟天真不到鉛粉筆。富艷自是宮闈花。曲池芳逕非宿昔。蒼苔濁酒同天涯。京師惜花如惜玉。曉檐賣徹東西家。杏花看紅不看白。十日忙殺遊春車。誰家園亭有此樹。鄭重已着重幃遮。阿嬌新寵貯金屋。明妃遠嫁愁清笳。落花繁縝拂床席。亦有飄泊沾泥沙。天公無心物自物。得意未用相陵誇。黃昏人歸花不語。唯有落月啼栖鴉。

太白獨酌圖宣和所藏。

李伯時筆。

謫仙去世三百年。海中鯨魚渺翩翩。豈知龍眠天馬筆。忽有玉樹秋風前。金鑾歸來身散僊。世事悠悠白髮邊。會稽賀老何處在。千里名山入酒船。清景已隨詩句盡。風流合向畫圖傳。往時長安酒家眠。焦遂不狂張不顛。想得三更風露下。醉和江月弄江煙。

松上幽人圖

宋宗婦曹夫人仲婉所畫。上有曹道冲題詩。

秋風謾謾松樹枝。仙人骨輕雲一絲。不飲不食玉雪姿。竹宮月夕頻望祠。竟不下視齋房芝。人間女子乃

得之眼中擾擾昨暮兒畫圖獨在羲皇時予懷渺兮幽林思

送張君美往南中

南朝辭臣北朝客棲遲零落無顏色陽平城邊握手不似銅驅洛陽陌去年春風吹鴈迴今年鴈逐秋風來春秋風鴈聲裏行人日暮心悠哉長江大浪金山下吳兒舟船疾於馬西湖十月賞風煙想得新詩更瀟洒

戲題新居二十韻

去冬作舍誰資助縣侯雅以平原故賢郎檢視日復日規制從頭盡牢固南風一夕怪事發突兀赭垣殘半柱乞漿得酒過初望曲突徙薪忘後慮長淮千里燕巢林明月一枝烏遙樹東家老屋西北走衆木技擰留少住由來馬隊非講肄況與彘牢通過路聚廬託處何暇擇重爲主人推獎悞夏秋之交十日陰抱被倚門愁旦暮君問新居在何許只去火餘纔數步學宮分地與閑冷使館有牆遮雜汙就中此宅尤費手官給工材半傭顧十寒一暴半載強纔得安床置鐙釜紛紛暗被兒女笑老虎般彪今幾度晉中廣廈千萬間天地一身無着處北來衣冠日枯槁十九桃符傍門戶乾坤血肉得此身剩有把茅能勿懼上方下比良易見好惡且當隨所遇仰看片瓦聊自賀疾過岩牆寧反顧合歡明日召諸鄰狼籍盃盤從飽吐

贈蕭鍊師公弼

吾家阿京愛公弼吾家澤兄敬公弼半生夢與公弼游豈意相逢在今日春風和氣在眉宇玉壺冰鑑藏
骨臚人間萬事君自知未必君材人盡識蘇門水木無纖埃聞君家近公和臺仙家近日多官府黃帽青

鞋歸去來。

時汰佛甚急故云老家

云

送弋唐佐童彥寬南歸

且爲潞府諸公一笑

河汾續經名自重附會人嫌迫周孔史臣補傳久已出浮議至今猶洶洶薛收文志誰所傳貴甚竹書開汲冢沁州破後石故在爲礎爲砾吾亦恐暑涂十日來一觀面色爲黧足爲腫淡公淡癖何所笑但笑弋卿堅又勇自言浪走固無益遠勝閉門親細冗摩挲石刻喜不勝忘却崎嶇在岡隴路人本淡新有杜淡事重重非一種有人六月訪琴材不爲留難仍從臾懸知蠟本人渠手四座色揚神爲竦他時記籍社中人流外更想增一董。

蕭仲植長史齋

脩作武

張顚飲豪傾四座脫帽狂呼誰敢和南宗北宗知幾人醉眼紛紛飛鳥過是公技進不名技元氣淋漓隨咳嗽偶然捉筆本無意自有龍騫并虎臥當時誰有戰國策長史帖云借戰國策可付之凡七字門外雷車忽驚墮天星無數不知名色正芒寒纔七箇蕭郎家世陵谷後爭信空囊蓄奇貨蕭齋故事今復舉未怕秋風吹屋破謾持有物世共喜不獨一時爲子賀藏舟夜壑未厭深隄備有人來倚拖。

送宋省參并寄潞府諸人

茅齋團團蝸殼大苦被傍人嘲塞破官豪眼孔十萬縉未與書生供一睡長衫只辦包瘦骨故紙何緣變奇貨不因三致大耳兒老雪屯門甘凍臥國中腐鼠凡幾嚇玉上強蠅非一箇荆人美璞刖之招君足幸存仍可賀雲間太行青在眼上客歸來傾四座因君寄問社中人前日淡公行復過

覓神霄道士古銅爵

雷章著土紛朱碧。秋菌春蒲人不識。若非儀狄墓中來。應自杜康祠下得。古人我得酒之傳。摸索飲器流
饑涎巧偷豪奪吾何敢。他日酬君九府錢。

賦澤人郭唐臣所藏山谷洮石研

研有銘云王將軍爲國開臨洮有司歲餽可會者百鉢萬其於中國得用者此研材也研作壁水樣

舊聞鸚鵡曾化石。不數鶻鶩能瑩刀。縣官歲費六百萬。纔得此研來臨洮。玄雲膚寸天下偏。壁水直上文
星高。辭翰今誰江夏筆。三錢無用試鷄毛。

贈休糧張鍊師

金砂霧散風雨疾。一點黃金鑄秋橘。中林宴坐人不知。野鹿銜花蜂課蜜。富兒盤饌羅羶葷。擾擾飛蠅復
聚蚊。見說西山好薇蕨。一枝青竹願隨君。

天井關

石燈盤盤積如鐵。牛領成創馬蹄穴。老天與世不相關。玄聖栖栖此迴轍。二十年前走^去大梁。當時塵土
困名場。山頭千尺枯松樹。又見單車下太行。自笑道塗頭白了。依然直北有羊腸。

遺山先生文集卷第四

七言古詩

讀書山雪中

前年望歸歸不得。去年中途中腳無力。殘生何意有今年。突兀家山墮眼前。東家西家百壺酒。主人捧觴客長壽。先生醉袖挽春迴。萬落千村滿花柳。山靈爲渠也放顛。世界幻入兜羅綿。似嫌衣錦太寒乞。別作玉屑粧山川。人言少微照鄉井。準備黃雲三萬頃。何人辦作陳瑩中。來與先生共炊餅。陳先生貶官後答京事。今年好雪明。年炊餅大耳。

題商孟卿家明皇合曲圖

海棠一株春一國。燕燕鶯鶯作寒食。千古萬古開元日。三郎搦管仰面吹。天公大笑噴不得。寧王天人玉不如。番綽樂句不可無。宮腰不按羽衣譜。疾舞底用牧豬奴。風聲水聲闕清都。夢中令人羨華胥。何時卻竝宮牆聽。不恨將身作李墓。

過晉陽故城書事

惠遠祠前晉溪水。翠葉銀花清見底。水上西山如臥屏。鬱鬱蒼蒼三百里。中原北門形勢雄。想見城闕雲煙中。望川亭上閱今古。但有麥浪搖春風。君不見繫舟山頭龍角禿。白塔一摧城覆沒。薛王出降民不降。屋瓦亂飛如箭鏃。汾流決入大夏門。府治移着唐明村。只從匡屏失光彩。河洛幾度風煙昏。東闕蒼龍西

玉虎金雀觚稜上雲雨。不論民居與官府。仙佛所廬餘百所。鬼役天財千萬古。爭教一炬成焦土。至今父老哭向天。死恨河南往來苦。南人鬼巫好機祥。萬夫畚鍤開連岡。官街十字改丁字。釘_去聲破并州渠亦亡。幾時卻到承平了。重看官家築晉陽。

蟾池

老墓食月飽復吐。天公一目頻年瞽。下界新增養蟾戶。玉斧誰憐脩月苦。郡國蟾池知幾所。碧玉清流水仙府。小蟾徐行腹如鼓。大蟾張頤怒於虎。渠家眉間有黃乳。膏梁大丁正須汝。何人敢與月復讎。疾過池頭不容語。向來屬私今屬官。從今見墓當好看。爬沙卽上青雲端。

贈答張教授仲文

秋燈搖搖風拂席。夜聞嘆聲無處覓。疑作金荃怨曲蘭畹辭。元是寒螿月中泣。世間刺綉多絕巧。石竹殷紅土花碧。窮愁入骨死不銷。誰與渠儂洗塞乞。東坡曾次丹青國。天孫繰絲天女織。倒鳳顛鸞金粟尺。裁斷瓊綃三萬疋。辛郎偷發金錦箱。飛浸海東星斗濕。醉中握手一長嗟。樂府數來今幾家。剩借春風染華髮。筆頭留看五雲花。七言長詩於中獨一句九言
韋郎有此例
長吉亦有此例

高門關

高門關頭霜樹老。細路千山萬山繞。亂餘村落不見人。霰雪霏霏暗清曉。莘川百里如掌平。閑田滿眼人得耕。山中樹蘗亦不惡。誰遣多田知姓名。許李申楊竟何得。只今唯有石灘聲。許致忠
湯臣申伯勝
李常名宦
四家隱
盧氏時
以多田推之亂後
俱不知所在矣

甲辰秋洛陽得黃葵子種之南庵明年夏六月作花佛經所謂閻浮檀金明靜柔軟令人愛樂者此花可以當之因爲賦長韻予方以病止酒故卒章及之

芳蕤浥露嬌黃濕五疊湘裙輕襞積晨粧午醉一日間白白紅紅揔狼籍上陽宮女要頭冠摹寫雖工破的難看來明淨復柔軟花中乃有閻浮檀千里移根洛陽陌主人不飲誰看客乞與金盃自傾側明年爲渠當舉白

馬嶺

仙人臺高鶴飛度錦綉堂傾去無路人言馬嶺差可行比似黃榆猶坦步石門木落風颼颼僕夫衣單望
南州臯落東南三百里鬢毛衰颯兩年秋予去歲往河南遷奉亦取黃榆嶺路

雲峽井序

君璋啓事西涼占對稱旨其還也行臺公以宣和寶石爲覲奇秀溫潤信天壤間之尤物君璋因之曰雲峽邀詞客賦詩予亦同作

石盆清冷貯秋水水面蒼煙飛不起一堆寒碧几研間寶氣崢嶸插箕尾中山雪浪空影像長安鸚鵡僧紈綺枉着奇章甲乙中槁項纔堪把耕來不知天壤此尤物鬼刻神剗通有幾薰蒸似欲出泉脈瑩滑定應凝石髓剝裂雯華漬月秋辛苦詩儂費摹擬車箱箭筈連西東仇池百穴牕玲瓏飛墮不嫌靈鷲小奇探已覺太湖空故都喬木今如此夢想熙春百花裏膏血綱船枯九州亡國愁顏爲誰洗主人天質粹以溫天然與山作知聞退食從容北窗臥今古起滅真浮雲仙人王子可賦石深有裂雯華漬月秋之句

雲巖并序

觀州倅武伯英，崞縣人。少日舉進士，有詩名。其賦剪燭刀，有啼殘瘦玉蘭心吐，蹴落春紅燕尾香之句，甚爲時輩所稱。家故饒財，第宅園亭爲河東之冠。貯書有萬卷樓，嘉花珍果悉自他州移植，爲人多技巧。山水雜畫，斲琴和墨，皆極其工。嘗得宣和湖石一竈，穿漏殆若神劙鬼鑿，炷香其下，則煙氣四起，散布盤水上，濃澹霏拂，有煙江疊嶂之韻。吾鄉衣冠家法書名畫，及藏書之多，亦有伯英相上下者。伯英獨恃寶石，以擅奇汾晉間耳。興定末，伯英歿於關中，楊戶部叔玉購石得之，壬辰圍城中以示予，且命作詩。危急存亡之際，不暇及也。乙巳冬十一月來東平，過聖與張君之新軒，而此石在焉。聖與名之曰雲巖。予問石所從來，聖與言夏津王帥得之汴梁泥塗中，而以見貽。予因歎一物之微，經歷世變，遷徙南北，乃復爲好事者之所寶玩，似偶然，乃爲詩道其故。聖與三世相家，以文章名海內，其才情風調，不減前世賀東山晏叔原，故卒章以蕭閑秀峰故事屬之。

壺中九華玉屏顏，紫煙著水往復還。小窗虛明澹相對，不數漢官銅博山。會稽禹穴深無底，寶石偷來定山鬼。一堆寒碧殊不凡，滿谷春雲更堪喜。阿欣秀發見眉宇，小杜才情淪骨髓。摩挲不作几上看，繚白紆青便千里。渾沌日鑿餘空嵌，漏天蒸濕饒風嵐。世外元無種香國，海南真有補陁巖。觀州愛玩頻渝敝，民部平生幾薰沐。藏舟夜壑未厭深，竟作新軒坐中物。一天星月入金尊，翠射娉婷自有人。只欠宣和鄭先覺，爲君留寫五湖真。

劉遠筆

老槐力能舉玉杵。文陣挽強猶百鈞。惜哉變化太狡猾。嚮也褐衣今虎文。宣城諸葛寂無聞。前後兩劉新。
冊勳謝郎神鋒恨太雋。雖然豈不超人羣。三錢鷄毛吐皇墳。尖奴定能張吾軍。何時酌我百壺酒。爲汝醉草垂天雲。見麻姑傳

贈周良老

于公斷獄多平反。高門大車在乃孫。我居聊城欲二載。喜見周叟醇而溫。十年大理書上考。宜有陽報如于門。大兒書來問安否。兵饑不死天所存。鄭孫毛骨殊秀發。寶氣鬱鬱含朝暾。機聲嘔啞聒朝昏。種瓠五石當酒尊。是翁福祿知未艾。昆弟和樂連株根。白髮阿兄應念我。南雲寂寞賦招魂。

鴻溝全欽叔賦

劉郎著手乾坤了。未害與渠分九州。夸兒衣綉自楚楚。作計豈復西鴻溝。雌雄自決已無策。尺寸必爭唯上流。韓生已死言猶在。千載令人笑沐猴。

雪中自洛陽還嵩山

道人薄有塵外緣。迫人塵埃私自憐。三十六岑一茅屋。夢裏西家掠社錢。津津喜色見眉宇。義義青城當眼前。蹇驢徑入風煙去。恰是梅花欲雪天。

祖唐臣愚庵

小智胠篋盜所羞。大智移國鬼與讎。浮生匹絹兩盂粥。心計擾擾知何求。青州荊州冤三窟。古人今人貉

一丘喚起羅池柳夫子。與君同醉訾家洲。

過井陘

北山亭亭如驛堠。南山耽耽虎翹首。土門東頭望井陘。漢家風雲自奔走。市人豈識英雄材。金鼓一朝天
上來。此山行人萬萬古。幾不磨滅隨蒿菜。白鹿祠前一杯水。蒼顏聊爲洗塵埃。

北岳

太茂淮嶽古帝孫。大朴未散真巧存。乾坤自有靈境在。地位豈合他山尊。中原旌旗白日暗。上階樓觀蒼
煙屯。誰能借我兩黃鵠。長袖一拂玄都門。

天涯山

九州上游推大齒。獨恨山形頗椎魯。天涯一峯今日看。快似昂頭出環堵。何年氣母此融結。鬼鑿神鑿未
奇古。八窗玲瓏透朝日。洞穴慘澹藏雷雨。苔花錦石粲可喜。乞與雲烟相媚嫵。半空擲下金芙蓉。想得飛
來自玄圃。傳聞絕頂更靈異。云是清都羣玉府。五雲飛步吾未能。風袂冷冷已輕舉。東州死愛華不注。向
在陋邦何足數。敬亭不着謝宣城。斷岸何緣北天姥。酒船何時朝復暮。倒卷滹沱浣塵土。喚起山靈搥石
鼓。漢女湘妃出歌舞。詩狂他日笑遺山。飯顆不妨嘲杜甫。山川石
神祠

智仲可月下彈琴圖

莫春舞雩鼓瑟希。琴語解吐曾中奇。誰言手揮七絃易。大笑虎頭真絕癡。北風瀟蕭路何永。流波湯湯君
自知。三尺絲桐儘堪老。兒童休訝鶴書遲。

常山姝生四十月能搦管作字筆意開廓有成人之量喜爲賦詩使洛誦之

大兒小兒舞商羊。東家西家捉迷藏。牙牙作羣鴈。鴈行是中乃有常山郎。常山嬌嬌可憐蟲。四歲未有三歲強。黑鷹破殼自神駿。黃犧放腳須跳梁。只知見紙卽塗抹。誰謂轉腕能低昂。渠家兩公破天荒。劉輝夢靈果專場。榮鄉亭中詩版在。岐山名字香。山香此郎晚出西樞房。虎穴虎子不可當。天驚地怪見落筆。便合抱送中書堂。文星煌煌照燕南。青青子衿滿恆陽。教官連被鳳尾諾。瑞物多生金粟岡。兒曹變化不作難。何必二十始乖張。明年作字一丈大。當有稜角垂光芒。迴頭卻看元叔綱。鼻涕過口尺許長。常山白寓叔綱遺山之季子也。

贈利州侯神童生十四月識字予見時二十一月識字無筭

牙牙點粧杏蕾紅。阿兄抱之來學宮。今春學語語未正。已能見書識姓名。隨指隨讀無數重。多生想會文字中。極知之無不足訝。更恐洛誦難爲功。土中松粒龍爪脫。萬牛丘山起豪末。君不見黃金寶鼎翡翠青。未要春宮許衣鉢。人聞失卻麻神童。明星煌煌出蒼龍。只知江陵圖籍盡一火。誰謂死草生華風。遺山老子未老在。見汝吐焰如長虹。兒字金鼎

奚官牧馬圖息軒畫

曹韓畫樣出中秘。燕市死骨空千金。息軒筆底真龍出。凡馬一空無古今。安閑自與人意熟。蕭洒更覺天機深。奚官有知應解笑。世無坡仙誰賞音。

紫微劉文山水爲濟川賦

畫家李范真勍敵方外只今誰第一。自非劉宗祭酒阜昌孫未信僂翁輕落筆。長洲遠浦各清冷。萬頃風煙一草亭。千章古木散巖谷。鶴髮松姿餘典刑。紙尾不須題姓字。人人知是老人星。

王右丞雪霽捕魚圖

江雲滉滉陰晴半。沙雪離離點江岸。畫中不信有天機。細向樹林枯處看。漁浦移家魄未能。扁舟蕭散亦何曾。白頭歲月黃塵底。笑殺高人王右丞。

跋酒門限邵和卿醉歸圖

邵伯祿之父

邵翁頭白甫三十。高吟大醉無虛日。風流若似靖南湖。每恨聞名不相識。太平村落自由身。童稚扶攜意更真。醉歸圖上見顏色。喜溢眉宇猶津津。好着蹇驥馱我去。與君同醉杏園春。

題張彥寶陵川西溪圖

松林蕭蕭映靈宇。爍石流金不知暑。太平散人江表來。自訝清涼造仙府。不到西溪四十年。溪光林影想依然。當時膝上王文度。五字詩成衆口傳。忽見畫圖疑是夢。而今塵土浣華顛。本送字今改作浣字陵川涼境界也江淮太平散人題詩東廟自己造仙府恨居民不知其樂耳此縣先君子舊治宴游西溪僕以童子侍焉彥寶出此圖求賦詩感今懷昔爲之愴然故篇中有及癸丑十一月三日題

汝州倅韓君德華。其十二世祖相遼。封魯公。故名其伯男子曰魯。王父命氏古蓋有之。予過其家。命魯出拜。謂予言魯名矣。而未有字。敢以爲請。予字之世公。德華曰。願終教之。乃申之以辭。昌黎諸韓散盧龍。魯公相遼開邑封。鴈行先後六侍中。大參高文紀神功。龜石穹窿與天終。百年故家餘素風。汝州有子今成童。攷古制名龜策從。貴以道義飭汝躬。良璞不治凡石同貞而絕俗。孰予容濟質以

文介而通。顧雖宗起其起宗，魯也不慚袁氏公。

壬子冬至新軒張兄聖與求爲兒子阿平制名。予名之曰琥。以仲耽字之。小字明復。有善禱之義焉。詩不工。當令阿耽灑落誦之。

阿平玉雪絕可憐。皎如鶴雞下青田。呼來拜客攏不前。啼聲如聞過秦篇。陳王人門漢韋賢。新軒文筆尤翩翩。大弨掛壁誰使然。我知一經會有傳。玄武之冬客須城。問平之年纔五齡。迺公爲兒求制名。兒名從虎玉與并。仲耽爲字以字行。佛書舊說無空青。豈知空青今有形。紫公紫公還我明。看兒着腳青雲平。

世宗御書田不伐望月婆羅門引。先得楚字韻。

瑞光樓前按歌舞。桂樹秋香月三五。白頭誰解記開元。四海歡聲沸簫鼓。兩都秋色皆喬木。三月阿房已焦土。天上亦有別離情。可是田郎心獨苦。承平舊物霓裳譜。寶氣暉暉映千古。銀橋望極竟不歸。滅沒燕鴻下平楚。

送崔夢臣北上

子真抱關買臣負薪。朝奏暮召名動縉紳。此有志之士。所以自奮於昌辰者耶。夢臣崔卿玉樹清姿。土門華胄。成童授學。與雞俱興。肆筆成書。倚馬可待。雖泌水之洋洋。堪樂舜門之穆穆。方開惜歲月之虛捐。欲雲霄之坐致。遇順風而縱大壑。其孰禦之。登金馬而上玉堂。在此行矣。詩以勸駕。序寧闕乎。癸丑二月望日新興元某序。

并州書郎年少客。細馬金鞭日三百。生平意氣凌青雲。未怕天山雪花白。西園此日盛徐陳。鳳閣鸞臺氣

象新由來草創資潤色況復天造須經綸他日南歸吾未老與君同醉晉溪春

送王彥華

中朝名勝龍山冀喜色門闈得佳婿一朝天府効驅馳萬里青雲在平地金粟岡頭俊造多莫從人品問如何迂齋受學青衿日殷重遺山爲拊摩東國人倫吾豈敢只憑月旦決巍科

李成之王彥華趙孝先以提學命見餉佳酒且求制名輒以詩記

子雲寂寞將誰親延之麤豪意自真君家公婿兩冰玉酒味自合清而醇雲腴俗士無風神紅珠女兒茜裙新一杯香絕韻亦絕只今唯有酴醿春

劉時舉節制雲南

雲南山高去天尺漢家弦聲雷破璧九州之外更九州海色澄清映南極幽并豪俠憲功名咄嗟顧盼風雲生今年肘後印如斗過眼已覺烏蠻平諭蜀如今老矣不妨銅柱有新名

贈張潤之

許年不唱龍津第人物尤難到衰世明堂他日要棟楠造物也須論蚤計晉人稟賦例眞淳兒能讀書知養親遺山門客富儒雅綠髮張郎名姓新莫道琴工有師法海山深絕解移人者而勉之潤之資甚美故就其可致者夫當以風鑒自負矣

許道寧寒溪古木圖

道人醉袖蟠蛟龍掃出古木牙須雄開卷飄飄來陰風翟卿論畫凡馬空能知畫與詩同宗解衣盤礴非

衆工遺山筆頭有關全意匠已在風雲中留待他日不忽忽

送張書記子益從嚴相北上并序

子益省郎觀國之光從公于邁揚雄詞賦良借力於吹噓鄧禹功名本無心於祿仕詩以送別亦以趣其歸云

故家人物饒奇俊聳壑昂霄今已信康侯畫接拜寵光百里自應沾海潤六月貂裘風雪深天河天驅日駿駿莫把聲華動臺閣東方書檄要陳琳

贈別孫德謙

津橋垂楊雪花白挽斷春衫苦留客西湖一雨春意濃絕似銅駕洛陽陌湖亭轟醉臥春風到手金盃不放空鵲山一帶傷心碧羨殺孫郎馬首東

汾亭古意圖

堯民羲皇去未遠日作日息天機全杜侯袖裏姑汾筆辦與南華談胥然廢興知經幾今昔淳朴別有一山川白雲亭上秋風客不比僊翁甲子年元祐以來郭熙明昌泰和間張公佐皆年過八十而以山水擅名今雲中杜丈萃老與張鄭年相若而畫品不下古人爲侯廣道作汾亭古意橫披灑然有塵外意爲題四韻其後神仙張果生帝堯甲子年詩家亦傳習用之故末句有及

太原贈張彥遠

并州城邊十月末清霜棱稜風入骨因君夜話吳江春酒光瀲灩金杯滑閑閑騎驥去滅沒當年愛君俊於鶴平生我亦識翁人惆悵流年如電抹官家新築文昌臺蒼生不憂墮巔崖眼看東閣奇士肅如君豈

得藏蒿菜。晨鶴未鳴子當發。明星煌煌大於月。野夫一笑冠纓絕。

換得雲臺帖。喜而賦詩。

周官武臣奉朝請。劒佩束縛非天眞。世間曾有華陀帖。神物已化延平津。米狂雄筆照萬古。北宗華書纔九人。今日雲臺見遺墨。黃金牢鎖玉麒麟。

鹿泉新居二十四韻

土門西邊井陘渡。野日荒荒下汀樹。榆關石嶺都幾程。客夢往往迷歸路。塵埃風雨半生過。儘着筋骸支世故。寧州假館又兩年。未保東來不西去。山城百家家有山。覲面呈山誰一顧。賣書買得呂氏園。不謂全山舉相付。北崖老作土灰色。擁腫形模一夸父。娟娟正有小娥帽。卻立不容親杖屨。就中抱犢尤峭拔。望見韓山卽攀附。韓王砦頭四望闊。全趙米如纔數聚。眼中塵蓋天上来。泜水鼓旗紛偃仆。漢家威靈萬萬古。石子連岡猶虎距。夏秋衆壑會鹿泉。浩浩湍聲瀉餘怒。西南諸峯不知數。蕩海鯤鱣尻背露。霏煙空翠有無中。百態陰晴變朝暮。靈巖龍泉曾一到。獨欠封龍展衰步。學僊不愛徐童花。李相書籠心所慕。生平懷抱向山盡。老氣崔嵬如有助。巖居枯寂朝市喧。喧寂兩間差有趣。得行固願留不惡。流坎且當隨所遇。何曾萬錢何用許。方丈有山容下篤管。城初無食肉相。黃帽非供折腰具。明年高築野史亭。天已安排看山處。多慙不及謝宣城。標出敬亭天一柱。一本尙慚不及謝宣城。標出敬亭。天一柱。在方丈有山容下篤之下。

過劉子中新居

鄆州城隅兩茅屋。市聲喧喧自幽獨。春風吹盡山杏花。只有青青一叢竹。先生愛畫如惜玉。練鵠翔鸞餘。

百軸大兒跟蹤挾書歸。土銼疎烟纔一粥。微官枉負半生閑。也着區區簿領間。
何時卻與溪南老。紫蓋山前共往還。

子中舊與溪南詩老辛敬之游故有下句

遺山先生文集卷第五

雜言

去歲君遠游送仲梁出山

去歲君遠游今年客它州青天萬古一明月只與行人生暮愁問君游何許情多地遐兮偏處處金鞭斷折驥驥死萬里長鴻思一舉憶初識子梁王臺清風入座無纖埃華嶽峯尖見秋準全眸玉爪不凡材西園日晴花滿烟五雲樓閣三山巔玉樹瑤林照春色青錢白璧買芳年三年一夢南陽道汴水迢迢入秋草攀雲心事人不知千首新詩怨枯槁破屋仰見星疎衾風露清匣中有長劍爲君鳴不平泥途久辱思一濯去去舉足皆清冷鄧州大師材望雄愛客不減奇章公軍中宴酣笳鼓競銀燭吐焰如長虹幕中多士君又往談咲已覺南夷空東州春迴十月後梅華分香入春酒平生得意欽與京青眼高歌望君久浙江南下青沄沄石門細路蒼烟屯五松平頭白日靜千山萬山如亂雲菊源不逐時事改芝嶺自與商顏鄰他日想思一迴首漁舟時間武陵人欽謂欽叔京卽京父也天書以微之爲微

此日不足惜

此日不足惜此酒不可無頗怪昌黎公亦復爲世儒天生至神物與人作華胥一酌舌本疆二酌燥吻濡三酌動高興四酌色敷腴連綿五六酌枯腸潤如酥眼花耳熱後萬物寄一壺十酌未渠央百觚亦奚拘人生一世間忽若過隙駒有酒不解飲問君誰與娛君不見東家騎鯨李膾滿六尺軀萬言黃石策八陣

夔州圖酒酣起舞不稱意。長吁青雲指夷吾。又不見西家紫髯郎。老氣雄萬夫。狂歌飲燕市。擊筑聲嗚嗚。倚天長劍插少室。頗欲四海皆東湖。鷹揚虎視今焉如。河山永隔黃公鑪。啞盃直待秋井塌。青苔白骨憐君愚。少年覓計生白須。捫參歷井無危途。榮不滿睫良區區。就令一朝便得八州督。爭似高吟大醉窮朝晡。餘名安得潤枯骨。四十豈不知頭顱。此日不足惜。此酒不可無。太虛爲室月爲燭。醉到不用春風扶。

送希顏赴召西臺兼簡李汾長源

昨日游崧丘。今日西臺行。勞生好夢亦大少。枕中馬嘶車鐸鳴。山林之樂無虧成。胡爲解蘭縛塵纓。蒼生望君須一起。我知無地逃功名。關中得君作金城。氣象已覺西山平。諸人誰出仲卿右。一座想爲相如傾。風華浩蕩春冥冥。馬頭仙掌遙相迎。長安市上見李白。爲我一醉秦東亭。

嵩山玉鏡

玉鏡見何許。今日東山墮。積雨洗昏霾。旭日發光輝。光輝奪人目。灑灑如動移。初如秋月圓。漸如曙星微。曙星不能久。併與晨露晞。此鏡何從來。造化秘莫窺。山精或寶氣。恍惚令人疑。誰爲問岳祇。山川英秀會。有歸不能生。申與甫瑞王國。萬丈光芒徒爾爲。

虎害

北山虎有穴。南山虎爲羣。目光如電聲如雷。倚蕩起伏山之垠。百人一飽不留骨。敗衣墜絮徒紛紛。空谷絕樵聲。長路無行塵。呀呀垂涎口。耽耽闕城闉。天地豈不仁。社公豈不神。哀哀太山婦。叫斷秋空雲。可憐封使君。生不治民死食民。世上無復裴將軍。北平太守今何人。

飲酒

江南秋泉雲液濃，遼東抹利玉汁鎔。
椰瓢朝傾荔支綠，螺盃暮捲珍珠紅。
此酒誰所留，今日乃汝逢。
仙人一丸藥，洗我芥蒂骨。
金沙一散風雨疾，世事盡與浮雲空。
東家劉伯倫，西家王無功。
醉鄉日月萬萬古，眼中擾擾誰爲雄。
人會有歸盡，飲不飲所同。
所恨獨醒人，百年枯槁中。
獨醒恨未通，獨醉恨未公。
安得清江變醇酎，盡迴天地入春風。

送高信卿

高卿去歲山中居，橡朝栗暮分猿狙。
今年移家入城市，甑中生塵釜生魚。
文窮智亦窮，五鬼更嘯呼。
迺翁延客著上座，兩兒已復遭櫛榆。
三冬兔園冊，牧豎叫語麤。
濕薪烟滿眼，破硯冰生須。
賣符與行藥，不養堂
堂軀。
無衣思南州，千里走單車。
我嘗相夫君，不是山澤臞。
十八學擊劍，二十了陰符。
平生結交王與李，袖
中頗有魚麗圖。
文武志膽誰不如，不能拔劍斫蛟鱷。
亦當赤手降於菟。
胡爲堅坐守寒餓，坐令兒女悲窮途。
萬事糊塗酒一壺。
別時聊爲鼓嚨胡，中原麟鳳今如此。
莫道皇家結網蹠。

寄趙宜之

趙時在盧氏

大城滿豺虎，小城空雀鼠。
可憐河朔州，人掘草根官煮弩。
北人南來向何處，共說疎川今樂土。
華川三月春事忙，布穀勸耕鳩喚雨。
舊聞抱犢山，摩雲出蒼稜。
長林絕壑人迹所不到，可以避世如武陵。
煮橡當果穀，煎朮甘飴餳。
此物足以度荒歲，況有麋鹿可射，魚可罾。
自我來蒿前，旱乾歲相仍。
耕田食不足，又復違親朋。
三年西去心籠禽，念飛騰。
一瓶一鉢百無累，恨我不如雲水僧。
崧山幾來層，不畏登不得，但畏不得。

登洛陽一昔秋風起。羨煞吳中張季鷹。

假志堅畫龍爲劉鄧州賦

豬龍可豢亦可屠。世人畫蛇復畫魚。天飛忽入阿堅筆。始覺衆史欺庸愚。腥風萬里來。白浪橫江湖。一麾走海若。再顧失天吳。浩蕩明河翻。尾鬢慘不濡。只愁紙上出雷火。搏控大千如此珠。天生神物與化俱。滅沒變見何所無。逆鱗自古不受觸。乃今縮頭隨卷舒。怪得堂堂鬚御史。平生長有雨隨車。

送詩人秦略簡夫歸蘇墳別業

三月不見君。渴心欲生塵。論文一樽酒。雅道誰當陳。昨朝見君臨水句。乃知抽青配白非詩人。南山明月北山雲。恨君不作由東鄰。擊鮮爲具非無好事者。天隨杞菊年年新。石田茅屋連蘇墳。兩兒力耕足養親。君詩或者昌晚節。不應道路長逡逡。白髮刀騷一幅巾。豐年鄉社樂閑身。蹇驢駛入醉鄉去。袖中知有眉山春。

紀子正杏園燕集甲午

紀翁種杏城西垠。千株萬株紅艷新。今年寒食好天色。曉氣鬱鬱含芳津。天公自愛此花好。朝薰暮染煩花神。融霞暈雪一傾倒。非烟非霧非卿雲。未聞何所似。乳兒粉粧深絳唇。能啼能笑癡復駭。盡出百子元非真。半開何所似。里中處女東家鄰。陽和入骨春思動。欲語不語時輕顰。就中爛熳尤更好。五家合隊號與秦。曲江江頭看車馬。十里羅綺爭紅塵。陽平一邑多詩豪。主人買酒邀衆賓。花時有成約。恨少楊子張吾軍。落花着衣紅繽紛。四坐慘澹傷精魂。花開花落十日耳。對花不飲花應嗔。愛花常苦得花晚。爭教行

樂無閑身芳苞一破不更合且看錦樹烘殘春

送李參軍北上

五日過居庸十日渡桑乾受降城北幾千里出塞入塞沙漫漫古來丈夫淚不灑別離間今朝送君行清涕留餘濟生女莫作王明君一去紫臺空珮環生男莫作班定遠萬里馳書望玉關我知驥子墮地無齊燕我知鴻鵠意氣青雲端草間尺鶡亦自樂扶搖直上何勞搏一衣敝縕袍一飯茵藉盤歲時壽翁媼團
戀有餘歡就令一朝便得八州督爭似綵衣起舞春欄班去年雒陽人今年指天山地遠馬轡破霜重貂裘寒朔風浩浩來客子慘在顏扼胡嶺上一迴首未必君心如石頑君不見桓山鳥乳哺不得須臾閑衆鶴一朝散孤雌回顧聲悲酸寒鴈來時八九月白頭阿母望君還

王黃華墨竹

爲郭輔之賦

古來畫竹尊右丞東坡歛袂不敢評開元石本出摹寫燕市駿骨留空名亦有文湖州畫意不畫形一爲坡所賞四海知有竇蠅亭深衣幅巾老明經老死不敢言縱橫豈知遼江一派最後出運斤成風刀發硎雪溪仙人詩骨清畫筆尙餘詩典刑月中看竹寫秋影清鏡平明白髮生娟娟略似萱草詠落落不減叢臺行千枝萬葉何許來但見醉帖字欹傾君不見忠恕大篆草書法趙生怒虎嘯墨成至人技進不名技游戲亦復通真靈百年文章公主盟屏山見之跼且擎聲光舊塞天壤破議論今着兒曹輕有物於此鳴不平悲耶嘯耶誰汝令只恐破窗風雨夜怒隨雷電上青冥

汎舟大明湖不至

待杜子

長白山前繡江水，展放荷花三十里。
看山水底山更佳。一堆蒼烟收不起。
山從陽丘西來青一灣。天公擲
下半玉環。大明湖上一盃酒。
昨日繡江眉睫間。晚涼一棹東城渡。
水暗荷深若無路。江妃不惜水芝香。
狼籍秋風與秋露。蘭襟襟鬱散芳澤。
羅襪盈盈見微步。晚晴一賦畫不成。
枉着風標誇白鷺。我時矯鸞追散
仙。但見金支翠蕤相後先。眼花耳熱不稱意。
高唱吳歌叩兩舷。喚取樊川搖醉筆。
風流聊與付他年。

九月七日夢中作詩續以末後一句

桃花紅深李花白。昨日成團今日折。
歌聲滿耳何處來。楊柳青旗洛陽陌。
拊君背。握手朝鍾暮鼓無了期。
世事於人竟何有。青青鏡中髮。忽忽成白首。
六國印何如。負郭二頃田。千載名不及。
卽時一盃酒。

賦邢州鵲山

去時唐山道。望望鵲山背。
今朝西北看平聲奇秀益可愛。
蒼茫失層疊。解駿見繁帶。
浮雲自來去。盡巧寧變壞。
吳粧入小筆。隱隱拂殘黛。
城隅靜女人不知。擁髮依顰如有待。
太行橫截九州半。一掩一重俱有態。
只知天平六峯天下稀。
此山東來亦閑在。
烟埋雨沒今幾時。
殆天所藏予發之。
郭熙未足語平遠。
摹寫誰有韋郎詩。

送王亞夫舉家歸許昌

一日兩食藜藿葵。三冬一褐骭與齊。
監河貢粟困欲死。望望江水滿塵泥。
故書一束手自攜。汎兒跳梁翠
女啼。出門疾走勿反顧。正恐五鬼從之西。
馬中豈是無龍媒。世人徒知牝牡黃與驪。
只如黃金絡頭亦不惡。誰謂茅索能相羈。
天公醉着百不問。汝偶而偶奇而奇。
前途兀兀黑於漆。昨日把笏今扶犁。
乃知世間

倚伏不可料井底容有青雲梯春風兩淮多鼓鼙軍中少年舞荒雞因君南望一大咷落日澹澹青山依

湧金亭示同游諸君

太行元氣老不死上與左界分山河有如巨鱉昂頭西入海突兀已過餘坡陁我從汾晉來山之面目腹
背皆經過濟源盤谷非不佳烟景獨覺蘇門多湧金亭下百泉水海眼萬古留山阿觱沸瀲水源瀠淪晉
溪波雲雷涵鬼物窟宅深蛟竈水妃簾弄明月璣地藏發泄天不訶平湖油油碧於酒雲錦十里翻風荷
我來適與風雨會世界三日漫兜羅山行不得山北望空長噭今朝一掃衆峯出千鬟萬髻高峩峩空青
斷石壁微茫散烟蘿山陽十月未搖落翠蕤雲旛相盪摩雲烟故爲出濃淡魚鳥似欲留婆娑石間仙人
迹石爛迹不磨仙人去不返六龍忽蹉跎江山如此不一醉拊掌笑煞孫公和長安城頭烏尾訛并州少
年夜枕戈舉杯爲問謝安石蒼生今亦如卿何元子樂矣君其歌

南冠行

南冠纍纍渡河關畢逋頭白乃得還荒城雨多秋氣重頽垣敗屋深茅菅漫漫長夜浩歌起清涕曉枕留
餘潸曹侯少年出紈綺高門大屋垂楊裏諸房三十侍中郎獨守殘編北窗底王孫上客生光輝竹花不
實鶴鵠飢絲桐切切解人語海雲喚得青鸞飛梁園三月花如霧臨錦芳華朝復暮阿京風調阿欽才暈
碧裁紅須小杜長安張敞號眉嫵吳中周郎知曲悞香生春動一詩成瑞露靈芝滿窗戶魚龍吹浪三山
沒萬里西風入華髮無人重典鵲羈裘展轉空床臥秋月寶鏡埋寒灰鬱鬱萬古不可開龍劍出地底青
天白日駢雲雷層冰千里不可留離魂楚些招歸來生不願朝入省暮入臺願與竹林嵇阮同舉杯郎食

猩猩唇妾食鯉魚尾不如孟光案頭一杯水黃河之水天上流何物可養人間愁擣霆裂月不稱意更與倒翻鸚鵡洲安得酒船三萬斛與君轟醉太湖秋

醉後走筆

建茶三盃冰雪香離騷九歌日月光腰金更騎楊州鶴雋永不羨大官羊短燈檠子移近床秋風吹簾月轉廊一歌再歌魂魄動入眼渺渺橫沅湘湘妃漸遠望不及金支翠蕤澹飛颺漁父話獨醒孺子歌滄浪山鬼獨一腳拊掌笑我旁湘繫歸來弔故國遺臺老樹山蒼蒼掩書一太息夜如何其夜未央東家女兒繡羅裳銀瓶瀉酒勸客嘗一酌均跖顏再酌齊彭殤宇宙不今古氣節無陰陽少年避酒不肯喫跬步乃有無何鄉愛茶愛書死不徹乃以冰炭貯我腸世間唯有麴生風味不可忘

南湖先生雪景乘驃圖并引

南湖先生原武人年二十許時曾以鄉賦兩魁鄭州然其資倜儻所以自望者甚高終不樂爲舉子計卽棄去學擊刺當正隆征南頗欲馳逐戎行間旣而大定詔書下兵各罷歸先生抱利器而無所試乃浮湛里社以詩酒自娛買田南湖之上築亭種樹徜徉乎其間盡置家事日與賓客酣飲歌管棊槊窮日夕不少休家故饒財又好施予其赴人之急猶疾痛之在己故人尤以此歸之所與游如臨洛王逸賓游宗之大定劉之昂其人皆天下名士至論人物必曰靖達卿今日之奇男子也先生生於天會初歷大定明昌泰和優游於太平和樂之世者五十年大安兵興乃下世平生喜作詩樂府尤有蘊藉觀西子乘瓢詩可見也

溪水自流吳越兵爭竟何
髮鬢蕭颯苧羅秋千古香

得風流輸

湖舟

嘗雪中騎青驃行京水道中作長詩卒章有安得西都畫史吮筆出新意寫作南湖

老子雪景乘驃圖之句其子文煒北渡後來東平始以先生之意追畫此圖求僕賦詩文煒質直好義讀書作文有聲時輩中觀其子可以想見先生之爲人故爲道其事并以致懷賢之思

大河茫茫白連空寒雲迢迢度南鴻汴梁高樓管絃裏成臯行人西北風北風吹雪來飄瞥捲孤蓬異色變慘澹元氣開洪濛襄陽潮陽詩境在掇拾物色真難工青驃誰此游望見知是南湖翁南湖翁少日骯髒今龍鍾猶能吐氣萬丈如長虹閉門兀坐意不懶要看銀海翻魚龍寶華世界瓊瑤宮江山隨翁入清雄詩成仰天一大笑飛花落絮春濛濛鬱鬱梁宋郊翁家出強宗許與必豪右收入等候去聲翁年十八九弄筆學雕蟲疊取兩解魁隱隱何隆隆一旦拂衣去學劍事猿公正隆適南征疋馬走從戎墨瓦磨櫛鼻意與江流東紫微出東方淮海亦來同都將書與劍田間就春農仕宦不作鄙曼容醉鄉自愛王無功鷁鷀從渠致鍾鼓野鶴豈合棲樊籠南湖煙景多魚鳥亦從容亦有兩小船綸竿插舡蓬高亭出秀樾窗戶連青紅清飄隨睡輿暝色赴吟筇門前車馬來日釀日不供但苦佳客少焉知清興終看翁棄瓢詩調戲鴟夷老子如兒童雄吞已覺雲夢小寒縮寧作書生窮當年我得奉談唉晝夜肯放清樽空東家西家不相從南海北海不相逢風流耆舊今誰似惆悵相看是畫中

癸卯歲杏花

南州景氣緩杏花見紅梅讀書山前二月尾向陽杏花全未開待開竟不開怕寒貪睡嗔人催愛花被花惱不徹一日遶樹空千回牙牙嬌語山櫻破稠鬧或團稀作顆小蕾從教絳萼封繁枝未要晴雲裏兩月

不舉酒。半歲不作詩。更教古銅瓶子無一枝。綠陰青子長相思。今年閏年好寒節。花開不妨遲一月。留魚航

作寒節宋方舟先生李知幾語。

題劉紫微堯民野醉圖

蒼苔濁酒同歌呼。白鬚紅頰醉相扶。堯時皇質未全散。不論朝野皆歡虞。望雲雲非雲。就日日非日。先秦迂儒強解事。極口譽堯初未識。堯民與酒同一天。此外更誰爲帝力。仙老曾經甲子年。戲將陳迹畫中傳。山川淳朴忽當眼。迴望康衢一慨然。不見只今汾水上。田翁鞭背出租錢。堯甲子年仙張果事

贈答趙仁甫

仁甫名復雲夢表奇士也。

我友高御史。愛君曠以真。昨朝識君向。所見勝所聞。江國辭客多。玉骨無泥塵。軒昂見野鶴。過眼無羈羣。想君夜醉潯陽時。明月對影成三人。散着紫綺裘。草裏烏紗巾。浩歌魚龍舞。水伯不敢嗔。何意醉夢間。失腳墮燕秦。萬世一旦暮。萬里猶比鄰。世無魯連子。黑頭萬蟻徒紛紛。君居南海我北海。握手一盃情更親。老來詩筆不復神。因君兩詩發興新。都門迴首一大笑。袖中知有江南春。

下黃榆嶺

北厓玄武暮。默黑如積鐵。東厓刦火餘。絢爛開錦纈。就中嶺頭一峯凸樸奇。剩費寒雲幾千疊。摩圍可望不可到。青壁無梯猿叫絕。林煙日射彩翠新。跬步疑有黃金闕。畫工智次墨汁滿。那得冰壺貯秋月。直須潮陽老筆迴。萬牛露頂張顛揮。醉帖石門細路無澗泉。行人飢渴挽不前。辛苦黃榆三十里。豈知卻有看山緣。

駢豬行

黃臺張氏莊作。

汾山蒔苗多費力。辦與豪豬作糧食。草菴架空尋丈高。擊板搖鈴鬧終夕。孤犬無猛噬。長箭不暗射。田夫睡中時叫號。不似駢豬似稱屈。放教田鼠大於兔。任使飛蝗半天黑。害田爭合到渠邊。可是山中無橡朮。長牙短喙食不休。過處一抹無禾頭。天明壠畝見狼藉。婦子相看空淚流。旱乾水溢年年日。會計收成纔什一。資身百備栗豆中。儋石都能幾錢直。兒童食糜須愛惜。此物羣豬口中得。縣吏卽來銷稅籍。

嘯臺感遇

裴回五岩上。浩歌彌激烈。望望蟾房翁。倒影乍明滅。池古足靈異。祠廢餘像設。子規夜啼山竹裂。老鶴亂踏枯松折。嘯臺音響杳不聞。蕩蕩青天一明月。荒山破瓦色。十步九窪疊。水泉出沮洳。一綫僅不絕。翁乎何意留此居。可是他山無地穴。太道旣下衰。日鑿聰明開。玉從珪璋毀。木以青黃災。天和散不留。去浪無東迴。咄咄此老蒼。骯髒仰怪魁。堯年生甲子。含德如未孩。標枝野鹿致足樂。火倉屋居良所哀。史筆亦厚誣。何曾棟計識與材。纏身正有一丈髮。直以何物觀形骸。大笑黃冠師。金丹羽化之說何從來。豈知大人先生獨立萬物表。太古元氣同胚胎。不見今日孫公和。橫絕四海隘九垓。嵇康養生安在哉。

水簾記異

癸卯九月四日
吳同杜仲梁賦。

黃華絕境探未窮。道人曾約山櫻紅。鏡臺懸流不易得。世俗名取香爐峯。七年長路今一到。刺鯁欲滿平生曾。豈知旱久泉脈絕。快意一灌無由供。神明白足還舊觀。湧浪爭敢徼靈通。何因狡猾出變化。勝概轉瞬增清雄。天孫機絲拂夜月。佛界珠網搖秋風。稱奇叫絕喜欲舞。恨不百繞青芙蓉。銀橋溝涼巔玉鏡崧

丘東世外果無物。邂逅乃一逢。書生眼孔塞易破。勺水已復誇神功。東坡拊掌應大笑。不見蟄窟鞭魚龍。

谼谷聖燈

九月五日作

金門寺前山突起。并底寶巖三十里。舊聞聖燈在山上。紫微侍郎宜不妄。山空月黑無人聲。林間宿鳥時一鳴。游人燒香仰天立。不覺紫烟峯頭一燈出。一燈一燈續一燈。山僧失喜見未曾。金繩脫串珠散迸。玉丸走杵光不定。飛行起伏誰控搏。華麗清圓自殊勝。北荒燭龍開晦冥。南極入地多異星。豈知心光毫相有真遇。物外恍惚終難憑。腐儒心魄爲動蕩。再拜中庭謝靈貺。何曾辦作劉更生。下照乃辱青藜杖。昨朝黃華瀑流神所憐。今朝金門佛燈佛作緣。紛紛世議何足道。盡付馬耳春風前。

食榆莢

露葵滑寒羊蕨羶。春榆作莢絕可憐。榆令人暝何暇計。田舍年例須濃煎。簫聲吹暖賣餳天。家人鑽火分青烟。長鈎矮籃走童稚。頃刻綠萍堆滿前。炊飯雲子白。剪韭青玉圓。一杯香美薦新味。何必烹龍炮鳳誇肥鮮。鼠肝蟲臂萬化途。神奇腐朽相推遷。夢中鸚鵡亦大樂。隨意飲啄真飛僊。先生捫腹一莞然。此日何功食萬錢。

李峪園亭看雨

龍山右脇松十里。細路蜿蜒繞龍尾。松林迫塞悶煞渠。北望玉泉疑井底。玉泉元自別一天。眼界廓廓無神川。金城百里纔一俯。半尖浮圖插蒼烟。行行下絕巘。招提忽當眼。未到倦不勝。小憩遂忘返。玉泉一杯甘以冽。未須張陸誇冰雪。主人不在客不留。烈風崖下風颶颶。石頭路滑馬路怯。山雨未落雲先愁。將軍

林園永安下秋霽村墟絕瀟洒濃雲壓屋風打頭僅得羈御脫疲馬只知龍山之神神更神永安亦能撼詩人晦暝變化千萬態畫出風雨元非真山靈亦愁歸後夜半面時時見雲罅天瓢細洒供晚涼不似草堂迴俗駕層陰一掃羣峯出一洗深青徹山骨夕陽展放紫翠屏只欠松梢一輪月山中一石迴萬牛況是一壑復一丘不如一詩招將入南州先生興來時臥游

游龍山

曩予魏大梁得交此州雷與劉自聞兩公誇南山每恨南海北海風馬牛老龍面目今日始一見更信造物工雕鏤是時山雨晴平田綠油油並山涼氣多況得通深幽山泉谷口出迎客石罅夏擊琳琅瑯蜿蜒入微行漸覺藤蘿胥衣樹打頭惡木拉颯棲直幹比指稠石門無風白日靜自是林響寒颼颼一峯忽當眼仰看看不休一峯一峯千百峯雖欲一一顧揖知無由金城偃蹇不得上瑤簪回合如相留苦花萬錦石丹碧爛不收天關守虎豹武庫開戈矛小山隨起隨偃仆獨立千仞絕頂縹渺之飛樓百花崗頭藉草坐瀟洒正值金蓮秋亭亭妙高臺玉斧何年修登高攬元化快如鷹脫韁山靈故爲作開闔巧與詩境供冥搜白雲何許來纖絲弄輕柔蓬蓬作霧湧飄飄與烟浮玉衣仙人鞭素蚪翕忽變化令人愁須臾視六合浩蕩不可求初疑陶輪北運甓今悟夜壑真藏舟刾石拂未窮杞國浪自憂斷鰲立極萬古爭遺起滅如浮漚快哉萬里風一掃天四周誰言太始再開闢日馭本自無停轍舉手謝山靈就無清涼毫相非神羞賤子貪名山客刺已屢投黃華挂鏡臺天壇避秦溝太山神明觀二室汗漫游胷中隱然復有此大物便可揮斥八極隘九州玉峯有佳招絕唱須一酬爲君探囊擲下珊瑚鉤白雲相望空悠悠異時華表

見老鶴姓字莫忘元丹丘。

醉中送陳季淵

寒食不數日。天氣殊未佳。翩翩金門客。行行指龍沙。朝發忻城暮隴頭。隴頭地寒無草芽。拂雲堆邊春更晚。雪花茫茫楊白花。紇干山高凍煞雀。榆葉離離小蘿薄。愛君只欲苦死留。不道南飛何所樂。書生弓馬能幾何。乃今寶校金盤陁。孔璋文筆妙天下。敕勒不數陰山歌。向年賦奇雨擁海。駢雲筆頭注。快如懷素書布障。狂笑劉叉寫冰柱。李汾王鬱俱灰塵。天意乃在潁陽陳。舌吐萬里唾一世。眼高四海空無人。殘民假息仍瘡痏。誰作東山謝安起。恨我不比長桑君。一月觴君上池水。眼中之人不易忘。誰作冰炭置我腸。衰顏明鏡兩寂寞。別意春江誰短長。但願年年見顏色。與君連日醉壺觴。

送戈唐佐還平陽

我從商餘之山過厔羅。聞君六經百家富研摩。會最上指冠巍峩。豈肯俯首春官科。覃懷變生十載後。我時避兵方北走。通家戈宋共有無。行輩許之爲老友。晉州一書君肯來。握手大笑心顏開。春風着人不覺醉。快卷更須三百杯。鶴骨騫飛法當壽。況是丹房藥鏡留。心久崑崙神泉浸。朾芝乞與餘膏潤。衰朽天府學士登瀛洲。松頂仙人垂直鉤。愛君直欲抵死留。自言世事非所求。千古黃金鑛中淚。不獨盧仝并馬異。蘇州韋郎交分深。香山白傅金玉音。借渠兩詩寫我心。相知非不多。但苦心不同。同心一人去。坐覺長安空。離愁何從生。生從情愛中。不見行路人。拂袖自西東。汾流滔滔兮。日千里。青眼高歌吾老矣。寶豐山中

唐佐嘗從程內翰天益問學於此

游泰山

泰山天壞。嶧屹如鬱蕭臺。厥初造化手。辦此何雄哉。天門一何高。天險若可階。積蘇與累塊。分明見九垓。扶搖九萬里。未可誣齊諧。秦皇憺威靈。茂陵亦雄材。翠華行不歸。石壇滿蒼苔。古今一俯仰。威極令人衰。是時夏春交。紅綠無邊涯。奇探忘_去聲。登頓意愜自遲回。惜無賞心人。懽然盡餘杯。夜宿玉女祠。崩奔湧雲雷。山靈見光怪。似喜詩人來。鷄鳴登日觀。四望無氛霾。六龍出扶桑。翻動青霞堆。平生華嵩遊。茲山未忘懷。十年望齊魯。登臨負吟鞭。孤雲拂層崖。青壁落落雲間開。眼前有句道不得。但覺曾次高崔嵬。徂徠山頭喚李白。吾欲從此觀蓬萊。

付阿耽誦

昨得商子書。知有阿耽名。今朝見阿耽。驚喜喜復驚。迺翁雅望傾漢庭。仕才千石埋九京。我知渠孫不虛生。虎穴生虎子。墮地骨骼成。舉頭爲城尾。爲旌幾人雄。猛得寧馨繡衣青春佳御史。路人望見行且止。老夫從旁當說似。前日晦道堂前小兒子。雷動風行自應耳。藜藿不采今其始。

遺山先生文集卷第六

樂府

天門引

秦王深居不得近。從破衡成欲誰信。白頭游客困咸陽。憔悴黃金百斤盡。海中仙人黃鸝舉。大唉人間爭腐鼠。丈夫何意作蘇奏。六印才堪警兒女。古來多爲虛名老。不見阿房淨如掃。千年虎豹守天門。一日牛羊臥秋草。

蛟龍引

古劍咸陽墓中得。抉開青雲見白日。蛟龍地底氣如虹。土花千年不敢蝕。洪爐烈焰初騰精。橫海已覺無長鯨。世上元無倚天手。匣中誰解不平鳴。割城恨不逢相如。佐酒恨不逢朱虛。尙方未入朱雲請。盟槃合與毛生俱。誰念田丈坐中客。只將彈鋏嘆無魚。

湘夫人詠

木蘭芙蓉滿芳洲。白雲飛來北渚遊。千秋萬歲帝鄉遠。雲來雲去空悠悠。秋風秋月沅江渡。波上寒烟引輕素。九疑山高猿夜啼。竹枝無聲墮殘露。

湘中詠

楚山鶴鳴風雨秋。楚岸猿啼送客舟。江山萬古騷人國。猿鳥無情也解愁。西北長安遠於日。憑君休上岳。

陽樓。

孤劍詠

鬱鬱重鬱鬱。夜半長太息。吟成孤劍詠。門外山鬼泣。清霜稜稜風入骨。殘月耿耿燈映壁。君不見一飢縛壯士。僵臥時自惜。黃鵠一舉摩蒼天。誰念樊籠束脩翼。

渚蓮怒

阿溪何許來。素面涴風雨。寂寞烟中魂。依依欲誰語。

芳華怨

娃兒十八嬌可憐。亭亭裊裊春風前。天上仙人玉爲骨。人間畫工畫不出。小小油壁車。軋軋出東華。金縷盤雙帶。雲裾踏鴈沙。一片朝雲不成雨。被風吹去落誰家。少年豈無恩澤候。金鞍綉帽亦風流。不然典取鸕鷀裘。四壁相如堪白頭。金谷樓臺悄無主。燕子不來花着雨。只知環珮作離聲。誰向琵琶得私語。無情灘漱翡翠兒。有情蜂蝶跋勸君。滿酌金屈卮。明日無花空折枝。

後芳華怨

江南破鏡飛上天。三五二八清光圓。豈知汴梁破來一千日。寂寞菱花仍半邊。白沙漫漫車轆轤。鯢鷄絃中杜鵑哭。塞門憔悴人不知。枉爲珠娘怨金谷。樂府初唱娃兒行。彈棊局平心不平。只今雄蜂雌蝶兩不死。老眼天公如有情。白玉搔頭綠雲髮。玫瑰而脂透肉滑。春風着人無氣力。不必相思解銷骨。洛花絕品姚家黃。楊州銀紅一國香。千圍萬繞看不足。雨打風吹空斷腸。丹砂萬年藥。金印八州督。不及秦宮一生。

花裏活長門曉夕壽相如儘著千金買消渴。

結楊柳怨

長樂坡前一盃酒鄭重行人結楊柳可憐楊柳千萬枝看看盡入行人手輕烟細雨綠相和惱亂春風態度多路人愛是風流樹無奈朝攀暮折何朝攀暮折何時了不道行人暗中老素衣今日洛陽塵白髮明朝塞城草柳色年年歲歲青關人何事管離情春風誰向丁寧道折斷柔條莫再生

秋風怨

碧瓦高梧響疎雨坐倚薰籠時獨語守宮一着死生休狗走鷄飛莫爲女雲間簫鼓夜厭厭禁漏誰將海水添一春門外羊車過又見秋風拂翠簾揔把丹青怨延壽不知猶有竹枝鹽

歸舟怨

渡頭楊柳青復青閨中少婦動離情只從問得狂夫處夜夜夢到洛陽城南風吹櫓聲北鴈鳴嚶嚶江流望不極相思春草生

征人怨

瀚海風烟掃易空玉關歸路幾時東塞垣可是秋寒早一夜清霜滿鏡中

塞上曲

平沙細草散羊牛一簇征人在戍樓忽見隴頭新鴈過一時迴首望南州

西樓曲

游絲落絮春漫漫。西樓曉晴花作團。樓中少婦弄瑤瑟。一曲未終坐長嘆。去年與郎西入關。春風浩蕩隨金鞍。今年疋馬妾東還。零落芙蓉秋水寒。并刀不剪東流水。湘竹年年露痕紫。海枯石爛兩鴛鴦。只合雙飛便雙死。重城車馬紅塵起。乾鵠無端爲誰喜。鏡中獨語人不知。欲插花枝淚如洗。

後平湖曲

越女顏如花。吳兒潔於玉。天教並牆居。不着同被宿。美人一笑千黃金。連城不博百年心。樓上墻頭無一物。暮爨朝春一生足。秋風拂羅裳。秋水照紅粧。舉頭見郎至。低頭采蓮房。郎心只如菱刺短。妾意未覺藕絲長。與郎期何許。眼礙同舟女。春波澹澹無盡情。雙星盈盈不得語。十里平湖艇子遲。岸花汀草伴人歸。鴛鴦驚起東西去。唯有蜻蜓接翅飛。

洧川行

洧川道邊日欲西。誰家少婦掩面啼。漫漫長路行不徹。粉綿鏡衣手自攜。自言娼家女。家在梁門東。夫婿輕薄兒。新人不相容。憶初在家時。只辨放嬌慵。爺娘惜女如惜玉。近前細看面發紅。無端嫁作蕩子婦。流落棄擲風埃中。可憐桃李花。顏色嬌蒙茸。朝看花枝好。暮看花枝空。安得明珠三百斛。重簾複幕圍春風。

長安少年行

黃衫少年如玉筆。生長侯門人不識。道逢豪客問姓名。袖把金鞭側身揖。臥駕行橐錦帕蒙。石榴壓漿銀作筒。八月蒼鷹一片雪。五花驕馬四蹄風。日暮新豐原上獵。三更歌舞灞橋東。

黃金行

王郎少年詩境新。氣象慘澹舍古春。筆頭仙語復鬼語。只有溫李無他人。天公着詩貧子身。子曾不知乃自神人間。不買詩名用。一片青衫衡霍重。兒貧女富母兩心。何論同袍不同夢。入門喚婦不下機。淚子垢面兒啼飢。君詩只有貧女謠。何曾夢見金縷衣。外家翁媼日有語。嫁女書生徒爾爲。昆陽城下三更酒。醉膽輪囷插星斗。一夕詩腸老蛟吼。十尺長人墮車走。研頭不屈三萬言。欲向何門復低首。何人壽我黃金千。使君破鏡飛上天。

隋故宮行

渭川楊柳先得春。二月鶯啼百轉新。長春宮中千樹錦。暖日晴雲思煞人。君王半醉唱吳歌。絳仙起舞頻。翠蛾吳兒謾說曾行樂。三十六宮能幾多。千秋萬古金銀闕。海沒三山一毫髮。繁華夢覺人不知。留得寒蟬泣秋月。

解劍行

古劍黑於漆。鬱鬱動星文。摩挲二十年。今日持贈君。長鯨鼓浪三山沒。知君不是泥中物。袖間一卷白猿書。未分持刀買黃犧。壯懷風雲鬱沉沉。姍媿漂母無千金。長安侏儒飽欲死。萬古不解天公心。北風浩浩吹行客。隴水無聲雪花白。荆卿墓頭秋草乾。擊筑行歌欲誰識。君不見秦相五羖皮。去時烹雞炊扊扅。又不見敝裘蘇季子。合從歸來印纍纍。丈夫墮地自有萬里氣。翕忽變化安能知。大冠如箕望吾子。富貴同生亦同死。

征西壯士謠

三十未有二十強。手內蛇矛丈八長。總爲官家金印大。不怕百死向沙場。捉卻賀蘭山下賊。金鞍綉帽好還鄉。

望雲謠

涉江采芙蓉。芙蓉待秋風。登山采蘭苔。蘭苔霜早彫。美人亭亭在雲霄。鬢搖行歌不可招。湘絃沉沉寫幽愁。心歷亂如曳蟹。金支翠蕤紛在眼。春草迢迢春波遠。

望歸吟

塞雲一抹平如截。塞草離離臥榆葉。長城窟深戰骨寒。萬古牛羊飲冤血。少年錦帶佩吳鈎。獨騎疋馬覓封侯。去時只道從軍樂。不道關山空白頭。北風吹沙雜飛雪。弓絃有聲凍欲折。寒衣昨夜洛陽來。腸斷空閨搗秋月。年年歲歲望還家。此日歸期轉天涯。誰與南州問消息。幾時重拜李輕車。

梁園春五首

車駕遷汴京後作

軍從南去三迴勝。雪自冬來二尺強。今歲長春多樂事。內家應舉萬年觴。長春德陵
誕節名

暖入金溝細浪添。津橋揚柳綠纖纖。賣花聲動天街遠。幾處春風揭綉簾。

上苑春濃畫景闊。綠雲紅雪擁三山。宮牆不隔東風斷。偷送天香到世間。

樓觀沉沉細雨中。出牆花木亂青紅。朱門不解藏春色。燕宿鶯喧處處通。

雙鳳簫聲隔綵霞。宮鶯催賞玉谿花。誰憐麗澤門邊柳。瘦倚東風望翠華。龍德宮有玉谿館
麗澤燕都西門名

探花詞五首

禁裏蒼龍啓九關。殿前鸚鵡喚新班。沉沉綠樹鞭聲遠。嫋嫋薰風扇影閑。
浩蕩春風入綉鞍。可憐東野一生寒。皇州花好無人管。不用新郎走馬看。
六十人中數少年。風流誰占探花筵。阿欽正使才情盡。猶欠張郎白玉鞭。李欽用二十七·張夢祥少一歲·又未婚云。

美酒清歌結勝游。紅衣先爲渚蓮愁。曲江共說櫻桃宴。不見西園風露秋。

人物風流見藹然。逼人佳筆已翩翩。龍津春色年年在。莫着新嘲惱必先。

獵城南

翩翩游俠兒。白馬如正練。朝出城南獵。暮趨軍中宴。北平有真虎。愛惜腰間箭。

春風來

春風來時瑤草芳。綠池珠樹宿鴛鴦。春風去後瑤草歇。來鴻去燕遙相望。鴛鴦不得雙。燕鴻天一方。娟娟愁眉色。靜與遙山長。錦衾復羅薦。夢語相思怨。月明烏夜啼。空闌淚如霰。

幽蘭

仙人來從舜九疑。辛夷爲車桂作旛。蹤麻導前杜若隨。披猖芙蓉散江瀛。南山之陽草木腓。澗崗重複人迹希。蒼崖出泉懸素霓。翛然獨立風吹衣。問何爲來有所期。歲云暮矣胡不歸。鈞天帝居清且夷。瑤林玉樹生光輝。自棄中野誰當知。霰雪慘慘清入肌。寸根如山不可移。雙麋不返夷叔飢。飲芳食菲尙庶幾。西山高高空蕨薇。露槃無人薦湘纏。山鬼切切雲間悲。空山月出夜景微。時有彩鳳來雙棲。

梅華

去歲梅華晚。今歲梅華早。和羹要佳實。春風莫草草。

寶鏡

寶鏡掛秋水。青娥紅粉粧。春風不相識。白地斷肝腸。

續小娘歌十首

吳兒沿路唱歌行。十十五五和歌聲。唱得小娘相見曲。不解離鄉去國情。
北來游騎日紛紛。斷岸長堤是陣雲。萬落千村藉不得。城池留着護官軍。
山無洞穴水無船。單騎駆人動數千。直使今年留得在。更教何處過明年。
青山高處望南州。漫漫江水遶城流。願得一身隨水去。直到海底不迴頭。
風沙昨日又今朝。踏碎鷗頭路更遙。不似南橋騎馬日。生紅七尺繫郎君。
鴈鴈相送過河來。人歌人哭鴈聲哀。鴈到秋來卻南去。南人北渡幾時迴。
竹溪梅塢靜無塵。二月江南烟雨春。傷心此日河平路。千里荆榛不見人。
太平婚嫁不離鄉。楚楚兒郎小小娘。三百年來涵養出。卻將沙漠換牛羊。
飢鳥坐守草間人。青布猶存舊領巾。六月南風一萬里。若爲白骨便成塵。
黃河千里扼兵衝。虞號分明在眼中。爲向淮西諸將道。不須誇說蔡州功。

遺山先生文集卷第七

五言律詩

懷益之兄

世故伊川嘆。鄉情越客音。天宜他日定。陸已向來沉。冉冉愁看老。源源事益侵。誰言易排遣。自分不勝任。
鞭影驚疲馬。鍾聲急暮禽。跼中無曠迹。唯有幽尋夢。失名家筆書。存遺子金山田。和石瘦茅屋。過雲深。
春雨蔬成圃。秋霜柿滿林。樹陰涼拂席。花氣澹盈襟。宿鷺窺晨汲。孤猿伴暝吟。溪僧時問字。野客或知琴。
抱璞休奇售。臨觴得緩斟。阿兄團聚日。曾話百年心。

汴禪師自斷普照瓦爲研。以詩見餉。爲和二首。

寺廢瓦不毀。研奇功亦多。已知良斲少。更柰苦心何。挺挺剛無敵。津津潤可呵。羽陽陵谷變。冰井字書訛。
贈比黃金璞。辭慙紫石歌。遙知玉音在。洗耳俟研磨。長吉有紫石硯歌

點化鉛仍見。堅凝鐵易穿。何年埋朽壤。此日睹青天。古色秋烟重。哀音夜雨懸。有刀堪切玉。是鏡不名博。
佛廬淪空劫。書林結後緣。禪河一勺水。更擬就師傳。

惡雨

惡雨惡復惡。龍公何遽然。霆轟冰塔碎。電掣玉繩連。高岸皆深谷。層霄一漏泉。黑來疑擁海。白散忽成烟。
市響千門合。潮頭萬弩穿。天瓢休盡建。上枯旱有他年。

癸巳除夜

鼎定周元重。薪安漢已然。不隨南渡馬。虛泛北歸船。身並枯蜩化。心爭脫兔先。塵埃嗟落薄。光景強留連。
往事青燈裏。浮生白髮前。更殘鍾未動。猶屬出京年。

病中因食猪動氣而作癸卯

戰勝頗自恃。寧知徒外腴。文章工作崇。時運迫摧枯。止酒嗟何及。燒猪本不圖。膏梁無急變。山澤有真臞。
詩信藤條戲。方遭鐵彈誣。鹽聲去紅忘後顧。黧黑見先驅。眩入投床仆。晨淹伏枕呼。萬錢誰嘔泄。一鬱爾乘除。
子扶老念時須杯杓歸神誓垣牆任佛踰回谿且垂翅望或在桑榆

綦威卿毅挽辭

綦東海人威卿之祖待制公知忻州因家焉

東海于門舊。桐鄉邑墓遷。芝蘭宜有種。珠玉自成淵。慈母依鄰切。名郎獲譽先。豪華非日損。信厚出天然。詣理言猶訥。持心靜益專。唉談千里到。咳垂百金捐。論齒推予長。垂髫得子賢。通家仍孔李。知己與玉田。刻責誰斯切。推扶最所偏。孤嫠平日託。昆季再生緣。摧割詩寧寫。精微夢或傳。都將百年淚。一慟夜臺前。

老樹

老樹高留葉。寒藤細作花。沙平時泊鴈。野迥已攢鴉。旅食秋看盡。行吟日又斜。干戈正飄忽。不用若回家。

陽翟道中

長路伶俜裏。羈懷莽蒼中。千山分落照。萬籟入秋風。頻見參旗縮。虛傳朔幕空。故園歸未得。細問北來鴻。

月觀追和鄧州相公席上韻

月觀知名舊。池亭發興偏。露涼驚夜鶴。風細咽秋蟬。綠泛兵廚酒。紅依幕府蓮。無緣逐清景。空羨飲中僊。

太室同希顏賦

壯矣崧維岳。盤盤上窈冥。中天瞻巨鎮。元氣有遺形。雨入秦川黑。雲開楚岫青。鱉掀一柱在。萬古壓坤靈。

送登封張令西上

罷縣人稱屈。悠悠復此行。渭城秋鴈到。秦嶺暮雲平。道路衣從典。風塵劍已鳴。山西多俠客。莫說是書生。

方城道中懷山中幽居

技拙違時用。年饑與食謀。江山貧士嘆。日月賈胡留。楚客頻招隱。文園故倦游。衡門有幽事。還我北窗秋。

孟州夾灘飲承之御史家叔同欽作

美酒禁愁得。芳梅發興饒。紛紅聊且置。碗磊故須澆。鷄黍成前約。干戈有此宵。平生揚大理。惜不預佳招。

雲卿赴召
五日矣

送曹吉甫兼及通甫

意氣羨君豪。憐君屈騎曹。安能事筆硯。且復混弓刀。風雪貂裘暗。關山馬骨高。南飛見鴻鴈。應爲惜哀勞。

勝概三卿作

勝概烟塵外。新詩杖履間。偶隨流水去。澹與暮雲還。吾道三噦口。時情一解顏。從今便高臥。已負半生閑。

少室南原

地僻人烟斷。山深鳥語譁。清溪鳴石齒。暖日長藤芽。綠映高低樹。紅迷遠近花。林間見鷄犬。直擬是仙家。

寄贈龐漢茂弘

之子貧居久。詩文日有功。苦心唯我見。高誼許誰同。萬里虎食肉。一鳴鷄長雄。皇天老眼在。且莫怨丘中。

洛陽古城曦陽門早出

乘月出曦陽。黎明轉北岡。荒村自鷄犬。長路足豺狼。天地憐飄泊。風霜憶閑藏。微吟訴行役。淒斷不成章。

聞希顏得英府記室

近得鬚參信。知從兔苑游。文星映未邸。勝概減黃樓。進退存中道。功名接上流。徒懷貢公喜。塵土隔瀛洲。

落魄

落魄宜多病。艱危更百憂。雨聲孤館夜。草色故園秋。行役魚頰尾。歸期烏白頭。中州遂南北。殘息付悠悠。

得姪摶信二首

今日鄜州姪。知從虎穴還。百年陰德在。幾日鬢毛斑。隔闊家仍遠。羈棲食更艱。誰憐西北夢。依舊遶秦關。
號驛傳家信。坤牛玩吉占。團圓知有望。悲喜亦相兼。過眼書重展。伸肩酒屢添。關河動高興。百遶望清蟾。

阿千始生

四十舉兒子。提孩聊自誇。驚松出笋兆。應竹生花田。不求千畝書。先備五車野。夫詩有學他。日看傳家。

長壽新居三首同仲經賦

地古村墟迥。川迴縣郭斜。蒲池餘老節。菊水引去。新芽卜築欣成趣。歸耕覺有涯。迎門顧兒女。今日是山家。

隱去初心在。親朋復此偕。荒田歸別業。高樹表新齋。泉石深三逕。風塵限兩崖。青山坐終日。無物寄幽懷。
宣和中姜夢得處士常隱于此墓碣在焉夢得曾上書仁宗旣老以詩酒自娛碣文說地名白鹿原長壽村也

少林雨中

西堂三日雨。氣節變蕭森。假臥復欹臥。長吟時短吟。鍾魚四山靜。松竹一燈深。重羨禪棲客。都無塵慮侵。

十二月六日二首

僂鬼跳梁久。羣雄結構牢。天機不可料。世網若爲逃。白骨丁男盡。黃金甲地高。閨門隔九虎。休續楚臣騷。海內兵猶滿。天涯歲又新。龍移失魚鱉。日食鬪麒麟。草棘荒山雪。烟花故國春。聊城今夜月。愁絕未歸人。

得一飛姪安信

音問他鄉隔。存亡此日知。夢中憂凍餒。意外脫艱危。避地何嗟及。還家敢恨遲。衰年吾事了。似有鹿門期。
短日

短日砧聲急。重雲鴈影深。風霜侵晚節。天地入歸心。零落溝中斷。酸嘶爨下音。五年朝與夕。清血幾沾襟。
送毋受益自潞府歸崧山

薄俗科名賤。狐生志願違。正須謀獨往。何暇計羣飛。泌水真堪樂。荊州況可依。青山吾舊隱。此日羨君歸。

寄程孫鐵安

贈汴禪師

御史陰功在孫兒。玉不如。已能騎竹馬。想亦愛銀魚。異縣關山闊。衡門骨肉疎。幾時隨阿舅。盡讀外家書。

道重疑高譽。禪枯耐寂寥。蓋頭茅一把。繞腹箋三條。趙子曾相問。馮公每見招。風波門外客。無事且相饒。

五十未全老。衰容新又新。漸稀頭上髮。別換鏡中人。野史纔張本。山堂未買鄰。不成騎瘦馬。還更入紅塵。

送楊次公兼簡秦彥容李天成

海國山如染。雲堆草易荒。時危頻虎穴。路絕更羊腸。吊影雙蓬鬢。攜家一藥囊。殷勤秦與李。無惜借餘光。

發濟源

旱嘆今年劇。他鄉底處歸。羸糧失先具。涉世本無機。棄擲烏皮几。裴回白版屏。殷勤雙語燕。媿汝遠相依。

倪庄中秋己亥

強飯日逾瘦。挾衣秋已寒。兒童謾相憶。行路豈知難。露氣入茅屋。溪聲喧石灘。山中夜來月。到曉不曾看。

答潞人李唐佐贈詩

聞道嗟予晚。求師愧子賢。泥途終自拔。璞玉豈虛捐。書破三千牘。詩論二百年。文章有聖處。正脉要人傳。

陽興砦

亂石通樵逕。重崗擁戍城。山川帶淳朴。鷄犬見升平。雨爛沙仍軟。秋偏氣自清。年年避營馬。幾向此中行。

由州入府，邇騎兵
奪馬者多由此路。

懷粹中

醉解不復寐。吟君田舍詩。從知石門老。未比木庵師。
日月淹書尺。江山入鬢絲。何因重談笑。卻似少林時。
同周帥夢卿崔振之遊七岩定襄七岩

客路頻年別。僧居半日閑。同遊盡親舊。舉目是家山。
世事風塵外。詩情水石間。悠然一尊酒。落景未知還。
送崔振之迎家汴梁

老伴不易得。殘年唯有閑。桑麻一村落。鷄犬兩柴關。
樊守能供酒。周侯許買山。從今釣溪上。日日望君還。
聚僊臺夜飲

永夜留懽席。高懷遠市塵。月涼衣有露。風細酒生鱗。
鄉社情親舊。僊臺姓字新。殷勤詩卷在。長記坐中人。
續陽平十愛

我愛陽平酒。兵廚釀法新。百金難着價。一璵卽醺人。
色笑榴華重。香兼竹葉醇。爲君留故事。喚作杏園春。

杏園指紀子
正家園爲言

送田益之從周帥西上二首

市近廚無肉。書香蠹有蟲。深居誰不樂。去所
風。
兀坐竟何功。天日伸眉後。江山洗眼中。蓬萊如可到。剩借玉川

一室盆歌後。供樵只短僮。求凰可無日。牧犧未成翁。桂樹春風近。楊荑緩律通。明年孟德耀。應與伯鸞東。

九月晦日玉村道中

水涸沙仍濕。霜餘草更幽。烟光藏落景。山脊露清秋。坐食知何益。行吟只自愁。隨陽見鴻鴈。三嘆惜淹留。

十月四日往關南二首

短日晨光澹。高風宿靄澄。山寒渾欲雪。水涸劣能冰。振厲時何有。躋攀倦不勝。哦詩聊自遣。松液已香凝。

予方釀松醪當以今日熟故及之

行路見新月。獨行還獨謠。勞生塵衰衰。晚色鬢蕭蕭。野曠無遺穗。林疎有墮樵。迴頭麥山嶺。更覺馬蹄遙。

寄王文德新二首

德新時在汝州

沙際春還去。雲頭雨不成。興來誰共醉。事往獨含情。紫邏留行客。黃流隔戍城。岸花何處在。空憶擢歌聲。

清汝風華地。平生記此游。酒能千日醉。春必萬金酬。攬鏡非遲暮。逢花儘滯留。只應歌笑處。偏欠李鄜州。

孟津欽叔時赴
鄜州幕官

舊國

舊國分崩久。孤兒展省初。客衣留手線。驛傳失肩輿。夢拜悲兼喜。心飛疾亦徐。殷勤南去鴈。先爲到商於。

林影兼秋薄。雲陰帶晚涼。石潭魚近藻。沙渚鴈留霜。咲語無長路。登臨豈異鄉。一尊堪共醉。惜不是重陽。
鴈留霜作含霜

和仲梁

甲辰夏五月積雨十餘日不止遣悶二首

甲子霖霖雨巡簷悶不禁幻泡成實相水樂激哀音瘴海聞天漏堯年見陸沉
南史王景文傳人居貴要但問心若爲耳。

甲子霖霖雨農郊搏手空排牆寧有禮爲壑竟何功戰蟻侯王上鳴蛙意氣中
排牆事見王衍論云：排牆之壓猶有禮也。

陽泉樓雲道院

方外復方外翛然心迹清開窓納山影推枕得溪聲川路遠誰到石田平可耕霜林不嫌客留看錦嶂嶠

劉子中夢菴

寤寐生與死幻歟爲是真如何夢中境不屬覺時人朝徹從渠夜形開亦此神殷勤花上蝶分我漆園春

丙午九日詠菊二首

秋菊有何好祗緣風露清花中誰比數霜後獨鮮明九日惜虛過一尊還自傾今年病居士吟繞更關情
几案得新供小窓幽更宜風霜寧小怯根撥要深移黃素金行正芳甘藥品奇三薰復三沐歲晏與君期

感事

壯事本無取老謀何所成人皆傳已死吾亦厭餘生潦倒封侯骨淹留混俗情百年堪一唉辛苦惜虛名

酬中條李隱居邦彥

州路限南北相逢今白頭蟲沙非故國人物自名流學道慙高步留詩惜暗投歸秦如有便終伴竹林游

邦彥自關中徒步_{省其季}
父於集寧故有竹林之句

送邦彥北行

比數推前輩。陪從結後緣。川涂卽睽隔。詩酒重留連。白鶴歸華表。青牛得老僊。秦山好行腳。倚杖待明年。

紫微劉丈雅有游秦之興故篇中有及

同冀丈明秀山行

暮景披橫幅。山閒二老同。雲如愁戍苦。雪亦笑詩窮。古木凍欲折。斷崖行復通。從今胡谷夢。時到水聲中。

同姚公茂徐溝道中聯句

路轉川塗闊。天低雨氣昏。綿山連漢壘。汾水入并門。來往頻鞍馬。登臨負酒樽。聯詩強一吹。淒絕恐銷魂。

壬子月夕

明月復明月。今年還遠游。關河動歸興。時節重離憂。老眼耿無寐。病身偏覺秋。遙憐小兒女。把酒望東州。

庚子三月十日作

殘夢忘書帙。餘寒殢酒杯。青銅元懶照。白紵更寬裁。水際時獨往。花邊知幾迴。殷勤雙語燕。應自謝家來。

七月十六日送馮楊善提領關中三教

爲愛秦中好。西遊日苦遲。青雲動高興。白首得新知。道在貧何病。官閑老更宜。相思詩酒社。無計與追隨。

京兆漕司官居三首

符節推通貴。江山入勝游。名園隨地改。高棟與雲浮。簿領歸閑暇。鶯花接獻酬。不知秋夜月。何似庾公樓。

複嶺雲橫野。孤峯玉柱天。遙知開館日。別破見山錢。夢山紛華外。詩來寂寞邊。亭中誰舉酒。高興相悠然。

間說梅軒好。

長吟有所思。入簷看瘦影。桂月見橫枝。東閣今千載。風流彼一時。西游曾有約。到日更題詩。

甲寅正月二十三日故關道中三首

雪礪不得過。陽坡如見留。林烟常暗澹。木葉自颶颶。齒髮悲行役。鶯花惜舊游。塵埃與風雨。看待幾時休。
千里不易到。三冬須少留。居情猶晉產。去意已雕丘。遠出每爲苦。雄夸還自羞。君心未肯在。應待肯時休。
六十復半十年。添白頭。祇知詩遣興。未覺酒忘憂。人七因循過。元宵塊坐休。殷勤行記上。今日是東州。

送閻子實焦和之北上

秦府賢初聚。瀛州路不遙。謀謨在廊廟。物色到漁樵。布褐豈終隱。旌車匪見招。春風兩黃鸝。老眼看雲霄。

庫城

浩浩庫城水。岸高知幾尋。踐林護懸險。絕壁入清深。踢步無曠迹。勞歌惟苦音。年年一來此。老我亦何心。

妻生北上

并府虛荒久。大城如廢村。草茅知世故。泉壤隔天闊。六月甘霖浹。一言陰理存。明年佩符節。知有奉春孫。

遺興

几案滿書史。欣然忘百憂。一篇詩遺興。三醕酒扶頭。千載陶元亮。平生馬少游。但留強健在。老矣復何求。

八月并州鴈

二卿時作

八月并州鴈。清汾照旅羣。一聲驚晚笛。數點入秋雲。滅沒樓中見。哀勞枕畔聞。南來還北去。無計得隨君。

示白誠甫

之子吟爆竹。迺公欣樹萱。崑山多美玉。江水發初源。名教有樂地。詩書皆雅言。通家吾未老。倚杖望高軒。

甲寅十二月四日出鎮陽寄宰魯伯

滹水曉光動。霸橋詩境同。衝寒騎瘦馬。認影識衰翁。長路風聲裏。孤城雪意中。迴頭歌笑處。淒絕意何窮。

送文生西行

今夜東山月。隨人知幾程。從軍少年事。分手故鄉情。渭水風露早。秦川烟樹平。相招有仙掌。無計與君行。

乙卯十一月往鎮州

村靜鳥聲樂。山低鴈影遙。野陰時滉朗。冷雨只飄蕭。涉遠心先倦。衝寒酒易消。紅塵忘南北。渺渺見長橋。

遺山先生文集卷第八

七言律詩

秋懷

崧山中作

涼葉蕭蕭散雨聲。虛堂淅淅掩霜清。黃華自與西風約。白髮先從遠客生。吟似候蟲秋更苦。夢和寒鵠夜頻驚。何時石嶺關頭路。一望家山眼暫明。

帝城二首

史院夜直作

帝城西下望孤雲。半廢晨昏媿此身。世俗但知從仕樂。書生只合在家貧。悠悠未了三千牘。碌碌翻隨十九人。預遣兒書報歸日。安排鷄黍約比鄰。
羈懷鬱鬱歲駸駸。擁揭南窗坐晚陰。日月難淹京國久。雲山唯覺玉華深。鄰村爛熳鷄黍局。野寺荒涼松竹林。半夜商聲入寥廓。北風黃鶴起歸心。

僕射陂醉歸卽事

多生曾得江湖樂。每見陂塘覺眼明。詩酒共尋前日約。風陰新自夜來晴。春波澹澹沙鳥沒。野色荒荒煙樹平。醉踏扁舟浩歌起。不須紅袖出重城。是日招樂府不至

春日

里社春盤巧欲爭。裁紅暋碧助春情。忽驚此日仍爲客。卻想當年似隔生。貧裏蘊鹽憐節物。亂來歌吹失

歡聲南舟剩有還鄉伴。戎馬何時道路清。歐陽詹春盤賦。裁紅

橫波亭

爲青口帥賦

孤亭突兀插飛流。氣壓元龍百尺樓。萬里風濤接瀛海。千年豪傑壯山丘。踐星澹月魚龍夜。老木清霜鴻鴈秋。倚劍長歌一盃酒。浮雲西北是神州。

野菊座主閑閑公命作

柴桑人去已千年。細菊班班也自圓。共愛鮮明照秋色。爭教狼籍臥踈烟。荒畦斷壠新霜後。瘦蝶寒螢晚景前。只恐春華笑遲暮。題詩端爲發幽妍。

度太白嶺往昆陽

斷崖絕壁裂蒼頑。竟日長林窈窕間。舊許煙霞歸白髮。悔隨塵土出青山。飢蚕濶濶催人老。野鶴昂昂羨汝閑。畏景方隆路方永。南風迴首暮雲還。

寄希顏二首

後一首徐州幕時作。希顏在

灔臥崧丘七見春。商餘歸計一塵新。悠悠華屋高貲意。兀兀田夫野老身。動色雲山如有喜。忘機鷗鳥亦相親。篪疎潦倒今如此。樓上元龍莫笑人。

湖海故人仍騎曹。彭門千里入憑高山頭。杜甫長年瘦。樓上元龍先日豪。水落魚龍失歸宿。天長鴻鴈獨哀勞。酒船早晚東行辦。共舉一杯持兩螯。

懷益之兄

時在閩鄉

牢落關河鴈一聲。干戈滿眼若爲情。三年浪走空皮骨。四海相望只弟兄。黃耳定從秋後到。白頭新自夜來生。西樓日日西州道。欲賦窮愁竟不成。

昆陽二首

古木荒煙集暮鴉。高城落日隱悲笳。并州倦客初投迹。楚澤寒梅又過花。滿眼旌旗驚世路。閉門風雪羨山家。忘憂只有清樽在。暫爲紅塵拂鬢華。

去日黃花半未開。南來忽復見寒梅。淹留歲月無餘物。料理塵埃有此杯。老馬長途良餒矣。白鷗卷水亦悠哉。商餘說有滄州趣。早晚乾坤入釣臺。

寄西溪相禪師

青鏡流年易擲梭。壯懷從此卽蹉跎。門堪羅雀仍未害。釜欲生魚當奈何。萬事自知因嬾廢。一官元不校貧多。拂衣明日西溪去。且放雲山入浩歌。

葉縣雨中

時崧前旱尤甚

春旱連延入麥秋。今朝一雨散千憂。龍公有力迴枯槁。客子何心歎滯留。多稼卽看連楚澤。歸雲應亦到崧丘。兵塵浩蕩乾坤滿。未厭明河拂地流。

寄答趙宜之兼簡溪南詩老

窗影朧朧納暝陰。風聲浩浩急霜砧。秋鴻社燕飄零夢。穎水崧山去住心。黃菊有情留小飲。青燈無語伴微吟。故人憔悴蓬茅晚。料得老懷如我今。

穎亭

穎上風煙天地迴。穎亭孤賞亦悠哉。春風碧水雙鷗靜。落日青山萬馬來。勝概消沉幾今昔。中年登覽足悲哀。遠游擬續騷人賦。所惜忽忽無酒杯。

山中寒食

小雨班班浥曙煙。平林簇簇點晴川。清明寒食連三月。穎水崧山又一年。樂事漸隨花共減。歸心長與鴈相先。平生最有登臨興。百感中來只慨然。

楚漢戰處同欽賦

虎擲龍拏不兩存。當年曾此賭乾坤。一時豪傑皆行陣。萬古河山自壁門。原野猶應厭膏血。風雲長遣動心魂。成名豎子知誰謂。擬喚狂生與細論。

懷叔能

別卻楊侯又一年。西風每至輒淒然。酒官未得高安上。詩印空從吏部傳。三沐三薰知有待。一鳴一息定誰先。黃塵憔悴無人識。今在長安若箇邊。

留別仲澤

避俗無機日見侵。逐貧不去巧相尋。半生與世未嘗合。前日入山唯不深。綠水紅蓮慚大府。清泉白石識初心。相思命駕非君事。能寄詩來或賞音。

鄭州上致政賈右丞相公時被命就公訪先朝逸事

黃閣歸來履鳥輕。天將五福畀康寧。四朝人物推耆舊。萬古清風在典刑。鄭圃亦能知有道。漢庭久欲訪遺經。帝城此後瞻依近。長傍弧南候極星。

寄答景玄兄

故人相念不相忘。頻着書來約對床。甚喜樵夫與爭席。所憂簿吏復登堂。春風和氣隨詩到。洛水秦山引興長。奮袖高談夜窗白。幾時危坐聽琅琅。簿吏復登堂李長吉語景玄去歲大爲催科所困

寄辛老子

草堂西望渺煙霞。夢寐西南一逕斜。爲羨鸞凰安枳棘。悔將猿鶴入京華。百錢卜肆成都市。萬古詩壇子美家。後日從翁問奇字。可能逋客待侯巴。

後灣別業

薄雲晴日爛烘春。高柳清風便可人。一飽本無華屋念。百年今見老農身。童童翠蓋桑初合。灔澦蒼波麥已匀。便與溪塘作盟約。不應重遣濯纓塵。

劉文仲通哀挽

拙宦深辜遠業期。無兒更結下泉悲。溫純如此豈復見。報施言之尤可疑。四葉名家今日盡。百年潛德幾人知。元劉交分平生重。才薄猶堪第二碑。

會善寺

白塔沉沉插翠微。魏家宮闕此餘基。人生富貴有遺恨。世事廢興無了期。勝概只今歸鷺嶺。煙花從昔繞

龍墀長松想是前朝物及見諸孫賦黍離。

寄欽用

顚願京華苜蓿槃。南山歸興夜漫漫。長門有賦人誰買。坐榻無旛客亦寒。蟲臂偶然煩造物。蠻頭何者亦求官。故人東望應相笑。世路羊腸乃爾難。

楊之美尙書挽章

冠蓋龍門此日空。人知麟出道。將窮景星明。月歸天上和氣春。風在眼中千古孫劉有餘責。一時燕許更誰同。受恩知己無從報。獨爲斯文泣至公。

李屏山挽章二首

世法拘人虱處禪。忽驚龍跳九天門。牧之宏放見文筆。白也風流餘酒尊。落落久知難合在。堂堂元有不亡存。中州豪傑今誰望。擬喚巫陽起醉魂。

談麈風流二十年。空門名理孔門禪。諸儒久已同堅白。博士真堪補太玄。孫況小疵良未害。莊周陰助恐當然。遺編自有名山在。第一諸孤莫浪傳。

內鄉縣齋書事

吏散公庭夜已分。寸心牢落百憂薰。催科無政堪書考。出粟何人與佐軍。飢鼠達床如欲語。驚鳥啼月不堪聞。扁舟未得滄浪去。慚愧春陵老使君。遠祖次山春陵行云思欲委符節引竿自刺船故子美有興含滄浪清之句

自菊潭丹水還寄崧前故人

臘雪春泥晚未乾。馬迎殘照入荒寒。初無鳧鳥將安往。正有牛刀恐亦難。倦客不知歸路遠。孤城唯覺暮山攢。黃金鍊出相思句。寄與同聲別後看。

被檄夜赴鄧州幕府

幕府文書鳥羽輕。敝裘羸馬月三更。未能免俗私自笑。豈不懷歸官有程。十里陂塘春鴨鬧。一川桑柘晚煙平。此生只合田間老。誰遣春官識姓名。

馬鄧驛中大雨

萬壑千岩一雨齊。先聲噴薄捲湍溪。投林鳥雀不暇顧。移穴蛟龍應自迷。便恐他山藏厚夜。豈知高樹有晴霓。兩江合向西南關。坐想風雲入鼓鼙。馬鄧西南兩漸水相合處也

除夜

一燈明暗夜如何。夢寐衡門在澗阿。物外煙霞玉華遠。花時車馬洛陽多。折腰真有陶潛興。扣角空傳甯戚歌。三十七年今日過。可憐出處兩蹉跎。

鄧州相公命賦喜雨

輕陰十日暮。春前和氣朝。來已沛然河。潤定應連上國雲。來端合自中天帥從洛陽移鎮烽零帶濕闊。幽障麥壠分青入廢田。共識使君霖雨手。調元消息在今年。

劉光甫內鄉新居

笏冠平日凜秋霜。老去聲名只閉藏。父老漸來同保社。兒童久已愛文章。蔬隨隙地皆成圃。竹放新梢欲

過牆爲向長安舊遊道。世間元有北窗涼。

西齋夜宴

飄零無物慰天涯。酒伴相逢飲倍加。悞君當略彭澤。迴旋我亦笑長沙。金釵醉驛迎春髻。銀燭光搖半夜花。只欠東山游錄事。不來堅坐看紛譁皆在而麟之獨不至。

十月

十月長年見早梅。今年二月未全開。春寒春暖花如故。年去年來老漸催。大藥誰傳軒后鼎。習仙虛築漢宮臺。憑君撥置人間事。不負浮生只此杯。

送吳子英之官東橋且爲解嘲

柴車歷鹿送君東。萬古書生蹭蹬中。良醞暫留王績醉。新詩無補玉川窮。駒陰去我如決驟。蟻垤與誰爭。長雄快築糟丘便歸老。世間馬耳過春風。

張主簿草堂賦大雨

浙樹蛙鳴告雨期。忽驚銀箭四山飛。長江大浪欲橫潰。厚地高天如合圍。萬里風雲開偉觀。百年毛髮凜餘威。長虹一出林光動。寂歷村墟空落暉。橫去聲。

丹霞下院同仲澤鼎玉賦

時從商帥軍至南陽

鞍馬忽忽去復還。霜鍾今得見豐山。千年香火丹霞老。滿眼興亡白水闊。壯志自憐消客路。深居誰得似禪關。只應頻有西來夢。夜夜青林杳靄間。

春日半山亭游眺

日照春山花滿煙。獨攜尊酒此江邊。
江流衰衰望不極。世事悠悠私自憐。
小草不妨懷遠志。芳蘭誰爲發幽妍。
千年石壁留詩在。會有騷人一慨然。

別程女

芸齋淅淅掩霜寒。別酒青燈語夜闌。
生女便知聊寄託。中年尤覺感悲歡。
松間小草栽培穩。掌上明珠棄擲難。
明日綠山東畔路。野夫懷抱若爲寬。

出山

松門石路靜無關。布韁青鞋幾往還。
少日漫思爲世用。中年直欲伴僧閑。
塵埃長路仍回首。升斗微官亦強顏。
休道西山不留客。數峯如畫暮雲間。

謝鄧州帥免從事之辟

憂端擾擾力難任。世事駿駿日見臨。
三載素冠容有媿。一時墨經果何心。
首丘自擬終殘喘。陟屺誰當辨苦音。
遙望朱門涕橫落。相公恩德九泉深。

新野先主廟

次鄧韻

一軍南北幾扶傷。長坂安行氣已王。
豪傑盡思爲漢用。江山初不假吳強。
兩朝元老心雖壯。再世中興事可常。
寂寞永安宮畔土。爭教安樂似山陽。

石門

兩崖橫絕倚山垠。草逕低迷劣可分。潭影乍從明處見。竹香偏向靜中聞。石林萬古不知暑。茅屋四隣唯有雲曳杖行歌羨樵叟。此生何計得隨君。

獨峯楊氏幽居

村墟瀟洒帶新晴。落日千山一片青。世外衣冠存大朴。雲間鷄犬亦長生。清江兩岸多古木。平地數峯如畫屏。惆悵朝陽一茅屋。酒缸茶竈負生平。

渡湍水

湍作水經專呼

悠悠人事眼中新。悄悄孤懷百慮紛。伎倆本宜閑處着。姓名誰遣世間聞。秋江澹沱如素練。沙浦空明行暮雲。早晚扁舟載煙雨。移家來就野鷗羣。

十日登豐山

十日登高發興新。豐山孤秀出塵氛。村墟帶晚鴉噪合林壑得霜煙景分。芳臭百年隨變滅。短長千古只紛紜詩成一嘆。無人會白水悠悠入暮雲。

岐陽三首

突騎連營鳥不飛。北風浩浩發陰機。三秦形勝無今古。千里傳聞果是非。偃蹇鯨鯢人海涸。分明蛇犬鐵山園。窮途老阮無奇策。空望岐陽淚滿衣。

百二關河草不橫。十年戎馬暗秦京。岐陽西望無來信。隴水東流聞哭聲。野蔓有情縈戰骨。殘陽何意照空城。從誰細向蒼蒼問。爭遣蚩尤作五兵。

耽耽九虎護秦關。懦楚孱齊機上看。禹貢土田椎陸海。漢家封徼盡天山。北風獵獵悲笳發。渭水瀟瀟戰骨寒。三十六峯長劍在。倚天僂掌惜空閑。

圍城病中文舉相過

擾擾長衢日往回。病中聊得避喧埃。愁多頓覺無詩思。計拙唯思近酒盃。潘岳鏡中渾白髮。江淹門外即蒼苔。生涯若被傍人問。但說經年鼠不來。

讀靖康僉言

浚郊沙海浩茫茫。河廣纔堪一葦航。顛沛且當懲景德。規模何必罪朱梁。滄溟不掩蛟龍窟。大地同歸雀鼠鄉。三百年間幾降虜。長星無用出光芒。

雨後丹鳳門登眺

絳闕遙天霽景開。金明高樹晚風迴。長虹下飲海欲竭。老鴈叫羣秋更哀。刲火有時歸變滅。神嵩何計得飛來。窮途自覺無多淚。莫傍殘陽望吹臺。

京居辛卯八月六日作

四壁秋蟲夜語低。南窗孤客枕頻移。野情自與軒裳隔。旅食難堪日月遲。平子歸田元有約。魏舒撲被恐無期。一莖白髮愁多少。慚愧家人賦扊扅。

浩然師出圍城賦鶴詩爲送

夢寐西山飲鶴泉。羨君歸興渺翩翩。昂藏自有林壑態。飲啄暫隨塵土緣。遼海故家人幾在。華亭清淚世

空憐明年也作江鷗去。水宿雲飛共一天。

追用座主閑閑公韻上致政馮內翰二首

峻坂平生幾疾驅。歸休甫及引年初。東門太傅多祖道。北闕詩人休上書。阜櫨老歸千里驥。白雲閑釣五溪魚。非熊有兆公無恙。會近君王六尺輿。

草堂人物列仙臞。萬壑松風酒一壺。少日打門無俗客。老年爭席有樵夫。巨源不入竹林選。元亮偶成蓮社圖。野史他年傳舊舊。風流一一似公無。

懷秋林別業

茅屋瀟瀟浙水濱。豈知身屬洛陽塵。一家風雪何年盡。二頃田園入夢頻。高樹有巢鳩笑拙。空牆無穴鼠嫌貧。西南遙望腸堪斷。自古虛名只悞人。

壬辰十二月車駕東狩後卽事五首

翠被葱葱見執鞭。戴盆簪簪夢瞻天。只知河朔歸銅馬。又說臺城墮紙鳶。血肉正應皇極數。衣冠不及廣明年。何時真得攜家去。萬里秋風一釣舡。

慘澹龍蛇日鬪爭。干戈直欲盡生靈。高原水出山河改。戰地風來草木腥。精衛有冤填瀚海。包胥無淚哭秦庭。并州豪傑今誰在。莫擬分軍下井陘。

鬱鬱園城度兩年。愁腸飢火日相煎。焦頭無客知移突。曳足何人與共舡。白骨又多兵死鬼。青山元有地行仙。西南三月音書絕。落日孤雲望眼穿。

萬里荆襄入戰塵。汴州門外卽荆榛。蛟龍豈是池中物。蟻虱空悲地上臣。喬木他年懷故國。野煙何處望行人。秋風不用吹華髮。滄海橫流要此身。

五雲宮闕露盤秋。銀漢無聲桂樹稠。複道漸看連上苑。戈船仍擬下揚州。曲中青冢傳新怨。夢裏華胥失舊遊。去去江南度。開府鳳凰樓畔莫迴頭。

永寧南原秋望

浩浩西風入敝衣。茫茫野色動清悲。洗開塵漲雨纔定。老盡物華秋不知。烽火苦教鄉信斷。砧聲偏與客心期。百年人事登臨地。落日飛鴻一線遲。

中秋雨夕

商帥國器
遜中作

南樓高興在胡床。十日秋陰負一觴。庾老未應妨嘯詠。素娥多自怨昏黃。此生此夜不長好。行雨行雲有底忙。卻恐蛾詩太愁絕。且燒銀燭看紅粧。

癸巳四月二十九日出京

塞外初捐宴賜金。當時南牧已駸駸。只知灞上真兒戲。誰謂神州遂陸沉。華表鶴來應有語。銅槃人去亦何心。興亡誰識天公意。留着青城閱古今。國初取宋於青城受降

喜李彥深過聊城

圍城十月鬼爲鄰。異縣相逢白髮新。恨我不如南去鴈。羨君獨是北歸人。言詩匡鼎功名薄。去國虞翻骨相屯。老眼天公只如此。窮途無用說悲辛。

與張杜飲

故人家落曉天星。異縣相逢覺眼明。世事且休論。向日酒尊聊喜。倡承平。山公倒載羣兒笑。焦遂高談四座驚。轟醉春風一千日。愁城從此不能兵。

秋夕

小簾涼多睡思清。一牕風雨送秋聲。頻年但覺貂裘敝。萬古何曾馬角生。寄食且依嚴尹幕。附書誰往鄧州城。澆愁欲問東家酒。恨殺寒鷄不肯鳴。

夢歸

顚願南冠一楚囚。歸心江漢日東流。青山歷歷鄉國夢。黃葉瀟瀟風雨秋。貧裏有詩工作祟。亂來無淚可供愁。殘年兄弟相逢在。隨分蘿鹽萬事休。

白屋

白屋寒多愛夕曛。靜中歸思益紛紛。長門誰買千金賦。祖道虛陳五鬼文。地盡更無錐可置。竈閑唯覺井長勤。明年准擬萊蕪住。寄謝東隣范史雲。

淮右

淮右城池幾處存。宋州新事不堪論。輔車謾欲通吳會。突騎誰當擣薊門。細水浮花歸別澗。斷雲含雨入孤村。空餘韓渥傷時語。留與羃臣一斷魂。

徐威卿相過留二十許日將往高唐同李輔之贈別二首。

衣冠八座文昌府。撲被三年同舍郎。蕩蕩青天非向日。蕭蕭春色是他鄉。傷時賈誼頻流涕。臥病王章自激昂。保社追隨有成約。不應關塞永相望。

東南人物未彫零。和氣春風四座傾。但喜詩章多俊語。豈知談笑得新名。二年阻絕干戈地。百死相逢骨肉情。別後相思重迴首。杏花尊酒記聊城。

卽事

逆豎終當艤縷分。揮刀今得快三軍。燃臍易盡嗟何及。遺臭無窮古未聞。京觀豈當誣翟義。哀衣自合從高勳。秋風一掬孤臣淚。叫斷蒼梧日暮雲。

望王李歸程

一褐霜寒晚。思孤眼中行。李見歸途遠。虞卿仲子死不朽。石父晏嬰今豈無。義士龍沙元咫尺。壘臣駒隙自舒徐。何時斗酒歡相勞。驚看燕家頭白鳥。

秋夜

九死餘生氣息存。蕭條門巷似荒村。春雷謾說驚坯戶。皎日何曾入覆盆。濟水有情添別淚。吳雲無夢寄歸魂。百年世事兼身事。尊酒何人與細論。

甲午除夜

暗中人事忽推遷。坐守寒灰望復燃。已恨太官餘麪餅。爭教漢水入膠船。神功聖德三千牘。大定明昌五十年。甲子兩周今日盡。空將衰淚洒吳天。

乙未正月九日立春

十度新正九處家。今年癡坐轉堪嗟。一冬殘雪不肯盡。連日苦寒殊未涯。重碧總誇燕市酒。小紅誰記上林花。殘魂零落今無幾。乞與春風惱鬢華。

杏花落後分韻得歸字

獺髓能醫病。頰肥鸞膠無那片。紅飛殘陽淡淡不肯下。流水溶溶何處歸。煮酒清林寒食過。明粧高燭賞心違。寫生正有徐熙在。漢苑招魂果是非。

三懲祠

三懲祠下往來頻。憔悴征衫滿路塵。簫鼓未休寒食酒。樵蘇時見舊都人。吹殘芳樹紅仍在。展破平田綠已勻。西北并州隔千里。幾時還我故鄉春。

送輔之仲庸還大梁

驛鴈爭道渺翩翩。誰遣風塵失壯年。四壁舊聞懸磬宅。一囊今有賣書錢。淋浪別酒青燈夜。滅沒孤帆落照邊。想得還家過春半。故山喬木滿蒼煙。

繡江汎舟有懷李郭二公

荷花如錦水如天。狼籍秋香擁畫船。長白風煙最瀟洒。外臺賓主重留連。勝遊每恨隔千里。樂事便當論百年。咫尺西州兩詩客。不來同作飲中仙。

送杜子

洛陽塵土化縑衣。又見孤雲着處飛。北渚曉晴山入座。東原春好妓成閨來。鴻去燕三年別。深谷高陵萬事非。轟醉春風有成約。可能容易話東歸。

眼中

眼中時事益紛然。擁被寒窗外不眠。骨肉他鄉各異縣。衣冠今日是何年。枯槐聚蟻無多地。秋水鳴蛙自一天。何處青山隔塵土。一卷吾欲送華顛。

送杜招撫歸西山

杜亂後爲黃冠師

少日先聲慾虎貔。只今騎馬欲雞棲。邯鄲枕上人初覺。秋水篇中物已齊。父老樵漁知有杜。將軍桃李自成蹊。因君喚起思鄉意。君在西山我更西。

寄欽止李兄

征車南北轉。秋蓬關塞相望。兩禿翁。衰衰便當隨世路。悠悠難復倚天公。銅駝荆棘千年後。金馬衣冠一夢中。尊酒雲州古城下。幾時攜手哭春風。

有寄

飛鴻來處是營平。喜向斜封見姓名。千里呂安思叔夜。五更殘月伴長庚。關河秋興風景暮。長路渴心塵土生。南渡詩人吾未老。幾時同醉鳳凰城。

鎮州與文舉百一飲

翁仲遺墟草棘秋。蒼龍雙闕記神州。只知終老歸唐土。忽漫相看是楚囚。日月盡隨天北轉。古今誰見海

西流眼中二老風流在一醉從教萬事休。

別王使君丈從之

謝公每見皆名語。白傅相看只故情。尊酒風流有今夕。玉堂人物記升平。太山北斗千年在。和氣春風四座傾。別後殷勤更誰接。只應偏憶老門生。

寄示禪師

濟源師舊隱

白頭歲月坐詩窮。止有相逢一笑同。齋粥空踈想君瘦。冠巾收歛定誰公。夢魂歷歷山間路。世事悠悠耳外風。見說懸泉好薇蕨。草堂知我是鄰翁。時汰逐釋老家甚急故有申冠收斂之句

衛州感事二首

神龍失水困蜉蝣。一舸倉皇入宋州。紫氣已沉牛斗夜。白雲空望帝鄉秋。却前寶地三千界。夢裏瓊枝十二樓。欲就長河問遺事。悠悠東注不還流。

白塔亭亭古佛祠。往年曾此走京師。不知江令還家日。何似湘纍去國時。離合興亡遽如此。棲遲零落竟安之。太行千里青如染。落日欄干有所思。落日一作獨一

望蘇門

諸父當年此往還。客衣塵土淚班班。太行秀發眉宇見。老阮亡來尊俎閑。出岫暮雲歸有處。投林孤鶴杳難攀。湧金亭上秋如畫。興在奇林杳靄間。

遺山先生文集卷第九

七言律詩

望崧少二首

崧少飛來崑崙山。山家茅屋翠微間。
鷄豚鄉社相勞苦。花木禪房時往還。
結習尙餘三宿戀。殘年多負半生閑。
長河一葦人千里。望斷西城碧玉環。

飲鶴池邊萬木稠。養龍崖上五峯秋。
藤垂絕壁雲添潤。澗落哀湍雪共流。
飲鶴池在綠山養龍崖在五乳峯下
田父占年驚玉旆。詩懷留迹歎
崑丘。西風落日山陽道。空對紅塵憶舊遊。

懷州子城晚望少室

河外青山展臥屏。并州孤客倚高城。
十年舊隱拋河處。一片傷心畫不成。
谷口暮雲知鄭重。林梢殘照故
分明。洛陽見說兵猶滿。半夜悲歌意未平。

別覃懷幕府諸君二首

王後盧前舊往還。江東渭北此追攀。
百年人物存公論。四海虛名只汗顏。
詩酒聊堪慰華髮。衡茅終擬共
青山。相思後日并州夢。常在瑤林照映間。

太行醞秀在山陽。嵇阮經行舊有鄉。
林影池烟設清供。物華天寶借餘光。
承平故事嗟猶在。雅詠風流豈
易忘。稍待秋風入涼冷。百壺吾欲醉籌堂。

河內有七賢鄉

羊腸坂

浩蕩雲山直北看。凌競羸馬不勝鞍。老來行路先愁遠。貧裏辭家更覺難。衣上風沙歎憔悴。夢中燈火憶團園。憑誰爲報東州信。今在羊腸百八盤。

高平道中望陵川二首

此縣先臘城府君太和中舊治皆當時事

列宿澄明墨綬尊。中臺良選到名門。來時珥筆誇健訟。去日攀車餘淚痕。一片青山幾今昔。百年華屋記生存。泰和遺老今誰在。向道甘棠有子孫。

鈴閣文書到酒卮。諸曹小吏亦抄詩。座中佳客無虛日。簾下歌童盡雅辭。棠棣有花移舊巧。櫻桃和露彈繁枝。書郎零落頭今白。腸斷荷衣出拜時。

蒙棣櫻桃皆當時事

野谷道中懷昭禪師

行行汾沁欲分疆。漸喜人聲挾兩鄉。野谷青山空自繞。金城白塔已相望。湯翻豆餅銀絲滑。油點茶心雪葉香。說向阿師應被笑。人生生處果難忘。

太原

夢裏鄉關春復秋。眼明今得見并州。古來全晉非無策。亂後清汾空自流。南渡衣冠幾人在。西山薇蕨此生休。十年弄筆文昌府。爭信中朝有楚囚。

外家南寺

在至孝社予兒時讀書處也

鬱鬱秋梧動晚烟。一庭風露覺秋偏。眼中高岸移深谷。愁裏殘陽更亂蟬。去國衣冠有今日。外家梨栗記

當年白頭來往人間徧依舊僧窗借榻眠。

追賦定襄周帥夢卿家秋日牡丹

千古吳中富貴家秋風吹送洛陽花真妃鏡裏春難老玉女車邊日易斜紀瑞定誰增舊譜換根元自有靈砂來遲不及西堂宴猶想分香入棣華周有棣華堂

桐川與仁卿飲

瀟瀟茅屋繞清灣四面雲開碧玉環已分故人成死別寧知尊酒對生還風流豈落正始後詩卷長留天地間海內斯文君未老不須辛苦賦囚山

過濁鹿城與趙尙賓談山陽舊事

廢邑蕭條落照邊山陽遺迹世空傳肺腸未潰猶可活灰土已寒寧復然負鼎運來元有力考槃人去更堪憐因君憶得曹瞞事銅雀臺荒又幾年

官園探梅同康顯之賦

柳麥榆椒寂寞邊儘饒梅事得春偏留殘瘦骨猶堪畫未展幽香已可憐千里移根自何許數枝臨水記當年開時重約花前醉試手東風第一篇

十二月十六日還冠氏十八日夜雪

少日騫飛掣臂鷹只今癡鈍似秋蠅耽書業力貧猶在涉世筋骸老不勝千里關河高骨馬四更風雪短檠燈一鉢一鉢平生了慚愧南窗打睡僧

別康顯之

玉川文字五千卷。鄭監才名四十年。誰謂華高吾豈敢。恥居王後子。當然河亭笑語歸陳迹。里社追隨失後緣。後夜并州月千里。南窗尊酒且留連。

寄楊飛卿

客夢悠悠信轉蓬。藁床殷殷動晨鐘。西風白髮三千丈。故國青山一萬重。沙水有情留過鴈。乾坤多事泣秋蟲。三間老屋知何處。慚愧雲間陸士龍。

雨夜

夢裏孤蓬雨打秋。茅齋元更小於舟。無錢正坐詩作祟。識字重爲時所讐。千里謾思黃鵠舉。六年真作賈胡留。并州北望山無數。一夜砧聲人白頭。

東平送張聖與北行

天山曾望使車還。官柳青青此重攀。去國衣冠元易感。中年親友更相關。簾雲自可無千里。隱霧難教見一班。海內文章在公等。不應空老道途間。

別張御史特立文舉字

晚學天教及老成。翰林詩裏羨鴻冥。內翰父贈御史詩有鴻冥雜媒之句。筆瓢此日歸顏巷。銅墨當時動漢庭。華袞謾勞紆直筆。御史見贈之行過有褒拂絳帷無復與橫經。祇應千里并州道。常並虛危候德星。

出東平

老馬凌競引席車。高城回首一長嗟。市聲浩浩如欲沸。世路悠悠殊未涯。潦倒本無明日計。往來空置六年家。東園花柳西湖水。剩着新詩到處誇。

再到新衛

蝗旱相仍歲已荒。伶俜十口值還鄉。空令姓字喧時輩。不救飢寒趨路傍。行帳馬嘶塵湧洞。空村人去雨淋浪。河平千里筋骸盡。更欲驅車上太行。

別冠氏諸人

戊戌秋八月初二日

東舍茶渾酒味新。西城紅艷杏園春。衣冠會集今爲盛。里社追隨分更親。分手共傷千里別。低眉常愧六年貧。他時細數平原客。看到還鄉第幾人。

入濟源寓舍

戊戌八月十二日

未辨驅車上太行。主人留此避風霜。遺編墜簡文章爛。羈食麤衣歲月長。奮迅舊嫌扶老杖。龍鍾今屬負暄牆。睡中刺刺聞人語。季子金多過洛陽。

鎮平縣齋感懷

四十頭顱半白生。靜中身世兩關情。書空咄咄知誰解。擊缶嗚嗚卻自驚。老計漸思乘款段。壯懷空擬漫崢嶸。西窗一夕無人語。挑盡寒燈坐不明。

野菊再奉座主閑閑公命作

晚景瀟疏畫不成。晚花作意出繁英。鮮明獨向霜露見。爛熳卻隨蒿艾生。南國騷人知有待。西風胡蝶更

多情南山正在悠然處。安得芳樽與細傾。

五月十二日座主閑閑公諱日作

厝火誰能捄已然。直教憂疾送華顛。贈官不暇如平日。草詔空傳似奉天。故壘至今埋恨骨。遺宗何力起新阡。門生白首渾無補。陸氏莊荒又一年。

四哀詩

李欽叔

赤縣神州坐陸沉。金湯非粟禍侵尋。當官避事平生恥。視死如歸社稷心。文采是人知子重。交朋無我與君深。悲來不待山陽笛。一憶同衾淚滿襟。

冀京父

先公藻鑑識終童。曾拔崑山玉一峯。未見連城沾白璧。蚤聞烈火燎黃琮。重圍急變紛紛口。九地忠魂耿耿胸。欲吊南雲無覓處。士林能不泣相逢。

李長源

冀都事死東州禍。李翰林亡陝府兵。方爲騷人箋楚些。更禁書客墮秦坑。石苞本不容孫楚。黃祖安能貸禰衡。同甲四人三橫賓。此身雖在亦堪驚。

王仲澤

太學聲華弱冠馳。青雲岐路九霄飛。上前論事龍顏喜。幕下籌邊犬吠稀。壯志相如頭碎柱。赤心嵇紹血。

沾衣從來聖牘褒忠義。誰爲幽魂一發輝。

過詩人李長源故居

楚些招魂自往年。明珠真見抵深淵。巨鱉有餌雖堪釣。怒虎無情可重編。千丈氣豪天也妬。七言詩好世空傳。傷心鸚鵡洲邊淚。卻望西山一泫然。

己亥十一月十三日雪晴夜半讀書山東龕看月

四山寒雪夜深明。未恨崔嵬失舊青。青女有功加粉澤。素娥無意惜娉婷。微雲河漢非人世。太古鴻荒見典刑。剩着新詩記今夕。年年來醉半山亭。

明日作

晴光晃漾入危闌。萬象都歸一色看。搖筆尙堪凌浩蕩。舉盃誰與慰荒寒。化成銀界清涼近。散盡冰花碧海乾。後夜霜空月輪滿。可無秦女共驂鸞。

杏花二首

庚子歲南庵賦

芳樹春融絳蠟凝。春風寂寞掩柴荆。畫眉盧女嬌無柰。齶齒孫娘笑不成。已怕宿粧添蝶粉。更堪煖藥鬧蜂聲。一般踈影黃昏月。獨愛寒梅恐未平。一穗蘆鞭一穗塵。西園紅艷眼中新。帽簷分去家家喜。酒面飛來片片春。梅柳幾曾同故事。櫻桃纔得綴芳辰。荒城此日腸堪斷。老卻探花筵上人。

醉後

蚤歲披書手不停。中年所得是忘形。天公不禁人間酒。崔瑗虛留座右銘。身後山丘幾春草。醉來日月兩秋螢。柴門老雨青苔滿。一醉狂歌且自聽。

賦南中楊生玉泉墨

墨不用松烟而用燈煤

萬竈玄珠一睡輕。客卿新以玉泉名。御團更覺香爲累。冷劑休誇漆點成。涴袖秦郎無藉在。畫眉張遇可憐生。晴窗弄筆人今老。孤負松風入硯聲。

宮中以張遇麝香爲畫眉墨

贈張文舉御史

安穩藜床坐欲穿。合教絕學到真傳。清貧自苦知何負。神理無憑恐未然。糜乳尙憐孤竹餓。龍頭誰識管寧賢。無窮白日青天在。會有先生引鏡年。

先生新失明

寄答飛卿

一首新詩一紙書。喜於滄海得遺珠。古來獻玉猶難售。此日聞韶本不圖。白雪任教春事晚。青天終放月輪孤。并州命駕纔千里。稽呂風流未可無。

留別龍興泮禪師普照鑑禪師

十年不見木庵師。二老相從又一時。俚曲只知無白雪。遺音誰謂有朱絲。書難盡信何如默。人各爲家枉自私。三月春風滿桃李。青青留看歲寒枝。

赤石谷

林磧陰崖霧杳冥。石根寒溜玉玎玲。雲來朔漠疑秋早。山近清涼覺地靈。靜愛鳥聲存野調。鬧嫌人跡帶

塵腥南臺說有金銀氣。可是并汾處士星。繫舟山僧徒謂之小五臺。九月中時有景星如佛光云。

贈楊君美之子新甫

書林頭白坐吟呻。青佩橫經更幾人。總角未逢韓吏部。伏膺先就楚靈均。岳蓮盡發三峯秀。玉樹初開三月春。看取楊家伯男子。今年天壤姓名新。

灔亭同麻知幾賦

零落樓遲復此遊。一尊聊得散羈愁。天圍平野莽無際。水遶孤城閒不流。元是深字知幾請予改作閑字。柳意漸迴淮浦煖。鴈聲仍帶塞門秋。登高望遠令人起。欲買烟波無釣舟。

答公茂

文昌除目入驚看。似覺規摹到漢官。冀北已空天下馬。江東全倚謝家安。黃圖赤縣風流在。碧落銀河病眼寬。林下升平有他日。草堂應許駐金鞍。

過應州

平野風埃接戍樓。邊城三月似窮秋。人家土屋纔容膝。驛路旗車不斷頭。隨俗未甘嘗馬漚。敵寒直欲御羊裘。十年紫禁煙花繞。此日雲山是應州。

應州寶宮寺大殿

縹渺層簷鳳翼張。南山相望鬱蒼蒼。七重寶樹圍金界。十色雲華擁畫梁。竭國想從遼盛日。閱人真是魯靈光。請看孔釋誰消長。林廟而今草又荒。

懷安道中寄懷曹徵君子玉

赭水歡游事已非。襄山回首重依依。
義熙留在陶元亮，華表來歸丁令威。
袖裏短書懷老筆，夢中蟠腹見
褒衣。祝君飽喫殘年飯，會有鄰牆白版扉。

五月十一日樗軒老忌辰追懷

遺後交情老更傷。每逢此日倍難忘。
神光何處埋泉壤，落月無言滿屋梁。
祕閣圖書疑外府，謝家蘭玉記
諸郎靈均謾倚騷。公墓今爲亂冢所迷故有上句經在宗國河山半夕陽。

感事

富貴何曾潤髑髏。直須淅米向矛頭。
血讐此日逢三怨，風鑒生平備九流。
瓢飲不甘顏巷樂，市鉗真有楚
人憂。世間安得如川酒，力士鎧頭醉死休。

玉溪端氏

邂逅詩翁得勝遊。煙霞真欲盡崧丘。
玉溪如此不一到，今日曠然消百憂。
林影蒼茫開霽曉，岸容瀟洒帶
新秋。酒材已辦須君釀，要及西風入釣舟。

華不注山濟南作

元氣遺形老更頑。孤峯直上玉屏顏。
龍頭突出海波沸，鰲足斷來天宇闊。
齊國伯圖殘照裏，謫仙詩興冷
雲間。乾坤一劍無人識，夜夜光芒北斗寒。

岳解元生日邦獻

天日晴明見岳時。只君消得謫仙詩。鶯花到處供杯酒。霜雪何緣點鬢絲。已辦紫雲新活計。又添驥子好男兒。扶風里社他年看。鬧簇靈椿桂五枝。

感興

夜宿書山作

倚梯從昔望烟霄。七葉何人竟珥貂。道路常教車歷鹿。功名唯有鬢飄蕭。勤如韓子初無補。晚似馮公豈見招。五十三年等閑裏。一窗風葉雨瀟瀟。

晨起

壬寅正月九日

燈火青熒語夜闌。柴荆寂寞掩春寒。歡悰已向杯中減。老態何堪鏡裏看。多病所須唯藥物。一錢不直是儒冠。掣鯨莫倚平生手。只有東溪把釣竿。時欲經營神山別業故云

送周帥夢卿之關中二首

狼藉麻衣見酒痕。憶君醉別柳邊村。離愁擾擾理還亂。來事悠悠誰與論。瘴海漸添春浪闊。冰崔唯覺暮烟屯。人間底似三峯好。箭筈通天有一門。

風華漠漠水迢迢。長記金鞍入灞橋。鬚鬢而今滿霜雪。羽毛此日是雲霄。火餘函谷青猶峙。春動長陵紫未消。射虎南山付公等。可能仙掌不相招。

感事

舐痔歸來位望尊。駿駿雷李入平吞。飢蛇不計擰腸裂。老虎爭教有齒存。神理定須償宿業。債家猶足褫驚魂。且看含血曾誰喫。猪觜關頭是鬼門。

十月二十日雪中過石嶺關

老天黯慘入平蕪。朔吹崩奔萬竅呼。雪意旋粧行路景。詩家新有入關圖。地爐圍坐慚田父。黎帽衝寒怨僕夫。故國煙花重迴首。蜀橙山麝記金壺。

將上書莘國幕府感懷呈賈明府

兵家世不乏小杜。風塵今誰如老龐。自許奇謀傾幕府。不防幽夢落蓬窗。驚鳥繞月枝難穩。羸驥嘶風氣未降。愛惜平生請纓手。一簑休憶弄秋江。

春寒

草木荒城屋數椽。春寒閭巷益蕭然。僮奴樵爨頭如葆。稚女跳梁履又穿。白石鯉魚空尺半。朱門食客自三千。松枝麈尾山中滿。去去南華有內篇。

卽事商帥國器見兒從軍

逋客而今不屬官。住山盟在未應寒。書生本自無燕領。造物何嘗戲鼠肝。會最指天容我懶。鴟夷盛酒盡君歡。到家慈母應相問。爲說將軍禮數寬。

示懷祖

憔悴經年臥澗阿。囊中無物只詩多。自驚白髮先潘岳。人笑藍衫似采和。狗盜鷄鳴皆有用。鶴長鳧短果如何。乘閒便作歸田賦。付與牛童扣角歌。

示崔雷詩社諸人

一寸名場心已灰。十年長路夢初回。江山似許供詩筆。糜粥猶能到酒杯。賣劍買牛真得計。腰金騎鶴恐非才。游從肯結鷄豚社。便約歲時相往來。

弘州贈曹丈子玉

丘園舊憶詢幽仄。裘褐今聞識姓名。故國衣冠有遺老。歲寒松柏見交情。寄書千里空頭白。握手一盃俱眼明。來往裏陰從此始。剩將歌笑慰生平。

和仁卿演太白詩意二首

蕭蕭窗竹動秋聲。紫極深居稱野情。靜坐且留觀衆妙。還丹無用說長生。風流五鳳樓前客。寂寞千秋身後名。解道田家酒應熟。詩中只合愛淵明。

蕭蕭窗竹動秋聲。簷間白雲澹以成。白雲朝飛本無意。白雲暮歸如有情。淵明太白醉復醉。季主唐生鳴自鳴。四十九年堪一笑。昨非今是可憐生。

燕府白兔

仙穎迷離望莫攀。爭教失腳下高寒。吸殘灑露瑤窗曉。搗盡玄霜玉杵閑。顧影乍疑雲外見。寫生何似鏡中看。褐衣擾擾皆三窟。幾在祥經咳唾間。

梁都運亂後得故家所藏無盡藏詩卷見約題詩同諸公賦。

飛亭四望水雲寬。亭上高人杳莫攀。已就湖山攬奇秀。更教鄉社得安閑。風流豈落正始後。詩卷常留天地間。勝賞休言隔今昔。肩吾新自會稽還。

出都二首

漢宮曾動伯鸞歌。事去英雄不奈何。但見觚稜上金爵。豈知荆棘臥銅驃。神仙不到秋風客。富貴空悲春夢婆。行過盧溝重迴首。鳳城平日五雲多。

歷歷興亡敗局棋。登臨疑夢復凝非。斷霞落日天無盡。老樹遺臺秋更悲。滄海忽驚龍穴露。廣寒猶想鳳笙歸。從教盡剗瓊華了。留在西山儘淚垂。壽寧宮有瓊華島絕頂廣寒殿近爲黃冠輩所撤

癸卯望宿中霍道院

疊巘沉沉轉素蟾。長松柳柳擁高簷。湖山已爲新晴好。風露還疑此夜添。身外作緣良自苦。世間除睡更無甜。溪堂借宿從今始。便約兒童具米鹽。

甲辰三月旦日以後雜詩三首

應接紛紛又浹旬。枉教虛負杏園春。尋芳自分無閑日。載酒寧知有故人。花柳得時俱作態。川原經雨更無塵。憑君莫惜尊前醉。看卽青梅入座新。

澌澌猩紅鬧曉晴。攢頭真侶與春爭。舒開楊柳聊相映。瘦殺寒梅枉自清。粉艷低回工作態。絳唇寂寞獨含情。畫圖只愛殘粧好。未信徐郎解寫生。
密霧輕塵細洒勻。綠雲紅雪一番新。風光爛熳供歡席。酒味清醇侶主人。落落湖山如有喜。欣欣魚鳥亦相親。新詩寫入奚奴錦。從此他鄉不等春。

紫牡丹三首

金粉輕黏蝶翅勻。丹砂濃抹鶴翎新。儘饒姚魏知名早。未放黃徐下筆親。映日定應珠有淚。凌波長恐襪生塵。如何借得司花手。偏與人間作好春。

夢裏華胥失玉京。小闌春事自昇平。只緣造物偏留意。須信凡花浪得名。蜀錦浪淘添色重。御爐風細覺香清。金刀一剪腸堪斷。綠鬢劉郎半白生。

天上真妃玉鏡臺。醉中遺下紫霞盃。已從香國偏薰染。更惜花神巧剪裁。微度麝薰時約略。驚移鸞影卻低回。洗粧正要春風句。寄謝詩人莫漫來。

與同年敬鼎臣宿順天天寧僧舍

蕭蕭風雨打僧窗。耿耿青燈對客床。每恨相望隔關塞。豈知連日醉壺觴。萍蘋味薄塘長久。茅屋寒多且閉藏。三十餘年老兄弟。此回情話獨難忘。

贈答樂大舜

中京副留守

舟車何地得通津。書疏相忘意更親。但愛柏臺推峭直。豈知梅賦更清新。兩都秋色皆喬木。舊舊風流有幾人。詩酒陪從約他日。鷄川已許濯纓塵。

都運李丈哀挽

有之

平日剛棱觸禍機。老年天遣故鄉歸。登車攬轡名空在。濯足臨流是已非。白鶴會須尋舊約。青蠅猶解避餘威。李丈歿於壬寅夏六月，異香滿室三日蠅不近。西州正有花千樹。淚盡羊曇醉後衣。

贈答郝經伯常伯常之大父予少日從之學科舉

故家珠玉自成淵。重覺英靈賦予偏。文陣自憐吾已老。名場誰與子爭先。擣腸正有五千卷。下筆須論二百年。莫把青春等閑了。蔡邕書籍待渠傳。

呂國材家醉飲

世事悠悠殊未涯。七年回首一長嗟。虛傳庾信凌雲筆。無復張騫犯斗槎。去國衣冠有今日。春風桃李是誰家。螺臺剩有如川酒。甃爲紅塵拂鬢華。

洛陽

千年河岳控喉襟。一日神州見陸沉。已爲操琴感衰涕。更須同輩夢秋衾。城頭大匠論蒸土。地底中郎待摸金。擬就天公問翻復。蒿萊丹碧果何心。

過三鄉望女几邨追懷溪南詩老辛敬之二首

雲際虛瞻處士星。案頭多負讀書螢。筆端有口傳三箇。石上無禾養百齡。從昔葛陂終變滅。祇今韓嶽謾英靈。因君重爲前朝惜。枉破青衫買一經。謂之韓嶽女几山土人

萬山青繞一川斜。好句真堪字字誇。棄擲泥塗豈天意。折除時命是才華。百錢卜肆成都市。萬古詩壇子美家。欲就溪南問遺事。不禁衰涕落烟霞。

爲鄧人作詩

再見州人本不期。相留相挽忍相違。攜盤渭水塘流涕。種柳金陵已合圍。事去恍疑春夢過。眼明還似故鄉歸。題詩未要題名字。今は中原一布衣。

贈張主簿偉

江岸墳荒草棘秋。朱陽南下重君憂。弓刀近塞人烟少。林壑經霜虎迹稠。究竟畏途知有漸激昂高義報無由。從今弟妹通家了。莫向瓜田認故侯。戒爲究竟伴能過險惡道。

望盧氏西南熊耳嶺

不到中鄉十五年。忽驚行色是盧川。已占介福歸王母。未信羈魂似粵阡。柳文時爲顧存慙吏報。先夫人墓在千里外。馬范二師遠在千里外。予往盧氏皆得會面。亂後故吏致祭偶成期會殆天憐。馬范二師遠在千里外。予往盧氏皆得會面。荒林破屋江聲裏。坐想孤城一泫然。

寄劉繼先

清霜茅屋耿無眠。坐憶分攜一慨然。楚客登臨動歸興。謝公哀樂感中年。淒涼古驛人煙外。迤邐荒山雪意邊。千樹春風水楊柳。待君同繫晉溪船。

寄楊弟正卿

馬迹車塵漫白頭。蒼生初不待君憂。且從少傅論中隱。儘要元規擁上流。東閣官梅動詩興。洞庭春色入新篤。歸程未覺西菴遠。夜夜清伊繞石樓。正卿西菴以名酒甲洛中。嘗賦觀瀆詩有狂瀾竟逐西風落依舊清溪繞石樓之句。故兼及之。

爲鮮于彥魯賦十月菊追錄

清霜淅淅散銀沙。驚見芳叢閱歲華。借煖定誰留翠被。鍊顏應自有丹砂。秋香舊入騷人賦。晚節今傳好世家。不是西風苦留客。衰遲久已避梅花。

贈答同年敬鼎臣

四海屏山放一頭。爭教塵土走東州。長身奉米侏儒飽。束髮從軍妄尉侯。千首新詩工作祟。百壺清酒未消憂。悠悠世事今如此。付與烟波着釣舟。

寄英上人

世事都銷酒半醺。已將度外置紛紜。乍賢乍佞誰爲我。同病同憂只有君。白首供傷千里別。青山真得幾時分。相思後夜并州月。卻爲湯休賦碧雲。

寄答仰山謙長老

渠住招隱

木菴推出謙書記。乞與雲林百自由。想得驅驢入招隱。勝於騎鶴上楊州。衆狙皆喜芋初熟。一鳥不鳴山更幽。日暮王城市聲合。松風亭上莫迴頭。

九日登平定湧雲樓故基。樓即閑閑公所建。

詩翁曾此宴重陽。老樹遺臺認醉鄉。流水浮生幾今昔。高秋雲物自淒涼。飛來野鶴聊堪喜。望隔長鯨又可傷。賴是風流未全減。白頭門客有王楊。時王無咎楊子昭在郡時學生也。

平定鵲山神應王廟

古柳輪囷欲十圍。鵲山祠廟此遺基。萬金良藥移造化。老眼天公誰耦畸。已爲養生誣單豹。不應遭網廢元龜。半生磊磈澆仍在。擬問靈君乞上池。

寄答商孟卿

窈渺朱絃寂寞心。得詩何啻得南金。冷猿挂夢山月暝。老鴈叫羣江渚深。異縣五年仍隔闊。荒城連日想

登臨書來且只平安了。撥觸離愁恐不禁。

答石子章因送其行

石梁詩好先知名。尊酒相逢意自傾。寶劍沉埋惜元振。鐵檠豪宕見胡鈺。藍田月出多重量。豐嶺霜餘卽大鳴。後日天山望征騎。燕鴻歸處是雲程。

留別仲經

來時兒女拜燈前。此日壺觴是別筵。聚散共知陰有數。笑談爭遣病相先。秋風古道將誰語。殘月長庚更可憐。鷄柵魚梁一村落。若爲還似浙江邊。仲經方病中故有上句

別周卿弟

晚歲論詩辱見收。相從許久重相留。苦心亦有孟東野。真賞誰如高蜀州。萬疊寒雲度歸鴈。孤洲春水澹沙鷗。荒城後日思君處。風色蕭蕭人白頭。

寄叔能兄

星斗龍門姓字新。豈知書劍老風塵。郎君未省曾開闔。王翰何緣得買鄰。銀燭對談辭館夜。雪梅同醉浙江春。祇應千里東州月。處處相逢卽故人。

賀威卿徐弟得雄

利市金錢四座俱。阿卿新喜到充閭。跨牛楊朴空顛酒。株驥王良已問途。桂出孫枝知秀發。鳳離丹嶠亦舒徐。明年別作飛黃句。來賀君家第二雄。

遺山先生文集卷第十

七言律詩

追錄洛中舊作

樂府新聲綠綺裘，梁州舊曲錦纏頭。
酒兵易壓愁城破，花影長隨日腳流。
萬里青雲休自負，一莖白髮儘堪羞。
人間只怨天公了，未便天公得自由。

東園晚眺 東平

霜鬢蕭蕭試鑷看，怪來歌酒百無歡。
舊家人物今誰在，清鏡功名歲又殘。
楊柳攬春出新意，小梅留雪弄餘寒。
一詩不盡登臨興，落日東園獨倚欄。

十一月五日豐往西張

城隈細路入沙汀，絮帽衝風日再經。
歎歲村虛更荒惡，窮冬人影亦伶俜。
傳林煙漠漠鴉邊暗，山骨稜稜雪外青。
四十年來此寒苦，凍吟猶記隴關亭。

石嶺關書所見

軋軋旗車轉石槽，故關猶復戍弓刀。
連營突騎紅塵暗，微服行人細路高。
已化蟲沙休自歎，厭逢豹虎欲安逃。
青雲玉立三千丈，元只東山意氣豪。

陀羅峯二首

念念靈峯四十年，一來真欲斷凡緣。
鑿開混沌露元氣，散布兜羅彌梵天。
雲臥無時不閑在，樓居何處得超然。
殊祥莫詫清涼傳，會與茲山續後篇。

追懷曹徵君

僧行平陽
慧太原

生死論交不易忘，一回言別淚千行。
空勞結伴歸蓮社，無復題詩寄草堂。
楚國先賢宜有傳，粵阡羈鬼謾思鄉。
因君錯怨天公了，且道今誰晚節昌。

春日書懷呈劉濟川

鄉社荒殘住不成，無端蓬蓽掩柴荆。
流年又見東風菜，樂土空懷北斗城。
父老只供留我醉，兒童也喜從君行。
周侯見說應相笑。兵隱三泉先有盟。
東風菜見本草菜部

晉溪

石磴雲松着色屏，岸花汀草展江亭。
青瑤疊甃通懸甃，白玉雙龍掣迅霆。
地脈何嘗間今昔，尾閭真解泄滄溟。
乾坤一雨兵塵了，好就川妃問乞靈。

弔岳家千里駒

蜀客淒涼土一丘，身後還有化身愁。
靈椿丹桂偶相值，蕙草清霜寧久留。
掌中玉雪恩憐在，筆底雲烟取次休。
過眼空華只如此，不如無子卻無憂。

七月十二日行狼牙嶺

狼牙路滑馬伶俜。老鶴超超欲上征。一曲松風寫幽致。九秋雲物愴離情。天開員嶠方壺境。澗落銀河月窟聲。覲面青山入渠手。定誰胸次玉崢嶸。

十三日度岳嶺

神岳規模亦壯哉。上階絕境重裴回。丹青萬木秋風老。金翠千峯落照開。川路漸分猶暗澹。湍聲已遠更淒哀。石門剝比靈丘遠。正坐登臨欠一來。

玉泉二首

神岳提封入寺基。上公官秩見僧碑。雲藏佛屋晴猶暗。樹近禪窗老更奇。竹杖只供行險易。藜床偏與望川宜。同時不及鬢中令。猶得泉名比鳳池。

玉水泓澄古殿隅。又新名第不關渠。每因天日流金際。更憶風雷裂石初。百里官壺分韻勝。千人齋粥薦甘餘。八功德具休誇好。玩景臺荒有破除。寺東北有玩景臺，盡得神川之勝，導者惧引之荒山一尖，故有二句。

玄都觀桃花

前度劉郎復阮郎。玄都觀裏醉紅芳。非關小雨能留客。自是桃花要洗粧。人世難逢開口笑。老夫聊發少年狂。一盃盡吸東風了。明日新詩滿晉陽。

贈張致遠

茅屋瀟瀟穎水濱。兩山相望卽比鄰。禪房道院留連夜。酒榼詩囊浩蕩春。老鶴千年見城郭。徵君晚節旁

風塵相逢不盡平生意。耆舊風流有幾人。

夜宿秋香亭有懷本菴英上人

兄弟論交四十年。相從旬日卻無緣。去程冰雪詩仍在。晚節風塵私自憐。蓮社舊容元亮酒。藤溪多負子
猷。紅茅齋一夕愁多少。窗竹瀟瀟耿不眠。

汴梁除夜追錄

六街歌鼓待晨鍾。四壁寒齋只病翁。鬢雪得年應更白。燈花何喜也能紅。養生有論人空老。祖道無詩鬼亦窮。數聲_上日西園看車馬。一番桃李又春風。

與馮呂飲秋香亭三子皆吾友

之純席上

龐眉書客感秋蓬。更在京塵湧洞中。莫對青山談世事。且將遠目送歸鴻。龍江文采今誰似。謂之純鳳翼寧永名。年光夢已空。剩着新詩記今夕。尊前四客一衰翁。

哀武子告

生氣曾思作九原。迷塗爭得背南轍。梁鴻故事要離墓。衛國孤兒祇樹園。子今爲舊說布衣甘絕脰。今傳史筆記歸元。知君祿仕無心在。旌孝終當到李源。

贈李春卿

寶十郎家指顧間。因君我亦愛西山。丹房藥鏡平生了。禪榻茶煙歲月閑。春甕有情供白墮。秋風無力損紅顏。重來已有明年約。剩破都城幾往還。

甲辰秋留別丹陽

疎疎衰柳映金溝。祖道都門復此留。千里關河動歸興。九秋雲物發詩愁。嚴城鍾鼓月清曉。老馬風沙人白頭。後夜相思渺何許。西山西畔是并州。

龍興寺閣

全趙堂堂入望寬。九層飛觀儘高寒。空聞赤轔疑軍壘。真見金人泣露槃。桑海幾經塵劫壞。江山獨恨酒腸乾。詩家總道登臨好。試就遺臺老樹看。

別緯文兄

玉壘浮雲變古今。燕成名酒足浮沉。眼中誰復承平舊。言外驚聞正始音。異縣他鄉千里夢。連枝同氣百年心。行期幾日休相問。觸撥羈愁恐不禁。

寧豫端甫北上

馬頭風雪遠相迎。颯沓弓刀四十程。自是青雲動高興。未甘白髮老諸生。書來沙漠燈花喜。夢到秦川煙樹平。長句送君還自媿。半山已有鴈飛行。

答定齋李兄

小山葵桂姓名香。舉世何人得鴈行。滄海楊塵幾今昔。長庚配月獨淒涼。虛勞裴相求白傅。正倚源明識漫郎。十載相從未言晚。城南泉石有雲莊。

空山何巨川虛白菴二首

舊向韋編悟括囊。肯隨文木被青黃。吉祥止處無餘物。知見薰來有底香。空谷自能生地籟。浮雲爭得翳天光。只愁八月風濤壯。夢裏江聲憾客床。何曉安人。

露菊霜茱薦枕囊。石泉崖蜜破松黃。只緣山遠無來客。更覺心清聞妙香。碁局儘堪消日晷。吟毫真合染溪光。劇談不盡江湖景。重與青燈約對床。

聽妓女喬夫人鼓風入松

白雪朱絃一再行。春風纖指十三星。雲窗霧閣有今夕。寶髻羅裙無此聲。瀟洒寒松度虛籟。悠颺飛絮攬青冥。胎僊不比湘靈瑟。五字錢郎莫漫驚。

哭樊帥

自倚沉冤有舌存。爭教無路叩天闢。裝囊已竭千金賜。絕幕誰招萬里魂。東道漫悲梁苑客。南園多負壽張孫。春風花落歌聲在。夢裏能來共酒尊。

寒食明

王子清後作

上苑春風盛物華。天津雲錦赤城霞。輕舟矮馬追隨遠。翠幙青旗笑語譁。化國樓臺隔瀛海。吳兒洲渚記仙家。山齋此日腸堪斷。寂寞銅鉛對杏花。

送樊順之

弓刀十驛岳蓮州。渭水秦山得意秋。玉粲從軍正年少。庾郎入幕更風流。寒鄉況味真鷄肋。清鏡功名屬虎頭。寄謝溪風亭上月。老夫乘興欲西游。

蜀昭烈廟

合散扶傷老益堅。荒祠重過爲淒然。君臣洒落知無恨。庸蜀崎嶇亦可憐。一縣山陽堯故事。三年章武魏長編。錦宮羽葆今何處。半夜樓桑叫杜鵑。

宿翠屏口

鬢鬚蒼白葛衣寬。事外閑身也屬官。授簡如聞數枚叔。乘車初不少馮驩。沙城雨塲名空在。石峽風來夏亦寒。兩飽三飢已旬日。虛勞兒女勸加餐。

王敦夫祥止庵

三樂人推二樂全。有親可事子能傳。舊時詩禮聞家學。此日丹砂見地懶。蕩蕩天光虛室外。融融和氣彩衣前。情知不羨燕山桂。一樹靈椿歲八千。

過寂通庵別陳丈

甲辰

陳丈未識某而愛其詩。曾對高御史美言。我他日見遺山。當快飲百醉後見之。而公已病。乃相約易百醉爲百杯。每見以酒籌計之。至七八十杯。復有此別。故詩中及之。
心遠由來地自偏。不離城市得林泉。從教上界多官府。且放閑身作地仙。三月有期何敢負。百杯未滿會須墳。違離更覺從公晚。卻望都門一慨然。

梁移忠詩卷

一箭功成塞上歸。迺翁垂白藉扶持。燕雲義俠風流遠。里社陰功父老知。龍種作駒元自異。虎頭食肉宋

應遲高門更與增華表。丁令還家先有期。時都運丈已下故詩中及之。

喬千戶挽詩

高塚驚看石表新。空將事業望麒麟。燕遼部曲千夫長。楚漢風雲百戰身。赤羽有神留絕藝。素旗無誄記連姻。陰功未報天心在。累將重侯又幾人。潘安仁楊使君誄有表之素。旗之句喬與予皆毛氏之婿。

贈王仙翁道成

覽照休驚白髮新。弈棋翻覆見來頻。燕南趙北留詩卷。王後盧前盡故人。平地青雲一爐藥。舊都喬木百年身。憑君剩醉浮香酒。館名梁苑而今不笄春。

常仲明教授挽辭

雲際虛瞻處士星。豈知談笑已忘形。鎮州肥膩無毫髮。晉產真淳有典刑。白帽枉教淹晚節。綠囊元擬濟含靈。汝南後日先賢傳。猶欠知幾爲勒銘。常代州崞縣人。客臨城與知幾游從。知幾終殊明了。

追錄舊詩二首

短褐單衣長路塵。十年回首一吟呻。孤居無着竟安往。宿債未償今更新。相馬自甘齊客瘦。食鮓誰顧庾郎貧。聞君話我才名在。不道儒冠已悞身。自用韻答張之純。

潦倒聊爲隴畝民。一犁分得雨聲春。功名何物堪人老。天地無心誰我貧。穎上雲烟隨處好。洛陽桃李幾番新。悠悠世事休相問。年來今年晚得辛。用崔懷祖韻。

丁未寒食歸自三泉

春山晴煖紫生煙。山下分流百沵泉。未放小桃裝野景。已看茅屋映秋千。飢鳥得食爭相喚。醉叟行歌只自憇。寒食明年定何許。故人尊酒且留連。

卽事呈邦瑞

鄭莊父子重相留似爲良辰散客愁。陋巷新成一茅屋。今年連醉兩中秋。開尊便覺賢人近。汗足寧論力士羞。明日燕臺傳盛事。坐中賓客盡名流。

和白樞判李定齋有詩寄白以因風何惜數行書爲落句。白酬答云。欲搜春草池塘句。藥裏關心夢不成。余平解之。

金粟崗頭有髮僧。遙知默坐對龍燈。書郵但覺浮沉久。詩卷何緣唱和曾。白日放歌須縱酒。清朝有味是無能。相逢定有池塘句。藥裏關心恐未應。

慶高評事八十之壽

圖畫堯民大朴存。衣冠兼得見高門。種松千歲如種德。教子一經今教孫。化日舒長留暮景。秋風搖落變春溫。聘君羔鴈休疑晚。正及新年薦壽尊。

超然王翁哀挽

直擬期頤薦壽尊。卻從圖畫記生存。百年喬木衣冠古。一夕西庵笑語溫。故事未需通德里。素風多負讀書孫。吳陳諸老今誰在。滅沒歸鴻是虧門。

太名贈答張簡之

營平豪宕變溫文。所見今知勝所聞。只道生涯無長物。爭教詩壘策奇勳。伐薪未敢煩名士。載酒能來過。
子雲後日山陽養衰疾。藥籠僊品正須君。

燕都送馬郎中北上

功曹此日漢蕭何。家世當年老伏波。但愛紅蓮映芳渚。豈知寒谷變陽和。珠囊不載模糊錦。銀管先書茂異科。太史占天應有喜。一星朝處五雲多。

馬雲漢方鏡背有飛魚

刲火依然百鍊初。護持元自有神魚。影寒似覺雲屏透。光落應分玉斗餘。開朗休嫌露圭角。圓通寧復滯方隅。衣冠正了渾闊在。一片靈臺欲付渠。

贈答鴈門劉仲脩

仲脩省郎乘傳過新興。有詩見及推激過稱。甚非衰謬所宜得者。媿汗之餘。輒用韻爲謝。仲脩

詩律深密。得於尊公鳳山老人過庭之訓。且其顏壯絕類吾友李從事長源。故篇中有及。

車騎雍容一坐傾。并州人物未凋零。共知祭酒傳家學。劉向爲劉氏祭酒獨愛中郎餘典刑。東壁圖書欣有託。南溟風浪駭初經。少微見比吾何敢。洗眼僊槎候客星。

餘慶堂

五年霜戟照康莊。萬里春風擁畫梁。已覺并汾增勝氣。更從王郝借餘光。靈椿丹桂知難老。玉節金符豈易量。剩着牋毫授辭客。南堂兼是棣華堂。

寄答劉生

西州消息到東山，懷袖新詩百過看。
白璧明珠驚照座，朔雲寒雪入憑欄。
省郎共結交情厚，野老還欣禮數寬。
後日秋風一尊酒，草堂應得駐金鞍。

別董德卿

爛醉秋風四十場，此回歌笑重難忘。
楊雄詞賦金誰識，陶令田園先已荒。
同甲弟兄雖異姓，宦游州郡即吾鄉。
懸知後日登高地，剩爲行人望太行。

送端甫西行

瀛洲人物早知名，車騎雍容一座傾。
美酒清歌良有味，綠波春草若爲情。
渭城朝雨三年別，平地青雲萬里程。
老我秦游舊曾約，夢中僊掌已相迎。

讀李狀元朝宗禪林記

李守濟州城破不屈節死贈鄉郡刺史

偶向禪林見舊文，濟陽南望爲沾巾。
張巡許遠古亦少，烈日秋霜今更新。
千字豐碑誰國手，百城降虜盡王臣。
知君不假科名重，元是中朝第一人。

同嚴公子大用東園賞梅

東閣官梅要洗粧，青雲公子不相忘。
翰林風月三千首，樂府金釵十二行。
佳節屢從愁裏過，老夫聊發少年狂。
花行更比流行好，誰道并州是故鄉。

中庸先生垂示

先大夫教子詩及裴內翰擇之所述家傳愛仰不足情見于辭。

嚴訓常如天日照名家元自古今同只知楊秉餘清節爭信譙玄有素風獨行傳第一人通德里門傳故事安平韻語到兒童青青留在懷賢樹愛殺曹南一畝宮。

賀中庸老再被恩綸

萬古千秋麗澤堂紫泥恩詔姓名香治朝例有高年敬神理終歸晚節昌東魯儒生傳舊學曹南方志發幽光季春羔鴈秋風酒淮擬年年薦壽觴

趙汲古南園

分得軍字

林園近與六街鄰塵漲都歸一水分魚樂定從濠上得竹香偏向雨中聞接離倒着容山簡老屋高眠稱陸雲尊酒相陪有今日卻慙詩壘不能軍

柳亭雨夕與高御史夜話

關塞無緣笑語同偶然情話此從容青天蜀道不得過山色歸心空自濃九日茱萸藍澗酒十年朝馬景陽鍾三間老屋知何處惆悵雲間陸士龍高曾自藍田令入拜監察御史北渡後謀還保塞而困於無資者二十年矣

玉峯魏丈哀挽

風馭翩翩渺獨征幾人終始復哀榮祗緣大事存遺墨重爲斯文惜主盟北斗太山初未滅秋霜烈日凜如生莫疑知己無從報直筆君看戮進明

清明日改葬阿辛

掌上青紅記點粧。今朝哀感重難忘。金環去作誰家夢。綵勝空期某氏郎。一瞥風花纔過眼。百年冰蘖若爲腸。孟郊老作枯柴立。可待吟詩哭杏殤。

寄謝常君卿

百過新篇卷又披。得君重恨十年遲。文除嶺外初無例。詩學江西又一奇。楊柳不隨春事老。貞松唯有歲寒知。仙鄉白鳳瀛洲近。洗眼雲霄看後期。

送武誠之往漢陂

太原酒政
父此時爲黃冠之

行李中春發晉溪。離筵辭客賦新題。青雲有路人看老。秋水無言物自齊。杜曲舊遊頻入夢。兵廚佳釀惜分攜。因君爲向蓮峯道。不待移文我亦西。

送劉子東遊

劉郎世舊出雄邊。生長幽并氣質全。陣馬風檣見豪舉。雪專冰柱得真傳。書空咄咄知誰解。擊缶嗚嗚頗自憐。後日東州飽歸載。且休多送酒家錢。

甲寅九日同臨漳提領王明之鹿泉令張奉先賈千戶令春李進之冀衡甫遊龍泉寺僧顥求

詩二首

遠水寒煙接戍樓。黃花白酒浣羈愁。霜林染出雲錦爛。春色併歸風露秋。鄉社歲時容客醉。石牆名姓爲僧留。登高舊說龍山好。從此龍泉是勝遊。

柿葉殷紅松葉青。黃花霜後獨鮮明。西風浩浩欲吹帽。石溜泠泠堪濯纓。皇統貞元見題字。良辰美景記升平。何人解得登臨意。滅沒疎雲鴈一聲。

十日作

關樹蕭條返照明。并陘西北筭歸程。青黃大似溝中斷。文字空傳海內名。平地煙霄遠如許。秋風茅屋可憐生。重陽擬作登高賦。一片傷心畫不成。

贈答普安師

入座臺山景趣新。因君鄉國重情親。金芝三秀詩壇瑞。寶樹千花佛界春。聞道舊傳言外意。忘年今得眼中人。種蓮結社風流在。會向藍輿認後身。

孝純宛丘遷奉

張弟新舉第二難。聞其玉雪可念。因以字之。

鬢毛衰颯面塵埃。孝子牽車古所哀。千里長河限南北。一丘塞土見蒿萊。遼東華表何人在。柳氏玄堂此日開。十月知君有新喜。小雛先與喚迎來。

曹壽之平水之行

關塞相望首重搔。相逢衰颯嘆顛毛。驪珠可忍輕彈雀。糟餌何緣得釣鰈。從昔丘園昌晚節。向來山岳攄秋毫。西風先有龍門約。共舉一杯持兩螯。

追懷趙介叔

今古人門各一時。燕南刺有桂林枝。清風明月懷玄度。綠水紅蓮見杲之。善政傳歸遺愛頌。陰功留在稱

家兒哀歌不盡平生意。空想翛然瘦鶴姿。

追懷友生石裕卿

人物休評第幾流。依然豪俠數并州。壯懷歌闋尊爲破。連句才多筆不休。金馬只教聊避世。玉犀誰遺失封侯。酒酣握手今無復。惆悵西園是舊游。

挽鴈門劉克明

詩骨翛然野鶴孤。兩年清坐記園爐。金初宋季聞遺事。第靡波流見古儒。已分幽人嗟古柏。爭教孺子奠生芻。鳳山後日先賢傳。再有劉宗祭酒無。

贈答平陽仇舜臣

兩辱攜詩過草堂。曹君師席有輝光。飛騰自是功名具。潦倒何堪翰墨場。滄海驪珠能幾見。鄆城龍劍不終藏。太行殘雪春風近。且趁梅花薦壽觴。仇乃曹益夫門生也。

賈漕東城中隱堂

智水仁山德有鄰。柳塘花塢靜無塵。家僮解誦閑居賦。田父爭持社饗春。安吉總輸中隱士。典刑真見老成人。明年恰入非熊運。共看青蒲裏畫輪。

約嚴侯汎舟

風物當年小洞庭。西湖此日展江亭。詩貪勝槩題難徧。酒怯清秋醉易醒。白鳥無心自來去。紅渠照影亦娉婷。仙舟共載平生事。未分枯槎是客星。

送李同年德之歸洛西二首

千佛名經有幾人。棲遲零落轉情親。承平盛集今無復。哀樂中年語最真。衣上緇塵元自化。鏡中白髮爲誰新。水南水北相逢在。剩醉酴醿十日春。

亡奈流光冉冉何。逢君聊得慰蹉跎。飛黃老去空奇骨。拙燕歸來只舊窠。舉世盡從愁裏過。一尊獨愛醉時歌。洛中定有人相問。休道今年白髮多。

贈蕭漢傑

蕭漢傑大興人。金國初嘗賜姓奧里氏。故時人又謂之奧里漢傑。父仲寬居之飛龍勝登科。同知青州軍州事。致仕有子六人。皆使宦學。獨漢傑不樂。去聲遂作舉子。爲人慷慨有志膽。好讀書。古兵法及陰陽孤虛祿命之術。從軍二十年。積官從三品領虢州倅。關陝總帥府提控佩金符。蓋自燕城圍解之後。間關南渡。出入行陣間。瀕於死者屢矣。鐵嶺之潰。復入陝州。陝州亂。羣不逞輩繫漢傑獄中。漢傑乘昏暮破械而出。懼爲追者及。駕浮壺。亂黃流。筋疲力涸。僅達北岸。爲失侯故將者。又二十年。流離頓踣。人所不能。而意氣都不少衰。以人情觀之。豈碌碌者所可辨耶。壬子冬。與予相值於東原。問其世。知其爲故人大鈞之同母弟也。問其日事。則曰止以唐生季主之業游。時貴間耳。因與論余之行年。而有契於余心者。私竊慨嘆。以爲倚伏叵測。哀與樂相尋。生也有涯。而跼於憂畏。浩浩乎如乘舟而遇風波。非知其亡可奈何而安之。其可以收利涉之功乎。漢傑爲有得矣。其別也。因爲長句以贈。

射虎將軍右北平短衣憔悴宿長亭雷轟寶劍無留迹火借青囊爲乞靈四壁不知貧作祟一瓢誰識醉中醒相逢莫詬楮機石自省枯槎是客星

送曹幹臣

和林晉驛日懷思燕市歌歡有此時老我真成鐵爐步感君時送草堂費黃楊舊厄三年閨亦驥非無萬里姿平地煙霄付公等不妨閑和鳳池詩

國醫王澤民詩卷

萬古君家父事兄豈知衰俗有王卿一篇華袞中書筆滿紙清風月旦評鴻鴈自分先後序鵠鴟兼有急難情閨門雍睦君須記方伎成名恐未平

祖唐臣母挽章

白髮承平一夢過怡然冠帔見慈和肩輿燕喜今無復手綫留殘恨更多舍肉已甘非穎谷學仙何敢望西河升堂結交平生事重爲王君廢蓼莪

丙辰九月二十六日挈家游龍泉

風色澄鮮稱野情居僧聞客喜相迎藤垂石磴雲添潤泉漱山根玉有聲庭樹老於臨濟寺霜林渾是漢家營明年此日知何處莫惜題詩記姓名

感寓

南楊北李閑中老樂丈張兄病且貧叔夜呂安誰命駕牧童田父實爲憐功名富貴知何物風雨塵埃惜

此身歌酒逢場整陶寫不應嫌我醉時真樂舜杳張緯文

存歿事老敬之
劉兄景玄

行間楊趙提衡早老去辛劉入夢頻按上酒杯聊自慰袖中詩卷欲誰親兩都秋色皆喬木一代名家不數人汲冢遺編要完補可能虛負百年身

人日有懷愚齋張兄緯文

書來聊得慰懷思清鏡平明見白髭明月高樓燕市酒梅花人日草堂詩風光流轉何多態兒女青紅又一時澗底孤松二千尺殷勤留看歲寒枝

趙元德御史兄七秩之壽

富貴浮雲世態新典刑依舊老成人松身鶴骨詩千狀玉潤冰清德有鄰已卜新居近泉石不應晚節傍風塵平頭七十從頭數才是梅溪第一春

張村杏花

丁巳二月
初二日

昨日櫻唇絳蠟痕今朝紅袖已迎門只應芳樹知人意留着殘粧伴酒樽濃李尚須羞粉艷寒梅空自怨黃昏詩家元白無今古從此張村卽趙村

